

Ntirè nè Bèboŋ nè LUK

Luk, ηwè nè yi à còm ηwàk Luk nè'nə, à ka ηwèə Jus yeŋ, megu də yi à ye ηgà be' mandzè Jisos Krest. Yi à ka Ngà Ntum Jisòs sè' yeŋ, yi à sə gihigè bə Pol mvə'nə Pol à sə tsòho lònTtirè Nè Bèboŋ mvwe' lak mok yà'a. Yi à ye ηgà ncəp. Yi à còm ηwàk Ngàa Ntum Jisòs nà'a sè' yi.

Luk à còm də Jisòos Mo Nwè. Yi à sə koksə manziŋ bohòbù ηgàa jìŋ nə sə tesə yà'. Luk à còm bə maŋgəŋgèeŋ sè Jisòs à sə gùhù sə. Yi à còm bə ηgàa fàak sè nà' à swèkfis yà'a sè'. Yi à còm məm̀və'nə Jisòs à sə fi'gè duk bə bùu sè wo à sə bèŋgè yi fana yi sə tipsə bwìŋ də wo ye fəfuhè bùusè nzeŋgòŋ nə nè kè mè ntsə'mòk. Yi à còm sè' məm̀və'nə Jisòs à sə sègè bwìŋ ntu' bə nza' ghàk. Yi à sə yə'rə wo bə nza' gaŋ ηkum sè Nwì sə sè'.

Luk à còm ya ηga yi tsok reŋsə fa bùu sè wo à ka Jisòs bə lis ye yà'a məm̀və'nə Ntirè Nè Bèboŋ nə à yèe, ηga bwìŋ kà də wo sə jip yusə mok bə liŋ Jisos Krest sə duk. A yà'a də yi à còm bə nzak Jisos Krest ye jəŋ mvə'nə wo à dzə yi tè kə dzeŋ mvə'nə yi à lòm̀bu.

Ncèp Jisòs nè Luk à còm nə co a benə nà' də, <<M̀̀ Mo Nwè, mù a vè ηgòkè làp nə luŋsə bùu sè wo à bisə.>> (19:10).

¹ Nge' àm Tiyofilò, bwìŋ ηk̀̀uŋ a mùmsə ja'a ηgòcòm bum sè Tà Jisòs à gù m̀̀tsətsə'rèə vès.

² Wo ànə com bə ncèp nè vès ànə yuk bohòbùu sè wo à yə bum yè'sə mvəsè yà' ànə yeto, fana wo tsoho fa bwìŋ.

³ Fana Tiyofilòtà, mvèk nè mù a lap ja'a bum yè'sə bə ŋkərè nè njàm bèboŋ mvè'nè yà' à yèto, mà dzəm ŋgòcòm fa wu mvè'nè yà' ànə ye sə bə mandzè nè yà' ànə ye sə mò'fis mò'fis.

⁴ Mù sə com yè'sə ya wu riŋ tse' də bum sè wo ànə yə'rə fa wu yà'sə zìnə.

Masinjà Nwì Tsè' Də Wo Nə Dzə Jon Ngà Bàptesè Bwìŋ

⁵ Mvè'nè Heròanə ye ŋkum mvwe' lak Jùdiyà fana ŋwè nəmòk à ye mvwe' lak yà'sə nè liŋ ye à ye də Sàkàriyà. Yi à ye ŋgà fa Nwì satikà', nè sə fak bə bòp bù ŋgàa fa satikà' sè wo togè wo də Abijà. Fana liŋ ŋgwe ye à ye Alisabè. Nwà ènə à ye sè' ŋgwì bù Aròn wèŋ.

⁶ Sàkàriyà bə Alisabè à ye kèkurè mantombii Nwì, nè sə nonşə lùk mvəsè Tà Nwì à fa sə zìnə.

⁷ Wo ànə ka bwe tse' bùusè Alisabè nè à ye nzeŋ fana wo reŋ ŋkùuŋntèŋ, co wo kà mwe mok dzə.

⁸ Numbu mòk à ye mvèk kurə bohòbòp bùu Sàkàriyà ŋgòsə fàk mùmve' ndap Nwì nè ghaŋ nè fana Sàkàriyà sə gu fàak ye co ŋgà fa satikà'.

⁹ Anə geŋ wo təm bèŋ mùmve'nè wo gùgè yàwo, fana yà' zu də Sàkàriyàa ni lo mùmve' ndap Tà Nwì nè ghaŋ nè yi, nè teŋ rəmsə làmindà.

¹⁰ Yi ànə ni lo mұ ndap Nwì anə ŋgòtèŋ làmindà sə fana bwìŋ pwe' sə leŋ Nwì ma sə mbi mvè' nè wo gùgèə.

11 Fana masinjà Nwì kurə tesə və, nə kə təŋ kok bo mamək mvwe' kàm nè Sàkàriyà à sə tən fa Nwì làmindà nə. 12 Sàkàriyà ànə ye masinjà Nwì nə fana yi mərə, nə sə kaŋ bə wəə.

13 Fana masinjà Nwì nə duk fa Sàkàriyà də nà'a kà wəp. Nə tsok fa nà' də, <<Nwì a yuk pìriyà yòlan. Nə yeè nə də ŋwe yo Alisabèe nə dzə fa wu mombam. Yi dzə nà', wù to liŋ ye də Jon.

14 Mo ènə nə gu wu, wù kwa wùriŋ. Nə ye də bwìŋ ŋkùuŋ nə kwa bùusè wo dzə yi sè'.

15 Jon nə nə ye ŋwè nè ŋkùuŋ bohòTà Nwì. Yi nə kà rùuk sè guŋuŋ no. Yi nə rwiŋ bə Yòŋsè nè Rərəŋ, ye jəŋ mvək nè wo dzə yi, nə lo mantombi.

16 Yi nə gu ya bùu Izùre wèeŋ bùuŋ vè bohòTà Nwì àwo.

17 Tà Nwii nə tum lo yi mantombii yi bə nsàp yòŋsè nə ye ŋaən sè yi ànə fa Alajà. Jon nə nə gu tè' wèŋ ŋgòdzəm bwe awo. Yi nə gu bù ŋgàa loho ntu' wèŋ tsərə ŋgògà bəboŋ bə ŋkərə nè co bùu sè wo kəkurè mɛ lisè Nwì wèeŋ tsərəgèə. Yà'a mvè'nè yi gu fuhɛ nonjə fa Tà Nwì bùu ye wèŋ.>>

18 Anə geŋ, Sàkàriyà fek masinjà Nwì nə duk də, <<Aco mɛ dzəm ncèp ènə yè'sə va? Busè ves ŋwe am a rəŋ wes ba fo' lan.>>

19 Masinjà Nwì nə duk fa Sàkàriyà də, <<A mùu Gabriyà nè mɛ təŋgè mantombii Tà Nwì. Tà Nwì tum mɛ yi, də mɛ və, nə tsok fa wu ntirè nè bəboŋ ènə.

20 Nə ye də, cùu nə loho wu, wù kà cèp to, tè

kə wəs mvək nè Alisabèe nè dzə mo ànə, bəusè mà tsè' wu ntirè nè Tà Nwì nè fana wù kà nà' də a vɛ'nə zìnə dzəm, ɲga yà'a nè ye vɛ'nə ɲga mvək nè dzèeɲ.>>

²¹ Mvè'nè masinjà Nwì ànə sə tsok fa Sàkàriyà ntirè ènə fana bwìɲ sə tək yi sə ntòmbi, nè sə mərə də yi ka nènək tesə və bəu yà lɛ.

²² Yi ànə tesə və fana yi kà bohòbwìɲ mok cèp to fe'lè. Fana wo riɲ də Nwì nì tsè' fa yi yumok məmvwɛ' ndap ye nè ghaɲ nè laɲ. Mvè'nè yi ànə sə ka cù mok cep to fana yi də yi cep yumok, yi sə ni megu mok bo.

²³ Yi ànə gu wɛs fàha ye məmvwɛ' ndap Nwì nè ghaɲ nè fana yi bwi foho lo nda'à yi.

²⁴ Ànə ca megu mvək momjɔ fana ɲgwe ye Alisabè nè zəuɲ, nè sə cum swihi megu mok mɛ nda'à tètè ɲwu tàɲ.

²⁵ Alisabè nè sə duk də, <<Mvək kùrə, fana Tà Nwì nè tesè nè mɛ, nè jəɲ fis gesə lo marè'tu àm nè mà tse'gè mətsetsə'rə bwìɲ nè.>>

Masinjà Nwì Tsè' Mèri Də Nà'a Nə Zəuɲ

²⁶ Bum yè'sə ànə ye ɲga zəm Alisabèe ɲwu ntùɲfu, fana Nwì tumsə masinjà ye Gabriyà mvwe' muntòlak mòk mvwe' nzenɲòGalili nè wo togè fo' də Nazàrɛ.

²⁷ Də nà'a kə tsok fa mɛwà'ɲgwèɲ nè nà'a nè ye ɲgwe Jòsep nà'a yumok. Jòsep nè à ye ɲjàɲ bə ɲgwì bù ɲkum Devìd. Liɲ wà'ɲgwèɲ nè à ye də Mèri.

²⁸ Masinjà Nwì nè à vè bohòmo ɲwà nè, nè cepsə nà' duk də, <<Fifi ye bohòwù. Tà Nwì cu wèɲ nè, yi nè se wu ɲkàɲntèɲ.>>

29 Ntəm à tesə bisə Mèri ve'ε pwe'. Yi tsərə duk də ncèp ènə yè'sə dalε.

30 Masinjà Nwì nə duk fa fe'lə yi də, <<Mèri, kà də wu wəp duk, Nwì a ye bèboŋ bohòwù ñkùuntèn.

31 Yèè, wu nə zuuŋ, nə dzə mo ñwəmbam. Wo nə to liŋ ye də Jisòs.

32 Yi nə ye ñwè nè ghaŋ, fana liŋ ye nə ye də Nwì nè ghaŋ. Tà Nwii nə gu yi kok gaŋ tàcici ye Devìd.

33 Fana yi nə ye ñkum bùu Jàkop, sè wo sè' bùu Izùre wèŋ wo. Dzè' ñkum ye nə, nə kà kè lè yuk.>>

34 Mèri fek masinjà Nwì nə duk də, <<Mu nə zuuŋ yè'sə va, ñga mù ka ñwəmbam rì ne?>>

35 Masinjà nə duk fa Mèri də, <<Yòŋsè nè Rərəŋ nə və bohòwù, fana ñaaŋ sè Nwì nè ghaŋ nə nə ye bohòwù. Ye də wo nə to mo nè rərəŋ nè'nə də, mo Nwì.

36 Tsərə na yòo mo tè' yo Alisabè, nè wo togè yi də yi nzeŋ. Yi tse' zəm ñga'a ñwu ntùŋfu, ñga yi a rèeŋ.

37 Busè yusè co Nwì kà gù too bùè.>>

38 Mèri duk də, <<Yumok ka bup. Mu yè'sə mo fàk Tà Nwì. Nwii gu bohòmù mvəsè wù duk yà'sə.>> Fana masinjà Nwì nə me'rə Mèri, nə lo.

Mèri Ke' LòŋgòKè Cèpsə Alisabè

39 A cu momjo fana Mèri fuhù, nə lokok lo nènàk mvwe' lak mok sè yà'a mvwe' nzeŋgòn Jùdiyà, nə a fo' bə nda wùriŋ.

40 A kè dzèŋ fo' fana yi lo məmve' ndap Sàkàriyà, nə kə cepsə Alisabè.

41 Mèri ànə cepsə Alisabè nə fana mo nè ndzə vèə Alisabè nə gi tsoho nja. Mo nə à tsoho ve'nə fana Alisabè nə rwiŋ bə Yònsè nè Rərəŋ nə ŋkùuŋntèn.

42 Yi cep fa Mèri bə ŋàŋ də, <<Mèri, wu yè'e ŋwà nè Tà Nwì a sè wu mʉtsətsə'rə bəba pwe'. Yi nə se mo nè ndzə vèə wù ànə sè'.>>

43 Yi duk mali mok sè' də, <<Nè'nə yè'sə nsàp yu yà, nè də ma Tà Nwì àm vè ŋòkɛ' yə mʉ ɛ?>>

44 Mèri, mvè'nè wù cepsə mʉ fana mo nè ndzə vèə mʉ nə tsoho bə kwəkwa.

45 Nə ye də a rɛŋsi bohòwù bùusè wù a dzəm də ntirè nè Tà Nwì à tsè' fa wu nə, nə ye zìnə.>>

46 Mèri yəm fəsə fa nà' ndzənə ŋkì də, <<Ntəm am sə kùksə Tà Nwì ŋkùuŋntèn.

47 Mʉ sə kwa, bùusè yi a lùŋsə mʉ.

48 Nwì a ka mʉ swi, nə tsəm tse' mʉ ŋgà fàk ye nè jə,

Fana ye jəŋ ŋgà'a bwìŋ pwe' nə sə to mʉ də, ŋgà rɛŋsi.

49 A ve'nə bùu bum maŋgəŋgèen sè Tà Nwì nè ghaŋ nə a gù bohòmù.

Fana mʉ sə duk də, liŋ yee ye rərəŋ.

50 Yi koksəgè manziŋ bohòbùu sè wo wəpgə yi, nə ye bə ŋgwì bù awo pwe'.

51 Nwì a sà bo ye sè yà' tse' ŋàŋ,

nə be' samsə bù ŋgàa nè ni' wèŋ bə bum awo sè wo sə tsəm də wo nə gʉ.

52 Yi a susə ŋkəŋkum sè ghaŋ mʉmvwe' kapràak awo,

nə te' lokoksə bùu sè wo jəgè ni' àwo sə nze.

53 Yi a fa bùu sè njè sè ya wo bum sè bèbon
wùrin,

nə jum gesə lo ngàa ghàk wèŋ botu.

54 Yi a nəmsə yusè yi à kà' bohòtácicii avès wèŋ,
nə tesə ngàa fàak ye sè wo bùu Izùrɛ.

55 Yi à sè nìtsè' kosəmanziŋ ye bohòAbràham,
nə ye bohòŋgwì bù ye sè' nè mvèsə.>>

56 Mèri à cu bə Alisabè co ŋwɔ tɛ', fana yi bwi
foho lo la'à yi.

Wo Dzə Jon

57 Mvək ànə kɛrə bohòÀlisabè ngòdzə fana yi
dzə mombam.

58 Nge' ye bə njənjàan ye wèŋ à yuk mvè'nè
Tà Nwì à gù yi bèbon fana wo kwa yàwo sè'.

59 Mo nə ànə dzeŋ nteŋ mò'fis fana wo jəŋ və
yi ngòkom fa yi tu mbəmbam. Wo də wo nə to
fa mo nə liŋ tè' ye də Sàkàriyà.

60 Ma ye kà vɛ'nə dzəm, nə duk də, <<Liŋ mo
nə də Jon.>>

61 Wo duk fa yi də, <<Háva', liŋ njàŋ yòmòk ka
vɛ'nə yeŋ yuk.>>

62 Anə geŋ, wo gu bo ngòfek tè' ye də nà' dzəm
də liŋ mo nə nə ye də ndà lɛ.

63 Sàkàriyà duk də wo fa yi ŋwàk. Fana yi com
nja də, <<Liŋ mo nə Jon.>> Wo à mərə wes pwe'.

64 Ye jəŋ sè ghà nà'nə, fana Sàkàriyà ye ngòcèp
fe'lə cù sèmok, nə sə kwasə Nwì.

65 Wɔə à ko nge' ye wèŋ pwe', fana bùu sè wo
à cu mvwe' nda sè mvwe' nzeŋgòn Jùdiyà pwe'
à yuk bum yè'sə.

66 Ndàanwè pwe' nè yi yuk bum yè'sə à sə
tsərə, nə sə muu vəm də, <<Mo ènə nə ye nsàp

ηωè nè fòλε?>> Yà' à sè yøøη jøja dè, ηàaη Tà Nwì bohòmo ènè.

⁶⁷ Sàkàriyà tè'ε Jon à rwiη bə Yòηsè nè Røreη nè fana yi cep yusè Nwì fa yi dè yi cep. Yi à cèp dè,

⁶⁸ <<Vesùwèeη kwasè Tà nè yi Nwì bùu Izùre wèη.

Yi a vè ηgòtesè bùu ye wèη, nè fiη me'rə fis wo sənə ηgə'.

⁶⁹ Yi a fa vesùwèη ηgà gèη bwìη nè ghaη nè yi ηgwì bù ηgà fàk ye David.

⁷⁰ Yi ànə cep yè'sə taη ntèη mɯ cùhù ηgàa tsòhòbum ye sè wo bùu sè røreη.

⁷¹ Yi à kàk dè yi nè fis ves bohòbùu sè wo bèηgè ves,

nə kak dè yi nè fis ves ndzə bohòbùu sè wo dzèeηgè vesùwèη.

⁷² Yi à kàk fa tàcici avès wèη dè yi nè koksə manziη bohòwo,

fana yi nonjə rùk ye nè røreη nè yi à zɯ nə.

⁷³⁻⁷⁴ Yi à kèη bohòTàcici àvès Abrahàm gugəη duk dè yi nè fis vesùwèη ndzə bohòbùu sè wo bèηgè vesùwèη,

ya vesùwèeη kuksə yi nè kà wəp,

⁷⁵ nə sə fak bohòyi bə ntəm nè røreη nə ye kèkərè mɯ lisè yi nùumbu pwe' sè a cu.

⁷⁶ Wù mo àm, wo nə to wu dè ηgà tsòhòbum Nwì nè yi Nwì nè ghaη nə.

Wu nə sə lo mantombì Tà ηgògù tsə'rə fa yi mandzè ye nə.

⁷⁷ Wu nə tsoho fa bùu ye wèη dè yi nè swifa wo bup awo, ya ηga wo nə tse' lùη.

78 Busè Nwì àvèes ngà koksèmanziŋ nə ye ntəm fəfwèŋ.

Yi nə gɯ ves ngòyə lù nə nje nə nga nà' to tsə vè mɯ ni'ì vès co nùm,

79 nə rɛŋ tsoŋ mɯ tuhù bùɯ sè wo cu mvwe' tsətsɛŋ kɾɯ,

nga yi sə gùmsə ke' ves mvwe' mandzè nè nà' tse' fifi.>>

80 Mo nə à kuk, nə sə gɯŋ bə ngùpni' nə ye bə yòŋsè. Yi à sə cugè ngəà. Yi à cu mvwe' ànə tètè kə wes numbu nə yi kərə ngòtesə vè jəja bohòbùɯ Izùre wèŋ.

2

Wo Dzə Jisòs

(Mat. 1:18-25)

1 Mvək ànə à ye nga nkum Kaisà Agostònè mvwe' nze Rumà duk də wo taŋ bùɯ ye pwe'.

2 Mvè'nè wo à ta yèto bwìŋ vɛ'nə yè'sə, à ye nga govənonè mvwe' nze Sìriyà à ye Kwìrinòs.

3 A ye vɛ'nə, fana ndàaŋwè pwe' sə lo ngòkè còm liŋ ye mvwe' lak ye sè yi à tesə fo'.

4 Jòsep à ye'e mè'rə ye lak Nazàre mvwe' nzeŋgòn Galili, ngòlòJùdiyà mvwe' buk lak Betèrèhem, mvwe' sè wo à dzə nkum Devid. Jòsep à sə lòfo' bùusè yi à ye njaŋ bə ngwì bù nkum Devid nə.

5 Yi à lòbə Mèri nə yi à sak nà' gù, də bə nà'a kə com liŋ awo. A ye nga Mèri nə bə zəm.

6 A kè dzèŋ fo', fana mvək kərə bohòMèri ngòdzə.

⁷ Mèri dzə mo ηgwèη ye, mo ηwəmbam. Yi lim gesə nà' ndzənə cək, nə nonşə nà' sənə ηgwes nè wo fagè nàamηgòn wèη zuzɹ ca. Busè mvwe' nòon à ka bohòwo mɹmvwe' ndap nè ηkùìη wèen kə nòonηè mbwa nə yeη.

Ganakù' Wèη Və NgòCèpsə Jisòs Mvè'nè Wo Dzə Yi

⁸ Ganakùu' mok wèη à ye mvwe' lak yà'sə, sè wo à cu nòon ηgòkùk nsùngaη awo nè ndzəmè.

⁹ Mvəsè wo à cu fo' fana masinjà Tà Nwì kurə tesə və bohòwo, mareη Tà Nwì nə reη mvwe' sè wo à ye sə nèbɹp. Wo a yə vè'nə, wuə ko wo wùriη.

¹⁰ Masiñà Nwì nə duk fa wo duk də, <<Yeè, wèen kà wəp. Mù jə vè fa weη yè'sə Ntirè nè Bèbonη nè nà'a ye bohòndaanwè pwe'fo'. Ntirè nə nà' tse' kwəkwa wùriη.

¹¹ Busè numbu nè ntinè ènə, wo dzə ηgà lùñsè bwìη àwèη mvwe' lak Devìd. A yi nè yi Nkum ηgà gèm bwìη nə ye Tà sè'.

¹² Wèen nə kə ye nga wo lim mo nəmòk bə cək, nə nonşə yi sənə ηgwes, fana wèη riη də nà'a yi.>>

¹³ Wo ànə geη də wo kùk à, wo ye masinjàa Nwì vè'ε nduk, nga wo sə yəm kùksə liη Nwì bə ηkì.

¹⁴ Wo sə duk də,
<<Kəkùksəə ye bohòNwì nè yi cu mvwe' sè ghan mɹ ntòbu.
Fifi ye sə nzeηgòn bohòbùu sè yi dzəm yà'wèη.>>

15 Masinjàa Nwì sè à lògēsè lòmùbu. Fana ganakùu' sè wèṅ dūk dè, <<A bèbòṅ dè vesùwèeṅ lo-ε mvwe' lak Betèrèhem anè è, nè kè ja'a na yusè yà'a fo', sè Tà Nwì tsè' fa ves yè'sè.>>

16 Wo à lòvε'ε nènàk. A kè dzèeṅ, wo ye Mèri bə Jòsep nè ye mo nè ṅga yi nòsə ṅwesè.

17 Ganakuu' sè à yə nà' fana wo ye ṅga'a ṅgòtsòho fa bwìṅ yusè wo anə yuk bə liṅ mo nè pwe'fo'.

18 Bùu sè wo ànə yuk yusè ganakùu' sè à tsè'ə sè à mərə wes pwe' nè pwe'.

19 Mèri à ko nòṅsə bum yè'sə pwe'fo' sè vèə yi, nè sè tsərə bə zèṅ ghà yà lòṅ.

20 Ganakùu' sè à bwìṅ foho lòo, wo sə kwasə, nè sə kùksə lo liṅ Nwì, bùu yusè wo yuk nè ye sə. Yà' ànə ye megu sè' mùm vè'nè masinjà Nwì anə tsok wo sə.

Wo To Fa Jisòs Liṅ

21 A kè dzèṅ nteṅ mò'fis, mvèk kùrə dè wo kom fa mo nè tu fana wo to fa yi liṅ dè Jisòs. Yè'sə liṅ sè masinjà Nwì ànə to fa yi yà' ṅga wo ka yi ntòzùuṅ.

22 Mvèk à kùrə bohòMèri bə Jòsep dè wo gu yusè lùuk Musi sè dūk, ya ṅga wo ye yàwo mok sè' rərəṅ. Anə geṅ, wo jə lo mo nè mvwe' lak Jòrosalèm ṅgòkə nì fa yi bohòTà Nwì.

23 Wo ànə com nòṅsə ndzənə ṅwàk lùk Tà Nwì dūk dè, <<Wo nè cok nòṅsə fa Tà mo tu nè yi ṅwèmbam.>>

24 Wo à lònḡòfa satikà' nè lùuk Tà Nwì sè duk ve'nə. Yà'a yè'sə də, <<Wo fa kəkəbùḡ kè nsàp swi mòk co kəkəbùḡ nà'a ba.>>

25 Nḡwè nəmòk ànə ye mḡwwe' lak Jòrosalèm anə nè liḡ ye à ye də Saimù. Yi à ye nḡwè nè yi kəkə̀rè mḡ lisè Nwì, nə fa ntəm ye bohòNwì pwe' nè pwe'. Yi à sè tək nḡòyè ḡhà nè Nwii nə mesə fa bùu Izùre wèḡ nḡə' àwo, fana Yòḡsè nè Rəreḡ sè ye bohòyi sè'.

26 Yòḡsè nè Rəreḡ nə ànə tsok fa yi də, yi nə kà ntòkrə̀ tè yi ye Nkum nḡà gèm bwìḡ nè Tà Nwì ànə kak də yi nə tum vesə nə.

27 Yòḡsè nə ànə ḡḡ Saimù, fana yi lokok lo mḡmḡwwe' ndap Nwì nè ḡhaḡ nə. Mḡvè'nè ma bə tè'ε mo nə à jə̀ vè Jisòs mḡmḡwwe' ndap Nwì nè ḡhaḡ nḡòḡù yusè lùk sè duk,

28 fana Saimù kə le' tse' mo nə ndzə bohòyi, nə kwasə Nwì.

29 Yi à cèp də,
<<Tà, wù a ḡù yusè wù à cèep fana me'rə a mofàk yoo lo ḡesə bə fifi.

30 Bəsè nè nḡa'a nè'e mù yə̀ lù nè nḡònə laḡ,

31 nè wù à fùhḡ nònḡsə nà' mantombii bwìḡ pwe' nə.

32 Nà'a mareḡ nè nḡòni fa bù lakmḡvum wèḡ mandzè nè nḡònə,

Nə ye nḡòḡù ya bwìḡ wəp bùu Izùre wèḡ co bùu sè bwìḡ.>>

33 Bum sè Saimù à cèp sè yà' à ḡù ma mo nə bə tè'ε mo nə wo mərə̀ wùriḡ.

34 Anə ḡeḡ Saimù sè wo, nə duk fa Mèri duk də, <<Nwì a cok fis mo ènə nḡòḡù bùu Izùre

wèŋ ŋkàun də wo gbà, mok lokok. Yi nə ye co yumòk nè ŋgònìtsə' bwiŋ məm̀vè'nè Nwii fagè bwiŋ lùŋ. Megu də bwiŋ nə sə cep bup bə zeŋ.
 35 Fana tsətsərèə sə yà' cu swihi sə ntùè bwiŋ ŋkàun nə tesə və jəja. Ntəm yòo nə yaan co ŋwè sòp nà' bə fèk bùm mo nə sè'.>>

36 Nwà nəmòk ànə ye nè liŋ ye à ye də Ana. Yi ye ŋgà tsòhòbum Nwi. Liŋ tɛ' ye à ye də Fanuel. Liŋ bòp lak àwo à ye də Asè. Yi à ye ŋwà nè yi à rèŋ wùriŋ ŋga yi à cu bə ndu ye lùumŋgòn sàm̄ba.

37 Yi à cu co ŋwà ŋgwemfə lùumŋgòn hum fwame'-ncòp-kwè. Yi kà ndap Nwi nè ghaŋ nə me'rə yuk. Yi sə dzè zuzə, nə sə ləŋ piriya, nə sə kuksə Nwi nùm bə ndzəm.

38 Yi à vè fo' sè ghà nà'nə, nə kwasə Nwi. Yi sə cep bə nzak mo ènə bohòbùm sə wo à sə tək ŋgòyə də Nwii nə fiŋ me'rə bùm Jòrosalèm yà'a.

39 Məm̀vè'nè wo ànə gə wes bum sə lùuk Tà Nwi sə dzəm fana wo bwi foho lo mvwe' nzeŋgòn Galili, nè lak awo à ye fo', wo to yà' də Nazàre.

40 Mo nə à kùk, nə tse' ŋàŋ. Yi à tse' ŋkərè, fana Nwi sə sè yi sè' wùriŋ.

Jisòs LòŋgòKùksə Nwi Mə Ndap Nwi Nè Ghaŋ

41 Jòsep bə Mèri à sə cugè mvwe' lak Nazàre anə fana wo sə loho Jòrosalèm lùm bə lùm. Wo à sə lòŋgòkè zu ŋkà'a pasobà.

42 Jisòs à dzèŋ lùumŋgòn hum-ncòp-ba fana yi yuŋ Mèri bə Jòsep, wo lo mvwe' ŋkàk nə sèmok.

43 Nùmbu ñkàk nə à càa fana, wo ye ñgòbwi foho lòla'à wo. Jisòs cum mam ye Jòrosalèm anə. Fana tè' ye bə ma ye kà bə zeñ rì.

44 Wo à sə tsəm yàwo də Jisòs mənɔrə bùu sè wo sə bwi lòo sə. Fana wo gi yiskok tètè nùm co. Wo ye ñga'a ñgòlòp yi mənɔrə nənjàan awo bə ñge' awo wèn.

45 Wo kà yi yə, fana wo bwi foho lo Jòrosalèm anə ñgòlòp yi.

46 Wo lap yi tètè nùmbu nè tɛ' à ye fana wo ye yi ñga yi cu mɛ ndap Nwì nè ghan nə. A ye ñga yi cu mɛtsətsə'rəə cìcàa bùu Jus wèn. Yi sə yu'rə yusə wo sə cèp sə, nə sə fek yà'wèn bum ye sè'.

47 Bùu sè wo à yuk yusə yi sə cèp sə à mərə wes pwe' bə nsàp ñkərə nə yi à tse' ñgòcèp bəsə fa bùu sə wèn.

48 Jòsep bə Mèri à yə yi fana wo mərə wùriñ. Fana Mèri fek yi də, <<Mo àm, wu gɛ ves yè'e yà vɛ'nə ε? Ves tè' yo lap wu tètè ntum tesə lòbisə ves pwe'.>>

49 Jisòs fek yà'wèn də, <<Wèn nə sə lap mɛ də yà? Wèn nə ka riñ də mɛ tse' ñgòcu məmvwɛ' ndap Tè' am riñ à?>>

50 Wo kà ncèp nə yi cèp fa wo nà'nə rɛɛñ.

51 Anə geñ bə Jisòs wèn bwi foho lo Nazàre anə, yi sə yuk duk awo. Ma ye à ko nəmsə bum yè'sə pwe' sə ntɛà yi.

52 Jisòs à sə kuk bə ni' nə ye bə ñkərə. Bwiñ à sə dzəm yi, Nwì dzəm yi sè'.

3

TsètsòhòNè Jon Ngà Bàptesè Bwìṅ

(Mat. 3:1-17, 14:3-12; Mak 1:1-11, 6:17-21; Jon 1:19-28)

¹ Bum yè'e à ye nga Tìberiyùu ṅkum mvwe' nze Rumà yi lùumṅgòṅ hum-ncòp-tàṅ. Poṅtiyòs Palè ye ye govənòmvwe' nze Jùdiyà, fana Heròye ye ngà sak nze Galili. Moma Herònè liṅ yee Filip à sè sak ye nze Ituriyà bə Tràkòniti. Lìsaniyà à sè sak ye nze Abilin.

² Anàs bə Kayofàs à ye yàwo ṅkum ṅgàa fa satikà' wèṅ. Anə geṅ Nwì cèp bohòJon mo Sàkàriyà nga yi cu ṅgəà.

³ Jon ànə yuk fana yi lokok nə gi kə' mvwe' lak sè yà' kəəp ṅgə ndzəp Jòridàṅ yà'a. Yi à sè tsòho fa bwìṅ duk də, <<Wèeṅ kupsə, nə bwi fa bup awèṅ ṅkwèṅ, nə bəptesə, ya Nwii swi fa wèṅ bup awèṅ.>>

⁴ Izayà ṅgà tsòhòbum Nwì ànə com bum yè'sə ndzənə ṅwàk ye də,

<<ṅgì ṅwè nəmòk sè cèp torə vè sè ṅgəà, nə sè yuhu də,

<Gə tsə'rə fa Tà Nwì mandzè ye, rəṅsə tsə'rə fa yi bwe cwèe mandzè ṅgògì cà ca.> >>

⁵ Wo rwisə tsə'rə ntòn pwe', nə fak laṅsə tsə'rə nda sè' pwe'.

Gə mandzèə sè yà'a gəgorè pwe' yà'a ye rərəṅ, nə laṅsə cwèe mandzèə sè yà' ka làaṅ yeṅ.

⁶ Fana bwìṅ pwe'fo' nə ye lù nè Nwii nə fa bwìṅ.

7 Mandzè ànə loho vε'ε bə bùu sè wo ànə sə və də Jon bàptesə wo. Fana Jon duk fa wo də, <<Wèη ηgwì bù no, tsè' wen ηga'a ndà də wèen caη, nə swirə ηgə' nè Nwìi nè fa bwìη nə ε?>>

8 Wèen ηgə yusə aco yà' ni tsok də wèη bwì fa bəp awèη ηkwèη laη. Wèen kà də wèen sə tsərə də aco wèη swirə ηga wèη sə dũhũ na də, <Tàcici àvès à ye Abràham> duk. Busə mũ tsok fa wen də, aco Nwì jəη liis yè'e, nə ηgə fa Abràham bwe bə zəη sè'.

9 Yuk-a. Njàm nə nəsə kùk ηgògwè' màk tũ sə mbwè. Tũ nè fòpwe' nè nà' ka-a nto'o sè bəbɔη zəm, wo gwε' mak nà' sə nze, nə te' tɛη gesə nà' sə misə.>>

10 Bùu sè wo ànə yuk ncèp ènə fek yi duk də, <<Aco vès ηgə'a yè'sə va?>>

11 Jon tsok fa wo də, <<Nwè nè wù tse' cèək nini ba, wù fa ηwè nè yi ka mò'fis tse' mòk. Nwè nè wù tse' zuzũ, wù gapsə wen ηwè nè yi ka tse'.>>

12 Bùu sè wo à ye ηgàa ko mbàam tas mok à vè, duk də Jon bàptesə wo. Wo fek Jon nə də, <<Cicà, vès ηgə va?>>

13 Yi tsok fa yà'wèη də, <<Kà də wèen jəη casə fe'lə mbàam ηwè nəmòk bə mfip duk.>>

14 Sojàa mok wèη à vèə, nə fek yi sè' duk də, <<Vès yàvès ε? Vès nə ηgə va?>> Jon tsok fa yà'wèη duk də, <<Kà mbàm ηwè nəmòk bə ηàη fep jə, nə kà ηwè nəmòk wà na'tse'. Mbàam ηwũ àwèen kèkurè bohòwèη>>

15 Bwìη ànə sə kùk Nkum ηgà gèm bwìη nè Nwì à kàk də yi nə tum nə, fana wo à yə Jon, wo

ye ηγòtsərə də kàmòk a yi nə àlɛ.

16 Yi duk fa yà'wèŋ duk də, <<Mù sə baptesə mègù weŋ yàm bə ndzəp, nə yeè nə də, ηwə nəmòk nè yi yam càsə mɔ nə və, nè mù ka kəkərè ηgòfirə fa yi kùŋgùup ye yeŋ. Yi nə baptesə weŋ bə Yòŋsè nè Rərəŋ, nə ye bə mis.

17 Yi tse' wàam nzaŋ ye ndzə bohòyi ηgòcis nzaŋ bə zeŋ. Yi nə cis wes nzaŋ sə, nə nəm sə yà' mɔ tapə, nə teŋ dzədzəə sə sə mvwe' mis nè nà'a kà liigə.>>

18 Jon à sə tip ke' bwìŋ bə mandzè zəzok məm vè'nè yi sə tsòho fa wo Ntirè nè Bèboŋ nə.

19 Yi à cèp bohòŋkum Heròsè' də nà' gù bɔp wùriŋ bùusè nà' ànə jəŋ Hèrodiyà nè yi à ye ηgwe moma ye Filìp. Herònə à gù bum mok sè yà' à bɔp sè'.

20 Yi ànə gɔ fe'lə yumòk nè nà' bɔp càsə cù sè'. Yu nè yi ànə gɔ nə, à ye də yi à ko lok Jon mɔ ndapndzəmè.

21 A ye ŋga Jon bàptesə mè bwìŋ pwe', fana Jisòs və, Jon baptesə yi sè'. Jisòs ànə sə gɔ piri yà fana ntòbu muhu to.

22 Fana Yòŋsè nè Rərəŋ tsoŋ mɔbu co kəkəbàŋ. Nwì cèp vesə mɔbu duk də, <<Wù mɔ àm nè mù dzəm wu sə ntɔ̀̀ mù. Mù kwa bohòwù wùriŋ.>>

*Tàcicii Jisòs
(Mat. 1:1-17)*

23 Jisòs à yèto fàak ye nga yi co lùumηgònη hum tɛ'. Tàcicii ye à ye m̄m̄vè' nè'e.*

24-38 Adàm nè ye mo Nwì. Set ye mo Adàm.

Enos ye mo Set. Kàyinàn ye mo Enos.

Màhalalì ye mo Kàyinàn. Jarè ye mo Màhalalì.

Enòk ye mo Jarè. Mètuselà ye mo Enòk.

Lamèk ye mo Mètuselà. Nuà ye mo Lamèk.

Shem ye mo Nuà. Arfasà ye mo Shem.

Kàyinàn ye mo Arfasà. Shelà ye mo Kàyinàn.

Ebà ye mo Shelà. Pelèk ye mo Ebà.

Ru ye mo Pelèk. Serù ye mo Ru.

Nahòye mo Serù. Terà ye mo Nahò.

Abràham ye mo Terà. Azìk ye mo Abràham.

Jàkop ye mo Azìk. Judà ye mo Jàkop.

Perè ye mo Judà. Hɛsrònη ye mo Perè.

Arnì ye mo Hɛsrònη. Adimìn ye mo Arnì.

Aminadàp ye mo Adimìn. Nasònη ye mo Aminadàp.

Samònη ye mo Nasònη. Bowàs ye mo Samònη.

Obè ye mo Bowàs. Jesì ye mo Obè.

Devid ye mo Jesì. Natànη ye mo Devid.

Matatà ye mo Natànη. Menà ye mo Matatà.

Meleyà ye mo Menà. Èliyakìm ye mo Meleyà.

Jonàm ye mo Èliyakìm. Jòsep ye mo Jonàm.

Judà ye mo Jòsep. Simiyònη ye mo Judà.

* **3:23 3:23** Wo-à be'lə ngo sè 24 kə dzej 38 yè'e mvwe' mò'fis b̄usè yà' sə taŋsə tàcici wèŋ bə mandzè nè b̄ Yamba wèŋ. Ghà nè wo à còm to ŋwàk nè'e à ye nga bwìŋ sə taŋsə liŋ tàcicii awo nè sə yeto bə nè yi cu ntòŋwum, nè sə taŋ foho lo maŋkwèŋ tèè kə dzej m̄ n̄'ì tàcici nè yi-à yèto. B̄ Yamba wèŋ ta yètogè yàwo bə nè mantombi nè kə ləsə bə nè yi cu ŋwum mvè'nè vès a com yè'e.

Levi ye mo Simiyòn. Mátat ye mo Levi.
 Jorim ye mo Mátat. Èliyezè ye mo Jorim.
 Josuwà ye mo Èliyezè. Er ye mo Josuwà.
 Èlmadàm ye mo Er. Kosàm ye mo Èlmadàm.
 Adì ye mo Kasàm. Melkì ye mo Adì.
 Neri ye mo Melkì. Shèyatiyè ye mo Neri.
 Zèrubabè ye mo Shèyatiyè. Resà ye mo
 Zèrubabè.
 Joanàn ye mo Resà. Jodà ye mo Joanàn.
 Josèk ye mo Jodà. Semèn ye mo Josèk.
 Mátàtiyà ye mo Semèn. Maat ye mo Mátàtiyà.
 Nagè ye mo Maat. Eslì ye mo Nagè.
 Nahùm ye mo Eslì. Emòs ye mo Nahùm.
 Mátàtiyà ye mo Emòs. Jòsep ye mo Mátàtiyà.
 Janè ye mo Jòsep. Melkì ye mo Janè.
 Levi ye mo Melkì. Mátat ye mo Levi.
 Helì ye mo Mátat. Jòsep nè yi à ye mo Helì, yi à
 ye ηwè nè bwiη sə tsərə də yi tè'ε Jisòs.

4

Satà Mùmsə Jisòs *(Mat. 4:1-17; Mak 1:12-15)*

¹ Jisòs à bwì foho vè mvwe' ndzəp Jòridàn nga yi rwi bə Yòηsè nè Rəreη. Fana Yòηsè nə jə lo yi mvwe' səmok sə ηgəà.

² Satà nè yi ηkum ze' nə ànə mumsə yi mvwe' yà'sə nùumbu hum kwè. Mvək ànə à ye, yi kà yumok momjo zə lok, fana ηjè yaη yi nga nùumbu sè hum kwè sə mèe.

³ Satà nə cep bohòyi duk də, <<A ye-a nga wu mo Nwì, wù cep-a bohòlìs nè'e nga nà'a buη beη nga wu zə.>>

4 Jisòs duk fa nà' də, <<Wo à còm nònşə ndzənə ɲwàk Nwì duk də, <Kaco ɲwè cum megu bùu ɲàaɲ zuzɹ yeɲ.> >>

5 Satà jə lo yi mu tu nda nəmòk, nə niɲ fa yi lak sè sə nzeɲgòn pwe' kè' mò'fis.

6 Yi duk də, <<Mu nə fa wu ɲàɲ bə lak yè'sə nə ye ghàak sè fòpwe'. Nwì ànə fa yà' pwe' ndzə bòhòmù yi, nə yeè nə də, mà tse' ɲàaɲ sè ɲgòfa yà' bohòɲwè nè ntəm àm dzəm.

7 Bum yè'sə pwe' nə ye yò, ɲga wu kuksə-a mu.>>

8 Jisòs duk də, <<Cu ndzənə ɲwàk Nwì nə də, <Nwè tse' ɲgòkùksə Tà nè yi Nwì ye, nə fak megu sè' bohòyi yìyi.> >>

9 Satà jə lo Jisòs mu Jòrosalèm, nə kə tes yi mu ndùndap Nwì nè ghaɲ nə mvwe' sè yà' sap càsə. Yi duk fa Jisòs də, <<A ye-a də wu mo Nwì, wù li gbɹ tsoon mu ndùndap fɛɛɲ.

10 Yà' cu ndzənə ɲwàk Nwì də, <Nwìi nə fa masinjàa ye ɲàɲ ɲgòjə ɲkərə bohòwù.>

11 Yà' cu nja sè' də, <Wo nə kotse' wu mɹtsə bə bo awo, ya wu nə kà kù nè kù ta.> >>

12 Jisòs duk fa nà' də, <<Wo də, <Wù ka tse' ɲgòbɹə ja'a Tà nè yi Nwì yòtse'.> >>

13 Satà nə ànə mumsə wes Jisòs vɛ'nə, fana yi me'rə tse' nà' ghàr.

14 Fana Jisòs bwi foho lo mvwe' nzeɲgòn Galili. Nàaɲ Yònşə nè Rərəɲ à ye bohòyi. Bwìɲ anə yuk wes nzu Jisòs mvwe' tò'o lak yà'sə pwe'.

15 Yi a sə yə'rə bùu sə mɹmvwe' ndap piriya bùu Jus wèɲ, fana bwìɲ pwe' sə kuksə yi.

Bùu Sè Mvwe' Lak Nazàre
Bèη Jisòs

(*Mat. 13:53-58; Mak 6:1-6*)

¹⁶ Jisòs ànə bwi foho lo mɔ Nazàre, lak sè yi ànə kuk fo'. A ye nùmbu dzè bùu Jus, yi lo mɔ ndap pìriyà, sè' mvè'nè yi ànə sè lo mantombi. Yi lokok təəη mɔtsè, nè taη ndzənə ηwàk Nwì.

¹⁷ Wo ànə fa yi ηwàk Izayà, nè yi ànə ye ηgà tsòhòbum Nwì. Yi fiη, nè muk ηwàk nè, nè ye mvwe' sè wo ànə com nja də,

¹⁸ <<Tà Nwì a fa mɔ yòηsè ye,

bùusè yi a cok fis mɔ də mɔ tsoho fa Ntirè nè Bèboη bohòbè ηgàa jìη wèη.

Yi a tum mɔ də mɔ kə tsoho fa bùu sè wo cu ndapndzəm də wo nè fis me'rə wo.

Mɔ tsok fa bù ηgàa ntwìlis wèη də wo nè ye bum səmok.

Mɔ fiη me'rə bùu sè wo cu bə ηgə'.

¹⁹ Nə tsok fa bwìη də lùmηgòη nè Tà Nwì nè kə luηsə bùu ye wèη nè vè laη.>>

²⁰ Yi ànə taη mesə ve'nə fana yi lok nà', nè fa nà' bohòηwè nè yi tēsəgè mɔmvwe' ndap pìriyà nè, nè cum tsoη nze, nè ye ηgòtsòho. Bùu sè wo ànə ye mɔmvwe' ndap pìriyà nè wèη à sə kək tse' mègù mok yi.

²¹ Yi ye ηgòtsè' fa bùu sə də, <<Yusè yà'a ndzənə ηwàk Nwì sə bùuη vè ntinə zìnə mɔmvè'nè wèη yuk ηga mù ta ye'sə.>>

²² Bwìη à kwa bohòyi, bə lèlum ncèep sè yà' à sə tesə kə cùhù yi. Wo sə fe'rə də, <<Nè'e ka mo Jòsep ye àlε?>>

²³ Jisòs duk fa wo də, <<Mù rinj də wèen nə mak fa mu gbə' nè'e də, <Ngà ncəp, gəŋsə-a ni' yò.> A yà'a də, <Wu gù bum sè vès a yuk də wù a sə gù yà' mvwe' lak Kàpanùm yà'a, mu ntòla'à wù fəen sè'.> >>

²⁴ Yi duk fa fe'lə wo də, <<Mù sə tsè' fa wenj nə zìnə də, bùu sè mu ntòlak kà ngà tsòhòbum Nwì nè yi tesə sè' mvwe' ntòlak ànə co yumok jəgè.

²⁵ Mù sə tsè' fa wenj zìnə də, ghà nè Alajà à cu fo' nà'a, bàa yepmfə à ye mvwe' lak Izùre ŋkùəŋntèn. Mvək nè mbùŋ à sə kà ligè mənə luumŋgòŋ tɛ' bə bwes fana, njè ko nzenjòŋ nə pwe'.

²⁶ Nwì ànə ka Alajà bohòbàa yepmfə avès ŋgòfa yi zuzə sè' tum, yi à tum lònà' bohòŋwà ŋgwemfə nè mvwe' lak Zarefà nè mvwe' nzenjòSidòn.

²⁷ Ngàa kuturu ànə ye mvwe' lak Izùre sè' ŋkùəŋntèn məm̀vək nè Alasà ànə cum fo' nà'a. Fana yi ànə ka ŋwè avès nè mò'fis gəŋsə, yi à gəŋsə mègù Namàn nè yi ŋwè Sìriyà.>>

²⁸ Bùu sè wo ànə ye məm̀mvwe' ndap pìriyà anə, à yuk bum sè Jisòs à cèep fana ntəm cəp wo nèbɛp.

²⁹ Wo lokok, nə soŋ dapsə fis m̀ntòlak anə, nə jəŋ lo yi mu tu nda nè wo a ci lak awo mbwa, ya wo dusə mak tsoŋ lo yi sə bamè anə.

³⁰ Fana yi swɛ'ɛ tesə ndzə bohòwo anə, nə gi ca m̀tsətsə'rəə wo anə nə lo yuyə.

*Jisòs Bɛ'fis Yòŋsə Ze' Ndzə Nì'ì Nwè Nəmòk
(Mak 1:21-28)*

31 Jisòs à lòmvwe' lak Kàpanùm nè mvwe' nzenḡòGalili, fana yi sè yè'rè bwìḡ fo' nùmbu dzè.

32 Wo à mərə pwe', bùsè ncèp nè yi à sè cèp nè, à ye nsàp nè nje zok bə ḡàḡ.

33 Nwè nəmòk ànə ye mü ndap pìriyà anə, nè yi à tse' yòḡsè ze' ndzə ni'ì yi. Yi cèp torə fis bə ḡàḡ duk də,

34 <<Hàva', Jisòs nè mvwe' lak Nazàre, wù tse' yà vesùwèḡ nɛ? Wù vè yè'sə ḡòzə ves à? Mù riḡ wu bəboḡni, wu mo Nwi nè wu rərəḡ nə.>>

35 Jisòs ḡhamsə yòḡsè nə, nə duk fa yi də, <<Lok cùu yò, nə ca tesə ndzə ni'ì ḡwè ènə.>> Ze' nə bwi' mak ḡwè nə sə nze, nə tesə ḡesə lo, nə kà yi yumok ḡà.

36 Bwìḡ à mərə ḡkùḡḡntèn, nə sə fe'rə kè'ca də, <<Hàva', yè'sə yà ve'nə ɛ? Nwè nè'e sə cèp bə ncèep sè yà' tse' ḡàḡ, fana yòḡsè ze' sə tesə ndzə ni'ì bwìḡ.>>

37 Fana nzu bum sè Jisòs à ḡà yè'sə yuhu lo mvwe' nzenḡòànə pwe'.

*Jisòs ḡḡḡsə ḡḡà Yiyāḡ ḡkùḡḡntèn
(Mat. 8:14-17; Mak 1:29-34)*

38 Jisòs à mè'rə mü ndap pìriyà anə, nə lo mü nda'à Saimù. A ye ḡḡ mali Saimù nə sə ya yiyāḡ wùriḡ. Fana wo tsok fa Jisòs bə zèḡ.

39 Yi lo kə təḡḡ ḡḡ kèè nà', nə cèp bohòyiya nə. Yiya nə à mè'rə yi ḡhà nà'nə. Yi lokok, nə lap fa wo zuzə.

40 Nùm à co, fana bùḡ sè wo à tse' ḡḡe' awo sè wo à tse' yiyāḡ zok zok jə və yà'wèḡ bohòJisòs. Yi jwèḡ wo bə bo ye, fana yiyāḡ awo me.

41 Yòḥsèə ze' wèḅ à sə tesə ndzə ni'i bwìḅ ḅkùḅḅntèḅ, nə sə cep sa'rə də, <<Wu mo Nwì.>> Jisòs għamsə yà'wèḅ də yà'wèḅḅ kà cèp, bùḅsə wo ànə riḅ də a yi Nkum ḅgà gèḅ bwìḅ nə Nwì ànə kak də yi nə tum və nə.

Jisòs Tsòho LòNzak Nwì Mvwe' Nzenḅòn Galili Pwe'
(Mak 1:35-39)

42 Tsok à reḅ, Jisòs me'rə ntòlak nə, nə lo mvwe' səḅok yìyi. Bùḅ sə wèḅ ye ḅḅòláp yi. Wo ànə ye yi fana wo lap mandzə ḅḅòḅḅ də yi kà lò.

43 Yi dək fa yà'wèḅ də, <<Mù tse' ḅḅòtsòho lòNtirə nə Bèboḅ nə nà'a bə ḅaḅ ḅkum Nwì nə mvwe' buhu lak mok sè'. Bùḅ yà'a yusə Nwì a tum mu də mu ḅḅ sə.>>

44 Fana yi sə tsoho ke' lo mənə ndap pìriyà wèḅ mvwe' nzenḅòn Jùdiyà nə pwe'.

5

Jisòs To Bù Ngàa Fàak Ye
Sə Mantombi Kwè
(Mat. 4:18-22; Mak 1:16-20)

¹ A ye nùmbu mòk ḅḅa Jisòs tə ḅḅḅ tèm Jènesarè fana bwìḅ kə rwiḅ fo' vè'ε fak fak. Bwìḅ sə nik kḅəp lo ḅḅḅ ni'i yi, ḅḅòyuk ncèp Nwì.

² Jisòs ye ḅḅa ḅḅwes tə ḅḅḅ tèm anə ba ḅḅa ḅḅàa ko fuk wèḅ ànə tes yà', nə lo ḅḅòcùk ram awo.

³ Yi ni lo sənə ḅḅwes nə Saimù ànə tse' nà' yi, nə dək nà' də nà'a bwi' ḅesə ḅḅwes nə mvwe'

ηγυ ndzəp nə momjo. Fana yi cum ca, nə sə yə'rə bùu sə.

⁴ Yi à mèsə yəyər'rə nə fana yi duk fa Saimù də, <<Bwi' lo ηγwes nə mvwe' sè ndzəp nə cəco ya wəη ηge' yòo gesə ram sə ndzəpə, nə ko fuk.>>

⁵ Saimù duk fa yi də, <<Tè', vès fuk nòoη tè tsok rəη vès kà fuk nè mò'fis ko. Fana bùusè wù cèp vè'nə, mü nə mak gesə ram nə sə ndzəpə anə.>>

⁶ Wo ànə mak gesə ram nə sə ndzəpə anə, nə ko fuk vè'ε nèbup, ram nə ye ηgòtiη.

⁷ Fana wo bak gesə lo fa ηge' awo sè bə ηγwes mòk nə bo, də yà'a və kə tēsə wo. Wo və, nə rusə ηγwes awo sə bə fuk fana yà' ye ηgòcəəη lèsə ndzəpə.

⁸ Saimù ànə yəη nsàp fuk nè wo anə ko fana yi gbə təəη bə tumfərə kù mantombiì Jisòs, nə duk fa nà' duk də, <<Dù lo yuyo, Tà, bùusè mü ηwè nè mü rwiη bə bup.>>

⁹ Saimù bə bùu sè wo ànə ko nsàp fuk nè'nə ànə mərə vè'ε nèbup.

¹⁰ Fana ηge' ye wèη Jem bə Jon, bwe Zebèdi ànə mərə sè'. Jisòs tsok fa Saimù duk də, <<Kà wəp, ye jəη ηga'a wu nə kà fuk mok ko, wu nə sə ko jə və fa mü bwìη.>>

¹¹ Bùu sə bwi' lo ηγwes sə ndzə ηγυ ndzəp anə, nə mak noηsə yà' məmve' anə, nə bè'lo Jisòs.

*Jisòs Mèsə Fa Ngà Kuturu Yiya Ye
(Mat. 8:1-4; Mak 1:40-45)*

¹² Jisòs ànə cum bə lak mok fana ηwè ηgà kuturu ye yi ηga yiyaη nə à wes yi vè'ε pwe' nè

pwe'. Yi ye Jisòs, fana yi gbɛ bu'rə kù mantombii nà', nə lɛŋ nà' də, <<Tà, a bò-a wu co wù tɛsə mɛ na, wù gɛ fa mɛ yiya àm nè'e me.>>

¹³ Jisòs fis bo, nə jwɛŋ nà' bə zɛŋ, nə duk də, <<Mù dzəm laŋ, yiya yònə nà'a me.>> Yiya ye nə à mè mègù fo' sè' ghà ànə.

¹⁴ Jisòs tipsə yi də, <<Nə kà ɲwè nəmòk tsè' fa, du mvwe' ɲgà fa satikà' ya yi nə kək ja'a wu, fana wù fa fəfa mvè'nè Musi ànə duk ɲgònì də yiya nə mè laŋ.>>

¹⁵ Fana nzu nè də Jisòs gù yu yè'sə yuhu lo ɲkùɛŋntɛŋ, maŋgòn tɛsə və ɲgòyuk bum sè Jisòs à sə tsòho, nə ye ɲgòfɛk yi də nà'a mesə fa wo yiyaŋ awo.

¹⁶ Fana yi sə loho yuye ɲgəà kəkè' ɲgòlɛŋ pìriyà.

Jisòs Gɛŋsə ɲwè Nè

Yi A Bù'rə

(Mat. 9:1-8; Mak 2:1-12)

¹⁷ A ye nùmbu mòk ɲga Jisòs sə yə'rə fa bwiŋ ncɛp Nwi, fana bùu Faràsi bə bùu sè wo yə'rə fagè bwiŋ lùuk Nwi à ye mɛtsətsə'rèə wo. Wo ànə tɛsə və pwe' mvwe' nzeŋgòn Galili, Jùdiyà, bə ntòlak Jòrosalèm. Nàaŋ Tà Nwi à ye bohòJisòs ɲgòmèsə yiyaŋ.

¹⁸ Bùu səmòk bək və ɲwè nəmòk mənə dak, nè yi à tse' yiya nè nà'a bù'rəgè bwiŋ. Wo lap mandzè ɲgònisə lo yi mɛ nda'à anə mantombii Jisòs.

¹⁹ Bɛsè maŋgo bwiŋ à ye wùriŋ fana wo kà mandzè ɲgòjə lòyi mbwa tse'. Wo bək kok lo ɲgà yiya nə mɛ ndùndap, nə cok tosə mvwe' sè

Jisòs tē sē, nē le' gesē tsoŋ ɲwè nē kù mantombii Jisòs mātsetsə'rèə bwìŋ anə.*

²⁰ Jisòs à yə də wo tse' dzədzəm nē də aco yi gu yiya ɲwè nē me. Yi duk bohòŋwè nē yi kà gìgè nē də, <<Mo àm, mù swifa wu bup yo laŋ.>>

²¹ Bù ɲgàa yə'rè lùuk Nwì wèŋ bə bùu Faràsi wèŋ à yu' ve'nə wo ye ɲgòŋwùrə ke'cà də, <<Nè'nə ndà nē yi sə bupsə liŋ Nwì ε? Kaco ɲwè swifa ɲwè bup yeŋ, mègù Nwì yiìyi.>>

²² Jisòs à rì bum sè wo ànə sə tsərə sə ntùù wo ve'ε pwe', nē fek wo duk də, <<Wèŋ sə tsərə bum yè'sə sə ntùù wèŋ ve'nə bùu yà?>>

²³ Co johò gha' yè'e nē ɲgòduk də, <mù swì fa wu bup yòlaŋ>, kè nē ɲgòduk də, <Lòkok mātsetə, nē gi lo yuyo> ε?

²⁴ Fana mū nē ni fa weŋ də mùu mo ɲwè, mù tse' ɲàŋ sə nze ɲgòswifa bwìŋ bup awo.>> Fana yi duk fa ɲgà' nē yi kà gìgè nē də, <<Mù duk wu də lòkok, nē te' kà yò, nē lo la'à wù.>>

²⁵ Yi à cèp ve'nə fana ɲwè nē lòkok təəŋ kù mantombii wo ghà ànə. Yi te' lim bək kà ye, nē lo yuye mū nda'à yi, nē sə kuksə lo Nwì.

²⁶ Bwìŋ ànə mərə ve'ε ɲkùuŋntèn, nē wəp nèbup, nē kuksə Nwì duk də, <<Vès yə nsàp maŋgəŋgèŋ mòk ntinə.>>

Jisòs To Levi

(Mat. 9:9-13; Mak 2:13-17)

²⁷ Yè'sə a mè fana Jisòs tesə lo, nē kə ye Levi ɲgà ko mbàm tas mvwe' sè yi fàkgè fo'. Jisòs duk fa yi də, <<Be' və mū.>>

* 5:19 5:19 Ye Màtiyò24:17

28 Levi nè lokok, nè me'rə bum fàak ye pwe', nè be' lo Jisòs.

29 Fana Levi nè à kè gù fa Jisòs dinà nè ghan m̄ nda'à yi. Ngàa ko tas wèŋ ànə və, bə bwìŋ ŋk̄uɲntèn, nè sə zɯ zɯzɯ fo'.

30 Bùu Faràsi bə bù awo mok sè wo bù ngàa yə'rè lùuk Nwì wèŋ ànə ye ve'nə wo fek ngàa fàak Jisòs də, <<Wèŋ sə zɯ be'lə wèŋ ngàa ko tas nè ye bə bù ngàa gù bɯp wèŋ bùu yà?>>

31 Jisòs duk fəsə fa wo də, <<Bùu sè wo ka yiyaŋ tse', wo kà doktə ləpgè, a ləpgè doktə ŋwè nè yi sə yaya.

32 Fana mù a ka njo bùu sè kəkurè wèŋ vè, mù a vè ngòto bù ngàa gù bɯp wèŋ, ya wo nè kupsə ntum awo, nè bwi fa bɯp awo ŋkwèŋ.>>

*Nzak Dzè Zɯzɯ NgòKùksə Nwì
(Mat. 9:14-17; Mak 2:18-22)*

33 Bùu səmok à fek Jisòs də, <<Ngàa fàak Jon dzègè zɯzɯ kəkə', nè sə gu pìriyà, nè ye də ngàa fàak bùu Faràsi wèŋ gùgè sè' ve'nə, ngàa fàak yòsə zɯ nè sə no nùumbu pwe' bùu yà le?>>

34 Jisòs fek wo də, <<Aco wo duk fa bùu sè wo vè mvwe' sè wo sə zɯ gù də yà'wèŋ dzə zɯzɯ ŋga ndugù nè cu fo' nùumbu yà'sə à? Ka ve'nə sè yeŋ.

35 Nə yeè nè də, mvək nəmòk cu nè wo nè jəŋ gəsə lo ndugù nè, fana bùu sə nè dzə zɯzɯ mvək ànə.>>

36 Jisòs mak fa wo gbɯ' nè'e də, <<Kaco ŋwè sa jəŋ cək nini nè fi, nè te' lok cək nè zəm bə zeŋ yeŋ. A ye-a ve'nə, cək nè fi nè nè sarə ghasə cək nè zəm nè, fana yà' kà kàrè.

³⁷ Kaco ηwè nəmòk kep gesə dzè rùk sənə bès nè zəm yeη. A ye-a nga yi gù ve'nə, dzè rùk nè nè duk, nè vok bès nè, rùuk sə maha wà, bès nè bup sè' wà.

³⁸ Hai', ka ve'nə yeη, gèsə rùuk sè fi sənə bès nè fi.>>

³⁹ Jisòs duk fe'lə sè' də, <<Nwèe no-a rùuk sè zəm, fana yi nè kà ηgòno rùuk sè fi dzəm. Anə boη ghak gu yi mok rùuk sè zəm sə.>>

6

Jisòs Cèp Bə Nzak Numbu Dzè (Mat. 12:1-8; Mak 2:23-28)

¹ Jisòs à gi cà mvwe' nzum nzaη mok nga a numbu dzè. Ngàa fàak ye kúp tu nzaη mok, nè sə nuk yà' ndzə bohòwo, nè sə zü mvèəm nzaη sə.

² Bùu Faràsi səmòk fek wo də, <<Lùk avès ka də ηwèe fak numbu dzè dzəm, wèη sə kúp nzaη nga a yà'sə fàk bùu yà?>>

³ Jisòs fek wo duk də, <<Wèη ànə ka yusè Devid bə bùu ye wèη ànə gù taanη nga njè sə ya wo yuk à?>>

⁴ Yi à ni lòmü nda'à Nwì, nè jəη zuzü sè wo à jə vè ηgòkwase Nwì bə zeη, nè zü yà', nè fa bùu ye wèη yà' sè'. Wo à zü ve'nə nga lùk sə bènə də kaco ηwè zü yeη, tse'nga wu ηgà fa satikà' ηkuη.>>

⁵ Jisòs cep ləsə ncèp nè də, <<Mü mo ηwè, mü Tà bə numbu dzè nè mü.>>

*Ŋwè Nè Yi A Kpɛ
Bo Ma Mò'fis*

(Mat. 12:9-14; Mak 3:1-6)

⁶ A ye nùmbu dzè nəmòk sè', Jisòs lo mɛ ndap pìriyà ngòtsòho fa bwìŋ ncèp Nwì. Ŋwè nəmòk à ye mɛtsətsə'rə wo anə nè bo ye ànə kpɛ ma màk.

⁷ Anə ye mvək ànə bù ngàa yə'rè lùk Nwì bə bùu Farəsi sè wo à ye fo' sə kək gosə kɛ' Jisòs. Wo à sə kù' ngòko yi bə nzak də yi gù fàk nùmbu dzè.

⁸ Fana Jisòs riŋ yusè wo à sə tsərə sə ntuu wo sə, nè duk fa Ŋwè nè bo à kpɛ yi nè də, <<Lokok təəŋ və mantombi fɛɛŋ.>> Ŋwè nè lokok təə megu sè vɛ'nə.

⁹ Jisòs duk fa wo də, <<Mù sə fek yè'e wèŋ duk də, lùk àvès sə dzəm də vesùwèeŋ gu nùmbu dzè yà? Nà' sə duk də vesùwèeŋ tesə ŋwè kè a yeŋsə yi ngə' ɛ? Nà' sə duk də vesùwèeŋ gem yòŋsè ŋwè kè a mesə nà' ɛ?>>

¹⁰ Fana yi kək dzooŋ yak wo pwe', nè duk fa ngà yiya nè də, <<Nèp fis yak kwìŋ yo sə.>> Ŋwè nè à gù sè vɛ'nə fana bo ye sə gəŋ.

¹¹ Bùu sə ànə jək vɛ'ɛ wùriŋ, nè sə cep kɛ' ca mɛtsətsə'rə wo yusè aco wo ko Jisòs bə zəŋ.

*Jisòs Swè'fis Bùu Ye Mok
Hum-ncòp-ba
NgòYe Ngàa Ntum*

(Mat. 10:1-4; Mak 3:13-19)

¹² Anə ye mvək ànə fana Jisòs kok lo mɛ tu nda nəmòk, nè ləŋ Nwì. Yi ləŋ vɛ'ɛ, tè tsok rəŋ, yi kà lo dzəm.

13 Tsok à rεεη fana, yi to benə ηgàa fàak ye sə wèη mvwe' mò'fis, nə cok fis jəη bwìη humncòp-ba, nə to yà'wèη də ηgàa ntum.

14 Liη bùu sè yi à cokfis sə, à ye Saimù nè yi à fa nà' liη də Pità bə moma ye Andrù, Jem bə Jon, Filip bə Båtòlomi,

15 Màtiyò, bə Tomos, Jem mo Alfòs bə Saimù nè wo ànə to yi də Zilò,

16 Judàs mo Jem bə Judàs Iskarəyà nè yi ànə seη Jisòs.

Jisòs Tsòho Nza' Nwi
(Mat. 4:23-5:12)

17 A ye ηga Jisòs tson tesə və mu tu nda nə, fana yi kə təəη mvwe' nəmòk nè à ye fo' rəəm. Yi à ye fo' bə ηgàa fàak ye wèη ηkùuηntèη. Fana bwìη tesə və mvwe' nzenğòn Jùdiyà bə ntòlak Jòrosalèm, nə ye ntòlak Tayà bə Sidòn sè yà'a ηgə ndzəp, nə kə maη fo'.

18 Wo ànə və ηgòyuk yusè Jisòs anə sə yə'rə, nə ye ηgòlèη Jisòs də nà'a mesə fa wo yiyaη awo zok zok sè yà' sə ya wo. Bùu mok à ye fo' sè wo à tse' yònşəə ze' sè yà' sə fa wo ηgə' fana Jisòs bε'fis fa wo yà'.

19 Fana bùu sə pwe' sə lap mandzè ηgòjwè yi, bùusè ηàη ànə sə tesə ndzə ni'i yi, nə sə mesə fa wo yiyaη awo.

20 Jisòs à kùk ηgàa fàak ye, nə duk də, <<A rεηsi bohòηgàa jìη wèη, bùusè tse' gaη sè Nwi nsàap bùu yè'sə.

21 A reŋsi bohòbùu sè nɛ̀ sɛ̀ ya wɛ̀ŋ ɲa'a, bùusè wèɛ̀ŋ nɛ̀ ze' ntsə'mòk. A reŋsi bohòwèŋ sè wèŋ sɛ̀ wa ɲa'a bùusè wèɛ̀ŋ nɛ̀ ywì ntsə'mòk.

22 A reŋsi bohòwèŋ sè bwìiŋ nɛ̀ beŋ wɛ̀ŋ, nɛ̀ sɛ̀ be' wɛ̀ŋ, nɛ̀ yak wɛ̀ŋ, nɛ̀ cɛ̀p bum sè bɛ̀p bohòwèŋ bùu mù nɛ̀ mù mo ɲwè.

23 A ye ɲa wo gù wɛ̀ŋ vɛ̀' nɛ̀, wɛ̀ŋ kwa, nɛ̀ sɛ̀ kaŋ dzeŋ, bùusè wèɛ̀ŋ nɛ̀ tse' lèlà' mùbu ɲkùuŋntɛ̀ŋ. Wèɛ̀ŋ riŋ sè' dɛ̀, tàcicii bùu yè'sɛ̀ wèŋ ànɛ̀ gu ɲgàa tsòhòbum Nwì wèŋ sè' vɛ̀' nɛ̀.

24 <<Fana anɛ̀ bɛ̀p wesɛ̀ bohòwèŋ ɲgàa ghàk vɛ̀'ɛ̀ wùriŋ, bùusè wèŋ a yuk wes lùm ma ɲjàwèŋ laŋ.

25 Anɛ̀ bɛ̀p bohòwèŋ sè wèŋ cu ɲa'a zɛ̀zɛ̀', bùusè ɲjèe nɛ̀ yaŋ wɛ̀ŋ ntsə'mòk. Anɛ̀ bɛ̀p bohòwèŋ sè wèŋ sɛ̀ ywì ɲa'a, bùusè wèɛ̀ŋ nɛ̀ tɛ̀' nɛ̀ waŋ nùmbu mòk.

26 Anɛ̀ bɛ̀p bohòwèŋ sè bwìiŋ pwe' sɛ̀ gèŋ to liŋ awèŋ bèbɔŋ, bùusè yà'a sè' mùmvè'nè tàcici awo wèŋ à sɛ̀ gèŋ liŋ bù ɲgàa mɛ̀wès sè wo à duk dɛ̀ wo ɲgàa tsòhòbum Nwì sè' vɛ̀' nɛ̀.

Dzəm Bùu Sè Wo Bèŋgè Wu

(Mat. 5:43-48, 7:1-5, 12)

27 <<Nɛ̀ yeè nɛ̀ dɛ̀, mù sɛ̀ cèp bohòwèŋ sè wèŋ sɛ̀ yuk yusè mù sɛ̀ cèp yè'e dɛ̀, dzəm bùu sè wo sɛ̀ bèŋ wɛ̀ŋ, nɛ̀ sɛ̀ gu bèbɔŋ bohòbùu sè wo sɛ̀ dzèeŋ wɛ̀ŋ.

28 Wèɛ̀ŋ se bùu sè wo sɛ̀ yak wɛ̀ŋ, nɛ̀ lɛ̀ŋ fa bùu sè wo sɛ̀ fa wɛ̀ŋ ɲgə' pìriyà.

29 A ye-a ɲa ɲwè nɛ̀mòk sam wu mbumbuk, wù tse' fa yi mamòk yi lɛ̀p sè'. A ye-a ɲa ɲwè

nəmòk fep jə cək yò, wù me'rə yi fep jəŋ cək yònè ndzə tsətsə'rè sè'.

³⁰ Fa ndàaŋwè pwe' nè yi ləŋ yumok bohòwù. A ye-a ŋga ŋwè nəmòk jə yumok sè yà'a sè yò, wù kà də wu fek yi ŋgòfa fəsə wu yà' duk.

³¹ Məm̀vè'nè wù dzəm də bwìiŋ gũ fa wu fana wù gũ fa wo sè' vɛ'nə.

³² <<A ye-a ŋga wù dzəm bùu sè wo sə dzəm wu, Nwii nə kwasə wu bùu yà? Bùu sè bup wèeŋ dzəmgè sè' bùu sè yà' dzəm wo.

³³ A ye-a ŋga wù gù bəboŋ bohòŋwè nè yi gùgè wu bəboŋ, Nwi se wu bùu yà? Bùu sè bup gùgè sè' vɛ'nə.

³⁴ A ye-a ŋga wù fəsə fa mègù bùu sè wo nə fəsə fa wu, Nwii nə kwasə wu bùu ya? Bùu sè bup wèeŋ fəsə fagè bùu sè bup mok sè', də ya wo nə tse' fe'lə yà' maŋkwèŋ.

³⁵ Wèeŋ dzəm lɛ bùu sè wo sə bèŋ weŋ, nə gu wo bəboŋ. Fosə fa wo, nə kà yà' fek fəsə. Ya wu nə tse' lələ' mubu ŋkùuŋntèŋ, wù ye sè' mo Tà Nwi nè yi Nwi nè ghaŋ nə. Nwii gùgè ye bəboŋ bohòbùu sè wo kà yi kwasəgè nə ye bù ŋgàa ŋkùu' wèŋ sè'.

³⁶ Wèeŋ sə koksə manziŋ bohòbwìŋ məm̀vè'nè Tè' awèeŋ koksəgè manziŋ sè'.

³⁷ Fana kà də wèeŋ sak ŋwè nəmòk duk, ya Nwii kà weŋ sè' sak. Wèeŋ kà ŋwè nəmòk gù bupsə ya Nwii kà weŋ bupsə. Swifa bwìŋ ya Nwi nə swifa weŋ sè'.

³⁸ Fa, ya ŋga Nwii nə fa wu sè'. Wo nə fa wu bo dak, ŋga wo beŋ yà', nə tsərə be'lə mvwe' mò'fis, mamòk kɛ'ɛ lo nze, wù kà mvwe' nè ŋgònəmsə

tse'. Mvè'nè wù fuk fa bwìṅ fana wo nè fuk fa wu yòsè' ve'nə.>>

³⁹ Anə geṅ fana Jisòs mak fa wo gbù' mòk də, <<Kaco ṅgà ntwìlis niṅ fa ṅgà ntwìlis mok mandzè yeṅ. A ye-a ṅga ṅgà ntwìlis nè gū ve'nə, wo nè gbù ni sə wərè wo ba fo'.

⁴⁰ Kaco mo nè yi sə yə'rə fàk riṅ casə ṅwè nè nà' sə yə'rə yi nè yeṅ. Yusə də, a ye-a ṅga ṅwè nè yi sə yə'rə fàk mèsə, yi nè riṅ kūrə megu co ṅwè nè nà' à yə'rə yi nè.

⁴¹ Njo nè wu kùkgè mɔjɛp nè jo nè nà' cu mɔ lisè moma yo, nè swi də bès tɔ nè ghaṅ cu mɔ lisè wùu yè'e bùu yà?

⁴² Kènə aco wù duk fa to moma yo mòk də, <Tse' vèsə lis ya mɔ fis fa wu mɔjɛp nè mɔ lisè wù> nà'a, ṅga wù sə kà ṅkwàṅkwà bès tɔ nè mɔ lisè wù nà'a yə anə va? Wù ṅgà tè'èṅkup, fis to le ntòjɛp nè ghaṅ mɔ lisè wù nà'a ṅkuṅ ya wu nè tse' mandzè nè ṅgòyè rì nè jo nè nà' cu mɔ lisè moma yo nè.

Tu Bə Nto'o Ye
(Mat. 7:16-27; 12:33-35)

⁴³ <<Kaco tɔ nè bəboṅ zəm nto' nèbɔp yeṅ, nè ye sè' də, kaco tɔ nè bɔp zəm nto' nè bəboṅ sè' yeṅ.

⁴⁴ Bwìṅ nè riṅ tɔ bə nsàp nto' nè tɔ nè sə zəm. Kaco wù kwìṅ lèmu' mənə ntwìnènɛ' yeṅ, nè ye də, kaco wù kwìṅ pià mənə tɔ nàk sè' yeṅ.

⁴⁵ ṅwè nè bəboṅ cɛp fis kokgè ncèp nè bəboṅ bùusè ntum ye bəboṅ. ṅwè nè bɔp cèp fis kokgè ncèp nè bɔp bùusè ntum ye bɔp. A ve'nə bùusè

cùu ηwèe cep fis mègù yusè yà' rwiη cu sè ntùè ηgèηgàη.

⁴⁶ <<Wèeη togè mɛ də Tà, Tà, nə kà bum sè mù sè duk də wèeη gɛ gù bùu yà?

⁴⁷ Nwè nè yi vè-a bohòmù, nə yuk yusè mù sè cèep, nə non̄sə yà', fana mɛ tsok fa weη nsàp ηwè nè yi ye nə.

⁴⁸ Yi co ηwè nè yi dzəm ηgòci ndap, yi tuη lo sè nze cəco, nə kə yeto kùmndap sè mənə līs. Fana ndzəp rwiη, nə bwi' ndap nə, nà' kà tsòhò, bùsè yi a ci kùmndap nə bèboη.

⁴⁹ Fana ηwè nè yi yuk-a ncèp àm, nə kà yà' nòηsè, ye də yi co ηwè nè yi à ci ndap ye sè nze wà, nə kà kùmndap bom. Fana ndzəp à rwi, nə bwi' ndap nə, nà' gbɛ ghà ànə. Ndap nə à gbù nsàp nè co wù kà cèp to.>>

7

Jisòs Bə Nkum Sojà Nè Nwè Lakmɔvum (Mat. 8:5-13)

¹ A ye ηga Jisòs cèp mèsə bum sè yi à tse' ηgòcèep ηga bùu sè sè yuk fana yi lo mɔwe' lak Kapanùm.

² Nkwà' ηwè sojà mòk nè mɔwe' lak Rumà à ye fo' nè yi à tse' ηkwèη ye mòk nè yi à dzəm nà' vɛ'ε wùriη. Mòηkwèη ye nə à sə ya vɛ'ε co yi kpɛ li.

³ Anə geη yi yuk nzu bum sè Jisòs à sə gùu, fana yi tum lo ηkwàha bùu Jus mok wèη də yà'a kə duk Jisòos və kə gɔηsə ηkwèη ye nə.

4 Wo à lòn, nè kə lɛŋ gbərə Jisòs. Wo duk fa yi də, <<Ŋwè ènə kùrè co wù tɛsə yi,

5 bùusè yi dzəm bùu lak avès ŋkùuŋntɛŋ, nè ci fa ves ndap pìriyà avès sè'.>>

6 Fana Jisòs bə yà'wèŋ lo. A kə kɛəp vè mvwe' ndap sojà nè, fana nà' tumsə ŋge' ye mok wèŋ də yà'a kə duk fa Jisòs də, <<Tà, kà də wu ye ŋgə' ŋgwàŋ duk. Mù ka kəkùrè co wù kə ni mɛ nda'à mù yeŋ.

7 Yà'a yusè yà' gù ŋkuŋ mù kà bohòwù mù bə tu am və sə. Cèp mègù lɛ bə cù fana ya mofàk àm nè nè luŋ.

8 Mù rì ve'nə bùusè mɛ yè'sə ŋwè nè mù tse' ŋkwàha bùu mok mantombùì mù sè mù sə yuk bohòwo sè'. Sojàa mok cu sè wo yukgə bohòmù sè' yo. Aco mù to mòk duk də, Vəə, yi və. Mù duk fa mòk də, Lòfa', yi geŋ. Nə duk fa mali mòk də, Gɛ yu yè'e, yi gɛ yà'.>>

9 Jisòs à yuk ve'nə, fana yi mərə bohòŋkwà' ŋwè nè, nè duk fa bohòbùu sè wo à yù vè yi fo' sə də, <<Mù sə tsè' fa weŋ də, a mègù-a sè mɛtsətsə'rəə bùu Izùre ma, mù ka ŋwè nəmòk fo' nè yi tse' nsàp dzədzəm nè ŋkùuŋ ènə ve'nə ye yuk.>>

10 Bùu sè ŋkwà'ŋwè sojà à tum sə à bwìŋ foho lòn, nè kə ye ŋga mo ye nè cu mok bəboŋ.

Jisòs Lòkoksə Mo Nwà Ngwemfə Mòk Mvwe' Krɛ

11 A ka sap fana Jisòs kə ni mvwe' ntòlak mòk nè wo to nà' də Neèn. Ngàa fàk ye nè ye bùu mok wèŋ ŋkùuŋ sə bɛ' lòyi.

12 Yi à kùəp vè mvwe' ncùu ŋka' lak sə, fana yi ye ŋga wo sə bèk vè vèŋ ŋwè nəmòk nè ma ye à ye ŋwà ŋgwemfə. Nwà nè'nə à tse' mègù mo nè mò'fis ènə ŋga nà'a ŋwəmbam. Bwìŋ ŋkùəŋ à vè ŋgòtsəpsə yi.

13 Tà Jisòs à yə ŋwà nə, nə koksə manziŋ bohònà' nə duk fa nà' də, <<Tsəp, kà wa.>>

14 Yi lo, nə kə jwəŋ ŋkùp nè vèŋ ŋwè nə cu ca nə. Bùu sè wo à sə bèk tse' ŋkùp nə wèŋ à foho təəŋ, fana yi duk də, <<Wà'ŋwè, mù sə cèp bohòwù də, yèə nə lokok.>>

15 Nwè nə à lòkok cu mʉtsə, nə ye ŋgòcèp cù. Jisòs jəŋ yi, nə fa yi bohòma ye.

16 Wuə à ko bwìŋ pwe' fana wo kuksə Nwì. Wo sə duk də, <<Ŋgà tsòhòbum Nwì mòk nè ghaŋ tesə mʉtsətsə'rə vesùwèŋ laŋ. A yè'sə də Nwì a vè ŋgòtesə bùu ye wèŋ.>>

17 Nzu bum sè Jisòs à gù yè'sə à yuhu mvwe' nzeŋgòn Jùdiyà nə ye lak sè yà' kùəp Jùdiyà pwe'fo'.

*Jon Tumsə Ngàa Fàak Ye
NgòFek Jisòs Yumok
(Mat. 11:2-19)*

18 Ngàa fàak Jon wèŋ ànə yuk bum sè Jisòs à sə gùu fana wo və, nə tsok fa Jon. Jon to ngàa fàak ye mok ba,

19 nə tum wo bohòTà Jisòs də wo kə fek nà' də, <<Wu yà'sə ŋwè nè wo à duk də yi nè vèə nə, kè vées sə kuk də yi cu ntòzok ε?>>

20 Wo kè dzèŋ bohòJisòs, fana wo duk fa yi də, <<Jon ŋgà bàptesə bwìŋ tum vè ves də vées kə

fek wu də, wu yè'sə ɲwè nè wo à duk də yi nè vèə nə, kè vèes kək də yi cu ntòzok ε?>>

21 A ye mēgù sè' mvək ànə fana Jisòs gũɲsə bù ɲgàa yiyɲ wèɲ ɲkũũɲntèn, nə bɛ'fis ze' ndzə ni'ì bwìɲ, nə muk lis bùu sè yà' ànə loho sè'.

22 A kè dzèen fana Jisòs duk fa wo də, <<Wèen du, nə kə tsok fa Jon yusè wèɲ yuk, nə ye sè wèɲ yə bə lis awèɲ. Bùu sè wo à loho lis wèɲ sə yə fe'lə bum sèmok, bùu sè wo ànə sə kà gígè sə gi, ɲgàa kuturu wèɲ sə gũɲ. Bùu sè wo à loho ntu' wèɲ sə yuk fe'lə bum, mù sə lòkoksə bwìɲ mvwe' kpɛ, nə sə tsoho fa ɲgàa jìɲ wèɲ Ntirè nè Bèboɲ nə sè'.

23 Nə tsok ləsə fa yi də mù duk də, rɛɲsi bohòɲwè nè yi ka məmərè sə ntũũ yi bùu mù tse' lok.>>

24 Ghà nè ɲgàa fàak Jon sə à bwì foho lòfana Jisòs ye ɲgòtsòho fa bùu sè fo' bə liɲ Jon nə. Yi sə cɛp də, <<Wèɲ ànə lo ɲgəà fa' ɲgòkè ja'a yà? A ye ɲgòkè ja'a ɲwè nəmòk nè yusè bwìɲ cèep, yi sə dzəm kɛ' gu yusè wo sə cèep sə nduk à? Ka lɛ vɛ'nə yeɲ.

25 Ye də wèɲ ànə lo ɲgòkè ye yè'sə yu yà lɛ? Anə ye də wèen kə ye ɲwè nəmòk nè yi à ni tse' cèək sè bèboɲ à? Nə yeè nə sè' də nsàp bùu sè wo nigè cèək sè bèboɲ, nə sə zɛ ghàk awo yè'sə kà ɲgəà cugè. Wo cugè ma mɛmvwe' nto'o ɲkum wèɲ.

26 Ye də wèɲ ànə tesə lo yè'sə ɲgòyə yà? A ye ɲgòkè yə ɲgà tsòhòbum Nwì à? Nj, a vɛ'nə zinə, yi yam gha' ɲgà tsòhòbum Nwì nsàp nè wèɲ rì yàwèɲ ànə laɲ.

27 Nà'a yi nè wo à còm nònɔsə bum mok ndzəno
 ɲwàk Nwì bə liŋ ye nə. Wo à còm yusə Nwì à cèp
 də,

<Nè'e masinjà àm,

mɔ nə tum gesə lo yi mantombii wù

ɲgògù fùhɔ tsə'rə fa wu mandzə.> >>

28 Fana Jisòs nə cɛp mali sòmok də, <<Mù sə
 tsə' wɛŋ də, bwe sè wo à dzə wo sə nzenɔgòŋ
 fɛŋ pwe'fo', wo ka mòk nè yi càsə Jon ntòdzə. Yi
 ye-a sè' vɛ'nə fana ɲwè nè də yi jə'rə càsə gha'
 mvwe' gaŋ ɲkum Nwì yi nə yam ghak Jon nə.>>

29 Bù ɲgàa ko tas bə bùu sè wo à ye fo' pwe'
 ànə rɛŋ bum yè'sə fana wo kwasə Nwì. Wo ànə
 kwasə Nwì də fàak sè Jon à gùu sə yà'a bəboŋ.
 Wo ànə ye bùu sè wo ànə baptesə bohòJon.

30 Fana bùu Faràsi bə bù ɲgàa yə'rə fa bwìŋ
 lùk Nwì wèŋ à bèn yusə Nwì à fùhɔ nonɔsə fa wo
 sə, bə mandzə nè də Jon kà wo baptesə.

31 Jisòs duk də, <<Aco mù fùhɔ kok ɲgwì bùu
 sè niè' yè'sə bə yà lɛ-o? Wo səsə yè'sə yà?

32 Wo yè'sə co bwe mok sè wo tə mɔ nteɛŋ,
 nə sə duk fa ɲge' awo də, <Vès yəm ɲkii sè wo
 figè ɲwàŋwè fo', wèŋ kà dzèŋ nə kà. Vès yəm
 ɲkii kpɔ, wèŋ kà mbɛŋ sè' kom lok.>

33 Mù duk vɛ'nə bùusə Jon nə ànə və ye, yi kà
 rùk sə no, nə sə dzə zuzɔ. Wèŋ à yə vɛ'nə, wèŋ
 də yi tse' yòŋsə ze' ndzə ni'ì yi anə.

34 Mùu Mo Nwè, mù a vè yàm, mù sə zɔ bɛŋ,
 nə sə no rùk sè'. Bwìŋ à yə vɛ'nə, wo duk də,
 <Wèŋ ye ɲà no jùhɔ rùk bə tà zɔ bum, kà ze'
 mòok nè'.> Wo to mɔ də ɲge' ɲgàa gù bɔp bə
 ɲgàa ko mbàam tas wèŋ.

35 Mègù də yumok kè lègè ñkuŋ bwìŋ riŋ də a bə̀boŋ kè bəp àlɛ'.>>

Nwà Nəmòk Fè'lə Fa Jisòs Làmindà

36 Nwèə Faràsi nəmòk à to Jisòs də nà'a və bə nà'a kə zɛ zɛzɛ mɛ nda'à yi, fana Jisòs lo mɛ nda'à yi anə, nə cum nze də bə yà'wèeŋ zɛ.

37 Nwà nəmòk nè yi à ye ñwà sàhà mvwe' lak yà'sə yuk də Jisòs sə zɛ zɛzɛ mvwe' ndap ñwè Faràsi anə. Yi jəŋ və ndo làmindà nè wo ywigè nà' mbàm ñkùuŋ,

38 nə kə təəŋ kok fɛ ñkwèŋ Jisòs mvwe' kùu ye. Yi ye ñgòwa, nə sə tsəp kùu Jisòs bə ndzəplis ye sə, nə sə yisə yà' bə nùəmtu ye. Yi sə kum kùu Jisòs sə bə ñgùpcù ye, ñgònitsə' də yi sə wəp nà', nə sə yok yà' bə làmindàa sə.

39 Nwè Faràsi nè yi à to Jisòs nə ànə ye vɛ'nə fana yi duk sə vəə yi də, <<Nwè ènə nə ye-a ñgà tsòhòbum Nwì, bwèrɛ yi rì də ñwà nè nà' sə jwèŋ yi ènə ñwà sàhà laŋ.>>

40 Jisòs to yi də, <<Saimù, mɛ tse' yumok ñgòtsə' fa wu.>> Saimù fek bwi ye də, <<Cicà, yusə də yà?>>

41 Jisòs də, <<Ñgà samsə fa bwìŋ mbàm mòk à tse' ñgàa kəa ba. Yi sə bɛ' ñgà kəa mòk bàam mbàm tàŋ, nə bɛ' megu mòk nə ncùhù hum tàŋ.

42 Wo kà yà' là' to, fana yi swi fa yà' ba fo'. Bohòbùu sè ba yè'sə, anə dzəm ghak yi nè fò?>>

43 Yi də, <<Mù tsəm də, a ñwè nè wo swifa yi mbàm ñkùuŋ nà'a.>> Jisòs də, <<A zìnə.>>

44 Yi buuŋ kuk ñwà nə, nə duk fa Saimù də, <<Wù sə yə ñwà nè'e nà? Mù vè mɛ nda'à wù

fɛn, wù kà mɛ ndzɔp sè wo cùkgè kù bə zɛŋ fa. Fana ŋwà nè'e cùk fa mɛ kùu sə bə ndzəplis ye, nə yisə fa mɛ yà' bə nùəmtu ye.

⁴⁵ Mvəsè wo cəpsəgè ŋwè, nə jwɛŋ yi bə ŋgùpcù yà'a, wù kà mɛ vɛ'nə sè' cəpsə. Mvè'nè yà' yè yèe, yi ka ŋgòjwɛŋ kùu am bə ŋgùpcù ye tɛŋsə.

⁴⁶ Wù ka tu am bə mve' yok fana ŋwà nè'e yok kùu am bə lāminda.

⁴⁷ Ye də mù sə tsə' wu də, bɔp sè ŋwà nè'e à gù yà' ŋkùuŋ sə, wo swifa yi yà' laŋ. Yè'sə rɛɛŋ də a vɛ'nə bùu nsàp dzədzəm nè ŋkùuŋ nè yi nitsè' ènə. Fana ŋwè nè wo swifagè yi momjo, nitsè'gè sè' dzədzəm nè momjo.>>

⁴⁸ Fana Jisòs bùuŋ duk fa ŋwà nə də, <<Mù swifa wu bɔp yo laŋ.>>

⁴⁹ Bùu mok sè wo à ye bə Jisòs wèŋ sə à yuk vɛ'nə fana wo sə cəp də, <<Nè'nə yè'sə ndà, nè aco yi swifa ŋwè bɔp ye-ɛ?>>

⁵⁰ Jisòs tsok fa ŋwà nə də, <<Mvè'nè wù fa ntəm yòbohòmù fana yà' fa wù lùŋ. Gèŋ bəboŋ.>>

8

Bèba Sè Wo A Sə Tɛsə Jisòs

¹ A cu momjo fana Jisòs bə ŋgàa fàak ye sə hum-ncòp-ba sə wèŋ à gihì kɛ' məmvwɛ' buhu lak sè yà' à ye fo' sə. Jisòs sə tsoho Ntirè nè Bəboŋ nè nà'a bə gaŋ ŋkum Nwì.

² Fana bèba səmok à sə gi bə Jisòs nə. Bèba yè'sə, Jisòs ànə bɛ'fis fa wo yòŋsəə ze' ndzə ni'ì wo, nə mesə fa wo yiyaŋ awo sè'. Mòk à ye fo'

Mèri Màdàlinà nè ze' sàm̄ba à tesə ndzə ni'ì yi nà'a.

³ Mòk à ye Jòanà nè yi à ye ɲgwe Cuzà, mofàk ɲkum Herò, nè yi à sə kùkgè lis bə ndap Herò. Sùsanà à ye sè' fo', bə bəba səmok ɲkùɲ. Wo à sə jə bum awo sè wo tse', nə sə tesə Jisòs bə ɲgàa fàak ye wèn bə zɛɲ.

Gbu' Ngà Bì Ngwii Bum
(*Mat. 13:1-23; Mak 4:1-20*)

⁴ Bwɪɲ à sə vè bohòJisòs mvwe' bòop lak zəzok, fana wo à kè màa, Jisòs cèp bohòwo bə gbu'.

⁵ Yi à cèp də, <<Ngà bì ɲgwii bum mòk à lòɲgòkè ɲwè ɲgwii bum ye. Mvè'nè yi à sə ɲwè yà' fana ɲgwii bum mok gbu' sə mandzè. Bwɪɲ sə nərə yà' bə kù, fana swɪɲ dzooɲ və, nə kə te' zə lo yà'.

⁶ Mok gbu' mvwe' lis, nə to. Mvəsè yà' à sə kùu', fana yà' yum, bùu jì ndzəp.

⁷ Mok gbu' mvwe' ndik, nə kuk. Yà' kuk bə ndik sə, fana ndik sə lim zə yà', yà' kpɛ.

⁸ Mok gbu' mvwe' nze nè bèboɲ, nə kuk, nə zəm ɲgwì co ɲkù mò'fis.>> Jisòs ànə duk wes vɛ'nə fana yi cèp torə fis bə ɲàɲ də, <<Nwè nè wù tse'-a ntu' ɲgòyuk yusə mù cèp yè'sə, wù yuk.>>

Jisòs Tsè' Rɛɲsə Gbu' Nə

⁹ Anə geɲ ɲgàa fàak ye wèn fek yi də gbu' ènə yè'sə dale?

¹⁰ Yi duk fa yà' də, <<Nwì à gù wɛɲ yàwèn ɲgòrì bum səmok bə gaɲ ye sè yà'a sèswihì bohòbùu səmok. Fana bùu sè wo yàwo sə mbiɲ,

wo sə kək nə kək, nə kà bum sə yə, wo sə yuk
nə kà rɛɛŋ.

¹¹ <<Mbwè gbɛ' nə nè'. Ngwii bum sə ncèp nè
Nwì.

¹² Ngwii bum sə yà' à gbɛ sə mandzè, a bùu
sè wo a yuk ncèp Nwì, Satà və, nə kə jəŋ gɛsə
ncèp nə sə ntɛù wo, ya kà də wo dzəm ncèp nə,
nə tse' lùŋ dək.

¹³ Mok sə yà' à gbù mvwe' lɪs, a bùu sə wo
yuk ncèp nè Nwì, nə dzəm bə kwəkwa, fana nà'
kà ŋgàŋ sə ntɛù wo sò. Yè'e bùu sə wo dzəmgè
mvək momjo, ŋga mèmumsè vèə fana wo gbɛ
gɛsə lo fo'.

¹⁴ Ngwii bum mok sə yà' à gbù mvwe' ndik
yà'a, a bùu sə wo yuk, wo cu fana bum nzeŋgòŋ
lɪm tɛ'lə tse' ncèp nə. Bum nzeŋgòŋ sə, a bum sə
ŋwè sə tsərə ŋgògù yà' nùumbu pwe', bə ntəm
nè ŋgòtse' ghàk, nə ye ntəm nè ŋgòyu' lùum
sè sənə nzeŋgònə. Yà'a bum sə yà' lɪm tɛ'lə tse'
ncèp nə fana nà' kà kùk.

¹⁵ Nə ye də, ŋgwii bum sə yà' à gbù yàwo
mvwe' nze nè bəboŋ, a ntuum bùu sə wo yuk
ncèp Nwì, fana wo ko ntəm, nə kotse' yà' cək bə
ntəm nè zìnə, nə zəm nto'.

Gbɛ' Laàm
(Mak 4:21-25)

¹⁶ <<Kaco ŋwè bwe' lam, nə fə'ə lok nà' sənə
yumok yeŋ. Kaco yi tes nà' sə mbwè kè sè' yeŋ.
Yi nə tes nà' mənə dak, ya ŋga bwìŋ ni vèə, nà'
sə rɛɛŋ bohòwo.

17 Yà' cu sè' də yumok sè yà'a sèswihì, də yà'a nə kà kè yəəŋ ka yeŋ. Yumok sè də wo fə'ə lok yà' də bwɪŋ nə kà yà' jəja yəə bùè.

18 Ye də wèeŋ sə jəŋ ŋkərè mvəsè wèŋ sə yuk bum, bùusè ŋwè nè yi tse'-a yumok, Nwii nə jo naaŋ fa fe'lə yi mok sè' ya yi tse' ŋkùuŋntèŋ. Nə ye də ŋwè nè yi ka ye yumok tse' fana Nwii nə jəŋ gesə nè momjo nè yi tsəm də yi tse' nə.>>

Jisòs Bə Ma Ye Nə Ye Bwema Ye

(Mat. 12:46-50; Mak 3:31-35)

19 Ma Jisòs bə bwema ye wèŋ à vè ŋgòkè yə yi, fana wo kà yi yə, bùusè bwɪŋ à ye fo' ŋkùuŋ.

20 Wo tsok fa Jisòs də, <<Ma yo bə bwema yo wèŋ tə sə mbiŋ, wo sə dzəm ŋgòyə wu.>>

21 Jisòs duk fa wo də, <<Ma am bə bwema am wèeŋ bùu sè wo yuk ncèp Nwi, nə gə sè' vè'nə.>>

Jisòs Gù Fəfə Nà' Təŋsə

(Mat. 8:23-27; Mak 4:35-41)

22 Numbu mòk à ye Jisòs bə ŋgàa fàak ye ni sənə ŋgwes. Yi tsok fa yà' də, <<Vesùwèeŋ to lo ndzə ŋgə ndzəp mamòk.>> Mvè'nè wo à sə lòo, fana yi dzəm lo.

23 Wo à sə lòsə ŋgwesè anə fana, fəfə nè bəp tseŋ wo, nə sə ci rwiŋsə ŋgwes nə bə ndzəp, fana nà' ye co nà'a nə cəəŋ.

24 Wo lo kə to yəmsə Jisòs, nə duk fa yi də, <<Tà, vesùwèŋ sə kɾu yè'e kɾu.>> Jisòs à lòkok mʉtsè, nə duk fa fəfə nə duk də, <<Təŋsə, kà mok cà fe'lə,>> nə duk bohòndzəp sè' duk də, <<Naaŋ yòsè' gəe'.>> Fəfə à duk gù dok, fana cì'i təəŋ fo' mok wəmm.

25 Fana yi fek yà' də, <<Kaco wèŋ dzəmtse' bohòmù yeŋ yè'sə bùu yà?>> Ngàa fàak ye wèŋ wəp, nə mərə də, <<Nè'e nsàp ɲwè nè fònè yi cèep, fəfə bə ndzəp pwe' sə yuk yi-ε?>>

*Jisòs Gũsə Ƴwè Nè Yi Tse'
Yòŋsəè Ze'*

(Mat. 8:28-34; Mak 5:1-20)

26 Wo à to tesə lònɔto ndzəp ma nja, nə kə tesə və mvwe' lak Gerasàn. Lak yè'sə yà'a ma ndzə nto ndzəp mvwe' nze Galili.

27 Jisòs tesə sənə ɲwes nə, fana yi kərə bə ɲwè nəmòk nè yi tesə mvwe' lak yà'sə ɲga nà' tse' yòŋsəè ze' ndzə ni'ì yi. A sàp ɲkùuɲntɛŋ ɲga ɲwè ènə sə gì ni' to, nə kà nda'à sə cu. Yi sə noon kə'lo mvwe' sè wo tuuŋgè bwìŋ.

28 Yi ànə ye Jisòs fana yi gbə tsoŋ sə nze ɲgə ni'ì nà', nə sə waŋ furə fis də, <<Jisòs mo Nwì nè ghaŋ, wù sə làp bohòmù yà? Mù leŋ wu də wu kà mə ɲgə' fa.>>

29 Yi à duk ve'nə bùusè Jisòs à duk fa yòŋsəè ze' nə də nà'a tesə ndzə ni'ì yi anə. Ze' nə ànə sə ci' kotse' ɲwè nà'nə kè' ɲkùuɲntɛŋ fana wo à sə kì yi bo bə kù lònŋfo' bə kwaŋ nə sə kək yi, fana yi sə sònŋ tirə yà' pwe' ze' nə sə jamsə lo yi ɲgəà.

30 Jisòs fek yi də, <<Liŋ yoo ndà?>> Yi duk də, <<Liŋ aam Bòp.>> Yi duk ve'nə bùusè ze' sə à ye ndzə ni'ì yi anə ɲkùuɲ.

31 Ze' sə leŋ Jisòs də nà'a kà wo sə mvwe' wu sè cəco* yà'a gèsè lò.

* **8:31 8:31** Yè'e mvwe' sè yòŋsəè ze' nè kè làə. A mvwe' sè Tà Nwii nè kè tàksə wo.

³² Ngùnaañ mok à ye fo' ñkùñntèn nga wo sè zu mvwe' mbwè nda mòk fo'. Fana ze' sè len Jisòs dè nà'a me'rə wo, wo kə ni ndzə ni'ì ngùnaañ sè. Jisòs dzəm fa wo.

³³ Ze' sè tesə ndzə ni'ì ngà' nə, nə kə ni ndzə ni'ì ngùnaañ sè. Ngùnaañ sè à ca du'rə tson ndzə baàn anə, nə kə gbə kpə lo wes sənə ndzəp Galili.

³⁴ Bùu sè wo à sè gùmsə ngùnaañ sè à carə lòo, nə kə tsoho fa bùu sè mvwe' lak yà'sə pwe'.

³⁵ Fana bwìñ tesə və ngòkè ja'a nsàp yu nè nà' gù nə. Wo à vè bohòJisòs, nə ye nga ñwè nè yi ànə tse' yònsè ze' ndzə ni'ì yi nə nga yi cu kok ñgə ñki'ì Jisòs, nə ni tse' cək, nə cum fe'lə bə ñkərə ye bèbon lāan vɛ'. Fana wuə ko wo nèbɛp.

³⁶ Bùu sè wo à yə bum yè'sə à tsòho fa bùu sè wo à vè yusè Jisòs gù bohòngà' ànə.

³⁷ Bùu sè mvwe' ntòlak Gerasàn wèn à wəp vɛ'ɛ, nə duk fa Jisòs dè nà'a lo gəsə fo'. Yi ni ñgwes, nə bwi foho lo yuye.

³⁸ Ñwè nè ze' à tesə ndzə ni'ì yi nə à len Jisòs dè bə nà'a lo.

³⁹ Jisòs à tum fəsə yi mañkwèn, nə tsok fa nà' də, <<Dù la'à wù, nə kə tsok fa bwìñ yusè Nwì gù bohòwù.>> Yi à lòo, nə kə tsok fa bwìñ mɛ ntòlak pwe' yusè Jisòs gù bohòyi sè.

Jisòs Gùnsə Nwà Nè Nà' Jwèn Yi Cək Nə Luṅsə Mo Jairòs

(Mat. 9:18-26; Mak 5:21-43)

40 Jisòs à to tèm nè, nè bwi foho vè fana, bòp bù nè wo à ye fo' nè à kwa ηγòyè yi wùriη, bùusè wo à sè tæk yi.

41 Nwè nèmòk à vè fo' nè wo to yi dè Jairòs. Nwè ànè ànè ye ηkwà' ηwè nèmòk mænè ndap pìriyà. Yi à yè Jisòs ntèη, yi kè gbà noon mantombii nà', nè lèη nà' dè nà'a vè mæ ndà'à yi,

42 bùusè mo ye à ye mvèk kpukpæ. Yi à tse' mègù mo nè mò'fis ànè ηga nà'a ηwàηwè. Mo nè à ye lùumηgòη hum-ncòp-ba. Jisòs à lòbè Jairòs nè fana bwìη yuη yi, nè sè bwi'lè yi nsàp nè co ndürè to yi.

43 Nwà nèmòk à ye fo' nè nduøm à sè ca yi ndzè ni'i mænè lùumηgòη hum-ncòp-ba. Nwè nè ηgòfa yi ncèp ηga yà'a me kà ye.

44 Yi à nεε vè fæ ηkwèèη Jisòs, nè jwèη gesè cù cèk nà' bè bo. Mvè'nè yi à jwèη gèsè nà' ntèη, nduøm sè tεηsè ηgòca.

45 Jisòs fek dè, <<Jwèη mæ ndà?>> Bwìη pwe' à bèèη, fana Pità duk dè, <<Masà, bwìη sè bwi'lè wu ma nè fòpwe'.>>

46 Jisòs duk dè, <<Nwè nèmòk jwèη mæ laη. Mæ yuk ηga ηàη tèsè ndzè ni'i mù.>>

47 Nwà nè riη dè kaco yi swihi yeη. Yi vè, nè sè kaη, nè bùhæ mantombii Jisòs, nè cep fis mvwe' bwìη. Yi tsok fa nà' njo nè yi anè jwèη cèk nà' nè, dè nduøm ye sè cì'i sè'.

48 Jisòs duk bohòmòηwà nè dè, <<Njè'gù, dzædzæm yònè wù tse' nè gæηsè wu laη. Dù, gèη bèboη.>>

49 Jisòs à sè duk dè yi cep mesè bè ηwà ènè

ntèn, ηwè nèmòk caη vè ηgòtsè' fa Jairòs dè mo nà' nè kpɛ laη. Dè nà'a kà cicà nè ηgə' mok ηgwàη fa yiskok.

⁵⁰ Jisòs ànə yuk vɛ'nə, yi dɛk də, <<Kà yumok wəp, tse' megu yòdzədzəm fana mo ηwà nè nè luη.>>

⁵¹ Jisòs à kè dzèη mvwe' ndap nə, yi kà dzəm də ηwè nèmòk ni yuη lo yi mɛ nda'à anə dzəm. Yi à dzəm də a ni megu Pità bə Jon bə Jem, nə ye ma bə tè'ε mo nə.

⁵² Bwìη pwe' à sə wa gùrə kpɛ mo nə. Jisòs dɛk fa wo də, <<Wèeη kà wa. Mo nə ka kpɛ, yi sə dzəmlo.>>

⁵³ Bùu sə à ywì'lə yi swee, bùusè wo à rì dè mo nə kpɛ laη.

⁵⁴ Jisòs ko mo ηwà nè bo, nə dɛk də, <<Mweη, lòkok.>>

⁵⁵ Yòηsè mo nə à bwìη foho vè sèmok, fana yi lokok kè' mò'fis. Jisòs dɛk də wo fa mo nə bəη ya yi zɛ.

⁵⁶ Ma bə tè'ε mo nə à mərə wùriη. Jisòs dɛk fa wo də wo kà ηwè nèmòk tsè' fa.

9

Jisòs Tum Bwe Fàak Ye Hum-ncòp-ba

(*Mat. 10:5-15, 14:1-12; Mak 6:7-29*)

¹ Jisòs to benə ηgàa fàak ye sè hum-ncòp-ba, nə fa wo ηàη ηgòjùm fis yòηsèə ze' pwe' ndzə ni'ì bwìη, nə mesə fa bwìη yiyaη zəzok.

² Fana yi tum lo wo ηgòtsòho lògan ηkum Nwì, nə mesə fa bwìη yiyaη.

³ Yi tip wo duk də, <<Kà yumok bə gi nè'nə jə lo': ntumbàŋ-è', bàm-è', zɔzɔ-è', mbàm-è', nə kà cèək nini ba sè' jə tse'.

⁴ A ye-a ŋga ŋwə nəmòk jəŋ wen co ŋkùŋ mɔ nda'à yi, fana wèŋ cum megu bə ndap ànə tè wèŋ me'rə ntòlak anə.

⁵ A ye-a ŋga bùu sè bə ntòlak ànə ka wen mwwe' ndap awo dzəm, mvək nè wèŋ nə me'rə mwwe' ànə, wèŋ kɛ'sə mak nəm mfəm fə kuu awèŋ fo' ŋgòni tsè' də wo à ka wen fo' dzəm.>>

⁶ Fana ŋgàa fàak Jisòs sə à gi kɛ'cà bohòbwe buhu lak sè fo' sə pwe', nə sə tsoho lo Ntirə nè Bèbɔŋ nə, nə sə gɔ mesə fa bwìŋ yiyaŋ awo pwe'.

⁷ Anə geŋ, Herònə yi à sə sak Galili yuk bum sè Jisòs bə ŋgàa fàak ye à sə gù yè'sə. Fana ŋkərè jip yi vɛ'ɛ, bùusè bùu səmok à sə cèp də, Jon ŋgà bàptəsè bwìŋ a tesə vè fe'lə mwwe' kpɔ.

⁸ Fana bùu səmok sə duk kɛ'cà yàwo də yi Alajà. Mok sə duk yàwo də ŋgà tsòhòbum Nwì mòk nè taŋ a lòkok vè mwwe' kpɔ.

⁹ Anə geŋ Heròduk də, <<Mù ànə gwɛ' cokfis tu Jon sə laŋ, ŋwə nè mù sə yuk fe'lə nzu ye yè'sə ndà lɛ?>> Fana yi sə lap mandzè ŋgòyə Jisòs nə.

Jisòs Fa Bwìŋ Ncùhù Tàŋ Zɔzɔ

(Mat. 14:13-21; Mak 6:30-44; Jon 6:1-14)

¹⁰ ŋgàa ntum Jisòs à bwìŋ vè, nə kə tsoho fa Jisòs yusè wo gùu. Fana yi jəŋ wo, nə lo mwwe' buk lak mòk nè wo to fo' də Bèsadà.

¹¹ Mvè'nə bwìŋ à rì də wo à sə lòsə, wo tesə mwwe' buhu lak sè yà' kɔɔp fo', nə yuŋ lo wo bə kù. Yi duk fa wo də wo vè bəbɔŋ, nə ye ŋgòyərə

wo bum bə gaŋ ŋkum Nwì. Yi sə mesə fa bùu sè wo tse' yiyaŋ yiyaŋ awo sè'.

¹² Mvək à cāa, ŋgāa fàak ye və bohòyi, nə duk də, <<Tà, tumsə bùu yè'sə wo lo mvwe' buhu lak nə ye nzum yà'a, ya wo lap yumok ŋgòzə, nə lap mvwe' nòòŋ sè'. Bəsə ka fəeŋ la'à yeŋ.>>

¹³ Yi duk fa wo duk də, <<Wèeŋ kək fa wo yumok wo zə.>> Wo də, <<Vès tse' mègù ntuhu brəd tàn, nə ye fuk ba. Wù dzəm də vès lo kə bupsə mbəm ŋkùuŋ, nə ywiŋ beŋ ŋgòfa wo à?>> ¹⁴ A ye ŋga bùu sè wo cu fo' à ye mbəmbam ncùhù tàn. Jisòs duk fa ŋgāa fàak ye də, <<Cumsə bùu sə sə nze bə bòp zəzok hum tàn, hum tàn.>>

¹⁵ Fana wo cumsə bùu sə sə nze bə bòp vè'nə.

¹⁶ Fana Jisòs jəŋ ntuhu brəd sè tàn, nə ye fuk sè ba sə. Yi kək gesə lis mubu, nə kwasə Nwì, nə bə'rə brəd sə, nə fa ŋgāa fàak ye də yà'a gap fa bùu sə.

¹⁷ Wo à zə wo pwe', nə ze' bəboŋ. Wo te'e benə sè yà' à bwehe cu sə kwès hum-ncòp-ba.

*Jisòs Tsè' Fa Bwe Ye Bum Sè Yà'a Nə Gə Yi
(Mat. 16:13-28; Mak 8:27-9:1)*

¹⁸ Anə ye mvək nəmòk ŋga Jisòs cu mègù bə ŋgāa fàak ye fana yi sə gə piriya. Yi fek wo də, <<Bwiŋ dukgè də mɔ yè'sə ndà?>>

¹⁹ Wo duk fəsə fa yi də, <<Bùu mok dukgè də, wu Jon ŋgà bàptesə bwiŋ. Mok duk də wu Alajà, mok duk də wu ŋgà tsòhòbum Nwì mòk nè yi à lòkok vè mvwe' kpə.>>

²⁰ Fana Jisòs fek wo də, <<Wèŋ yàwèŋ nə? Wèŋ dukgè yàwèŋ də mɔ yè'sə ndà?>> Fana

Pità cep fəsə fa yi də, <<Wu Nkum ɲà gèm bwìŋ nè Nwì ànə duk də yi nə tum vèsə nə.>>

²¹ Fana Jisòs tipsə wo bə ɲaŋ də wo kà ɲwè nəmòk tsè' fa lok.

²² Nə tsok fa yà'wèŋ də, <<Mù nè mɛ mo ɲwè, mɛ nə ye ɲə' ɲkùŋntèŋ. Fana ɲkwàha bwìŋ bə ɲgàa fa satikà' sè ghaŋ, nə ye bə bùu sè wo yə'rəgè lùuk Nwii nə beŋ mɛ. Wo nə zə mɛ, fana nùmbu nè tɛ' ye, mɛ lokok mvwe' kɛ.>>

²³ Fana yi duk fa bwìŋ də, <<A ye-a ɲga ɲwè nəmòk dzəm-a ɲgòyù lòmɛ, fana yi nə beŋ to ntòbum sè ni' ye sə dzəm yà', nə bək jəŋ ntəŋ ye nùmbu pwe' ɲkuŋ nə be' və mɛ.

²⁴ Busə ɲwè nè yi gəhə tse'-a yòŋsə ye fana nà'a nə bisə wà. Nə ye də ɲwè nè yi jə yòŋsə ye co yusə wà bùu mù fana yi nə kə tse' nà'.

²⁵ Swe'e sè ɲwèe nə tse' yà, ɲga yi tse'-a nzenḡon nə pwe'fo', nə kə bisə tu ye ɛ?

²⁶ ɲwè nè yi koksə-a marè'tu bohòmù nə ye ncèp àm, mù nè mɛ mo ɲwè fana ghà nè mɛ bwì vè bə ɲaŋ sè tè' am fa mɛ, nə ye bə ɲaŋ sè Tè' nə, bə ɲaŋ masinjàa Nwì sè rərəŋ fana, mù koksə marè'tu bohòyi sè'.

²⁷ Nə yeè nə də, mù sə tsè' fa weŋ ɲkèm duk də, bùu mok tə fəŋ sè wo nə kà kɛ tètè wo ye gaŋ sè Nwì ɲga yà' sə sak sənə nzenḡon nə.>>

Jisòs Kupsə Nsəsə Mɛ Ndahà

(Mat. 17:1-8; Mak 9:2-8)

²⁸ A cà co nùmbu fwame', fana Jisòs to jəŋ Pità, bə Jem nə ye Jon, bə yà'wèŋ kok lo mɛmvwe' nda mòk ɲgògù pìriyà.

29 Mvè'nè yi à sè lɛŋ Nwì fana nsəsè ye kupsə b̀̀u nsàp mok nè zok, fana cèək sè yi ni tse' m̀̀ ni'ì yi à b̀̀uŋ fəfop tap tap.

30 Wo ye Alajà bə Musì ŋga wo tesə vè m̀̀bu, bə Jisòs wèŋ sə taan ŋgàm.

31 B̀̀u yè'sə à tse' nsàap nsəsèə sè co mareŋ. Wo à sè cèp bə mvè'nè yi k̀̀əp ŋgògù yusè Nwì ànə dzəm, də yi nə lo mvwe' lak Jòrosalèm, nə k̀̀u.

32 A ye ŋga Pità wèŋ sə dzəmlò. Anə geŋ, wo lokok, nə ye Jisòs bə b̀̀u sè ba yè'sə ŋga wo tə fo', ŋga nsəsè ye kupsə vè'nə.

33 B̀̀u sè ba yè'sə à yè ŋgòlòo, Pità duk fa Jisòs duk də, <<Cicà, yà' b̀̀v'ε wùriŋ mvè'nè vesùwèeŋ fənə yè'sə. A ci ba'rə tes bwe duŋ fəeŋ tɛ', mò'fis nè ǹ̀jò, mòk nè Musì, mòk nè Alajà.>> Yi ànə cèp tsoŋ gù yè'sə, nə kà yusè yi sè cèp rì.

34 Mvè'nè yi à sè cèep, mbàk və kə təhə lok wo, fana wəə ko wo.

35 Fana wo yuk ŋga ŋgì mòk cèp vesə ndzənə mbàk nə duk də, <<Nè'e mo àm, m̀̀ a cok fis yi. Yusè yi cèp pwe', wèeŋ yuk yi.>>

36 Wo à yuk ŋgì ènə vè'nə, wo k̀̀ksə kɛ', nə kà ŋwè nəmòk nè zok yə, wo ye megu Jisòs ỳ̀yi. Wo à sè kà bwìŋ yusè wo à yə yà'sə ghà ànə tsòhòfa.

*Jisòs Tesə Mo Nəmòk
Nè Yi Tse' Yòŋsè Ze'*

(Mat. 17:14-23; Mak 9:14-32)

37 Tsok à rɛŋ, wo à bwi vèə, bwìŋ wùriŋ kè tseŋ yi.

³⁸ Nwè nèmòk cèp vèsə mʉtsətsə'rə bùu sə də, <<Cicà, kwəkwe', kə kək mo àm nè mù tse' mègù yi.

³⁹ Yi tse' yòņsə ze' ndzə ni'i yi, nè nà'a kogè yi. Nà'a ko yi, yi sə waņ nèbup, fana ni' gurə yi njək njək tè sə dük yi kè cùhu. Nà' sə sərə yi nè kà ngòmè'rə yi dzəm.

⁴⁰ Mù duk ngàa fàak yo də wo be' fis nà', fana wo ka nà' be' fis to.>>

⁴¹ Jisòs duk fa wo də, <<Ja'a na mvəsè wèeņ yè'sə gūgutu, wèņ ka dzədzəm sə ntùù wèņ nè co wèņ gūņsə nwè fo' tse' è. Mə nè cum geņ vesùwèņ, nè sə ko ntəm ve'nə kə dzeņ sèņ? Jəņ və fa mū mo yònə fən.>>

⁴² Mvè'nè wo à sə jə vè mo nə, yòņsə ze' nə ko yi, fana ni' gurə wes yi njək njək. Jisòs jwa yòņsə ànə, nə gūņsə mo nə, nə fa nà' bohòtè' ye nə.

⁴³ Bwiņ pwe' à mərə bə nàaņ Nwi sè wo à yə sə.

Mvè'nè wo à sə mərə ve'nə, Jisòs duk fa ngàa fàak ye wèņ də,

⁴⁴ <<Yuk yusè mū nə tsok fa weņ bəboņ. Wo nə fa mùu mo nwè ndzə bohòbùu mok.>>

⁴⁵ Bwe sə à ka bə yusè yi à cèp yè'sə rēeņ. Yà' ànə ye bohòwo sèswihì ya wo kà bə zeņ rēeņ, fana wo sə koksə wəə ngòfek rēņsə.

Nwè Nè Ghaņ Ndà?

(Mat. 18:1-5; Mak 9:33-40)

⁴⁶ A ye nga'a nga wo yè ngòfenə də nwè nè ghaņ mʉtsətsə'rə wo ndà lè.

47 Jisòs à rì yusè wo à sè tsərə sè ntùù wo bə ncèp ènə, fana yi ko lòkoksə tes mo nəmòk də nà'a kə təəŋ ŋɣə nì'ì yi.

48 Fana yi duk fa wo də, <<Nwè nè yi jə-a nsàp mo nè'nə mənə liŋ am, fana ye də yi jə yà'sə m̀. Nwè nè yi jə-a m̀, nə duk <Vè bəboŋ>, fana ye də yi sə duk bohòŋwè nè yi à tum m̀ nə sè'. M̀ sə duk yè'sə də ŋwè nè yi maŋkwèŋ bohòwèŋ pwe', yi ŋwè nè yi nè mantombi yi.>>

49 Jon à cèp bohòJisòs də, <<Cicà, vès yə ŋwè nəmòk ŋga yi bə' fis ze' mənə liŋ yò. Fana vès duk yi də yi teŋsə, bùusè yi ka mòk m̀tsətsə'rèə vès yeŋ.>>

50 Jisòs duk ye də, <<Kà də wu ɣə co yi teŋsə duk, bùusè ŋwè nè yi ka wəŋ beŋ, ye də yi cu venəwèŋ.>>

B̀̀̀̀ Sè Mvwe' Lak Sàmàriyà Mok à Bèŋ Jisòs

51 Mvək ànə kərə də Jisòs nə kpə ya yi lo m̀bu, yi ko ntəm, nə lokok bə' lo mandzè nè nà' lo Jòrosalèm.

52 Yi tum lo masinjàa mok mantombi də wo lo mvwe' ntòlak Sàmariyà, nə kə ɣə tsə'rə fa yi bum pwe' ŋkuŋ yi və.

53 B̀̀̀̀ Sàmariyà wèŋ beŋ də nà'a kà fo' noon, bùusè wo à yə də yi sə cà lòJòrosalèm.*

* **9:53 9:53** B̀̀̀̀ Sàmariyà wèŋ à sə tsəm də mvwe' sè zinə sè ŋgòkùksə Nwi fo' sə mvwe' nda mòk nè wo togè nà' də Gerazim. B̀̀̀̀ Jus wèŋ duk yàwo də a Jòrosalèm, fana yà'a yusè yà' ɣə ŋkuŋ wo kà ŋwè nè yi sə cà lòye Jòrosalèm tesè sə.

54 Jon bə Jem à yə vɛ'nə, fana wo duk də, <<Tà, wù dzəm də vées lɛŋ pìriyà ya ŋga Nwii tumse tsoŋ mis mabu ŋgòkè tèn səsə bùu yè'sə à?>>

55 Jisòs bùuŋ kək ja'a wo, nə jwa wo, nə duk də, <<Wèŋ ka nsàp yòŋsè nè wèŋ sè cèp bə zɛŋ ànə riŋ. Mù nè mɛ mo ŋwè, mù a ka ŋgòbɔpsə yòŋsè ŋwè və, mù a vè ŋgòlùŋsə wo lùŋsə.†>>

56 Anə geŋ, wo lokok, nə lo mvwe' ntòlak nəmòk.

NgòBɛ' LòJisòs Guguŋ
(Mat. 8:19-22)

57 Wo à sə lòmandzè fana, ŋwè nəmòk cɛp bohòjisòs də, <<Mù dzəm də mɛ nə bɛ'lo wu ma nè fòpwe' nè wù sə lòo.>>

58 Jisòs tsok fa yi də, <<Còp wèŋ tse' mvòk co wo cum ca, swiŋ wèŋ tse' ndap awo, fana màu mo ŋwè mù ka mvwe' sè co mɛ noŋsə tsoŋ tu am, nə nooŋ yòŋsə tse'.>>

59 Jisòs duk bohòŋwè nəmòk də, <<Mù dzəm də vesùwèeŋ lo, nə fak mvwe' mò'fis.>> Ŋwè ènə duk də, <<Tà, mɛ foho lo-a maŋkwèŋ, nə kə tuuŋ tè'làm ŋkuŋ-è.>>

60 Jisòs tsok fa yi də, <<Me'rə bùu sè wo kpɛ laŋ tuuŋ bù kpɛkpɛ awo. Bohòwù yò, dù nə kə tsok ncèp nə də ŋkum Nwii nə yè ŋgòsak sə nzeŋgòn laŋ.>>

† 9:55 9:55 Nwàak mok sè zəm cu sè wo à ka ŋgo ncèp ènə nja gesə: nə duk də, <<Wèŋ ka nsàp yòŋsè nè wèŋ sè cèp bə zɛŋ ànə riŋ. Mù nè mɛ mo ŋwè, mù a ka ŋgòbɔpsə yòŋsè ŋwè və, mù a vè ŋgòlùŋsə wo lùŋsə.>>

61 Nwè nəmòk à yə Jisòs, yi duk də, <<Mə nə bɛ' wu Tà, fana mù sɛ fek wu də mə lo, nə tsok fa bɛ̀u am də wo cum bə̀boŋ.>>

62 Jisòs tsok fa nwè ènə də, <<A ye-a nga nwè yèto ngòfàk bohòNwì, nə sɛ kək lis maŋkwèŋ, ye də yi ka kəkərè ngòcu mvwe' gaŋ ŋkum Nwì yeŋ.>>

10

Jisòs Tumsə LòBwìŋ Hum Sàmba-Ncòp-Ba

1 Yà'sə ànə ca wes fana Tà Jisòs cokfis bwìŋ hum sàmba-ncòp-ba, nə tumsə lo yà'wèŋ ba, ba. Yi à tumsə lòwo ngòlòmvwe' buhu lak, nə ye bə mvwe' sè yi nə sə və fo' sə pwe'fo'.

2 Yi duk fa yà'wèŋ duk də, <<Nzum sè ngòkɔp sə ŋkùuŋntèŋ fana bɛ̀u sè ngòfàk fo' sə momjo wùriŋ. Ye də wèeŋ lɛŋ bohòTà ngà nzum nə də ya yi tumsə ngàa fàk wèŋ, ngòkə kɔp nzum ye sə.

3 Yèè, wèeŋ du, mù tumsə lòwèŋ co nsùŋgaŋ mət̩sət̩sə'rəə furùk wèŋ.

4 Nwèè kà posà jə, kà bàm jə, kà kùuŋgùp sè' jə; nə kà nwè mandzè sè' cèpsè lok.

5 Ndap nè wèŋ ni mbwa pwe'fo', wèŋ cepsə wo də, <Fifi ye bohòndap ènə!>

6 Wèeŋ duk vɛ'nə fana a ye-a nga nwè ngà fifi mbwa fana fifi àwèŋ nə, nə ye bohòyi. A ye-a nga nwè nè vɛ'nə nə mbwa bɛ̀è fana fifi àwèŋ nə bwi foho və bohòwèŋ.

7 Cum megu mɔmvwe' ndap ànə, nə sə zɛ, nə sə no yusè wo fa wèŋ, bɛ̀usè nwèè fak laŋ, wo

lak yi. Kà duk də wèŋ coho noon kupsə ke'ca ndap duk.

⁸ A ye nga wèŋ kè ni mvwe' ntòlak mòk, wo jəŋ weŋ fo' co bwìŋ fana wèŋ zɛ nsàp yu nè wo fa weŋ lòŋ fo'.

⁹ Wèŋ gɛŋsə ngàa yiyaŋ sè wo cu mvwe' lak yà'sə wèŋ, nə duk fa bùu sè fo' sə wèŋ duk də, <Gaŋ ŋkum sè Nwì sə yà' kɛəp vè bohòwèŋ laŋ.>

¹⁰ A ye-a nga wèŋ kè ni mvwe' ntòlak nè wo ka wèŋ də wèŋ vè bəboŋ duk fa fana wèŋ sə gihi ke' mvwe' mandzəə sè mɛ ntòlak anə sə, nə sə cep duk də,

¹¹ <A megu-a sè mfəmfəə sè yà' ko kùu avès mvwe' lak awèŋ yà'sə fana vès kè'sə nòŋsə yà', yà' sə kɛk weŋ. Wèŋ riŋtse' də gaŋ ŋkum sè Nwì sə yà' kɛəp vè weŋ laŋ.>

¹² Mɛ tsok fa weŋ də, nùmbu nè wo sak nzeŋgònə fana anə boŋ ghak bohòlak Sodòm nə noŋsə nsàp lak ànə.

¹³ <<Wèŋ bùu Corazì, wèŋ cu bɛp! Wèŋ bùu Bèsadà, wèŋ cu sè' bɛp! A vɛ'nə bùusə nsàp bum maŋgəŋgèeŋ sè wo a gù tsè' fa weŋ yà'a, wo ànə gɛ tsok fa-a yà' bohòbùu Tayà bə Sidòn wèŋ bwèrɛ də wo a kupsə, nə bwi fa bɛp awo ŋkwèŋ tè, nə ni tse' gàa cək, nə yok və.

¹⁴ Nùmbu nè wo nə sak nzeŋgònə fana anə boŋ ghak bohòbùu Tayà bə Sidòn nə noŋsə weŋ.

¹⁵ Wèŋ bùu Kàpanùm, wèŋ a sə nènì' co wèŋ də wèŋ kok lo mɛbu à? Wèŋ nə lo tsətsoŋ mvwe' ŋgə' vɛ'ɛ bòn.

¹⁶ <<Nwè nè yi yuk-a weŋ, ye də yi yuk mɛ.

Ŋwè nè yi dzeen-a wen, ye dè yi dzèen mɔ; nè ye dè ŋwè nè yi dzeen-a mɔ, ye dè ŋgèŋgàŋ dzèen ŋwè nè yi a tum vè mɔ nè.>>

Bùu Sè Hum Sàm̄ba-Ncòp-Ba Sè Wèŋ Bwìŋ Vèè

(Mat. 11:25-27; 13:16-17)

¹⁷ Bùu sè hum sàm̄ba-ncòp-ba sè wèŋ à bwìŋ vè bè kwəkwa. Wo à duk dè, <<Tà, yòŋsèè ze' wèŋ ye bohòvès yusè wà bùu liŋ yo.>>

¹⁸ Yi duk fa yà'wèŋ duk dè, <<Mù yè Satà ŋga yi sè gbù tsè mɔbu co mbùŋ sè ba'a tsè yi.

¹⁹ Yeè, mù a fa wen ñàŋ ñgògì cà mɔnè no bè ŋgam wèŋ, nè ye ñàŋ ñgògha' ñaàŋ sè bùu sè wo bèŋgè wen tse' yà' pwe'fo'. Kaco yumok gu lok wen yen. ²⁰ Nè yeè nè dè kà dè wèŋ sè kwa dè bùsè ze' wèŋ sè wəp wen duk, wèŋ kwa lè bùsè dè wo còm nòŋsè liŋ awèŋ mɔbu.>>

²¹ Ghà ànè à ye, Yòŋsè nè Rəren nè gu Jisòs yi rwiŋ bè kwəkwa fana yi cep duk dè, <<Mù kwasè wu tè', nè wu Tà mɔbu bè sè nze nè, bùsè wù a swihi gesè bum yè'sè bohòŋgàa ñkərə wèŋ, nè niŋ fa yà' bohòbwe sè lùè wèŋ. A zìnè Tè', wù a gu yè'sè mɔmvè'nè yà' a bòkok wu sè vèè wù ve'nè.

²² Tè' am a fa wes mɔ bum pwe'fo'. Ŋwè nəmòk ka mwe nè riŋ, rì mègù yi Tè' nè. Ŋwè nəmòk ka Tè' nè sè' riŋ, rì mègù yi mwe nè, nè ye bùu sè mwe nè dzəm dè yi niŋ tsok fa yà'wèŋ sè.>>

²³ Anè geŋ yi bùu duk swihi fa ŋgàa fàak ye sè wèŋ duk dè, <<A ren̄si bohòŋwè nè yi yè bum sè wèŋ sè yè yè'sè!

24 Mɔ tsok wɛŋ də ŋgà tsòhòbum Nwì wɛŋ, nə ye bə bù ŋkəŋkum wɛŋ ŋkùuŋntɛŋ sè wo a dzəm ŋgòyə bum sè wɛŋ yə yè'sə, nə kà mandzè nə tse'. Wo dzəm ŋgòyuk bum sè wɛŋ sə yuk yè'sə, nə kà yà' sè' yuk.>>

Gbɔ' Nwəə Sàmàriyà Nə Bəboŋ Nə

25 Ngà yə'rè fa bwìŋ lùk mòk à lòkok də yi bəə ja'a Jisòs nə fana yi fek nà' də, <<Cicà, yusè aco mù gu yè'sə yà, ya mɔ kə tse' lùŋ nè nà'a nè kà mè yuk nə ε?>>

26 Jisòs fek bəsə bwi nà' də, <<Wo à còm nòŋsə ndzənə lùk də yà? Wu tagè nja da?>>

27 Ngà' nə duk də, <<Wù tse' ŋgòdzəm Tà Nwì yòbə ntəm yòpwe'fo', dzəm yi bə yòŋsè yòpwe'fo', nə ye bə ŋàaŋ yo pwe', nə ye bə ŋkəɾè yòsè' pwe'fo', fana nə dzəm moma yo co mvè'nè wù dzəm ni' yò.>>

28 Jisòs duk fa nà' də, <<Wù cèp bəboŋ laŋ; gù vɛ'nə ya wu nə tse' lùŋ.>>

29 Ngà' nə à dzəm də yi niŋ tsok də yi ŋwə nə bəboŋ, fana yi fek fe'lə Jisòs nə də, <<Moma am nə yè'sə ndà?>>

30 Jisòs tsok bəsə fa yi gbɔ' mòk də, <<Nwəə nəmòk à tsə mɔ Jòrosalèm ŋgòlòJèrikù. A kə wès mandzè, ŋgà yè wɛŋ ko fweŋ fis yi cək pwe', nə ləp yi. Wo me'rə mak nòŋsə yi ŋga yi sə tùhɔ mègù mok ŋgwàŋ, nə lo yu awo.

31 Mvèk à càa, ŋgà fa satikà' mòk à sə yù tsə lòsè' mandzè ànə. Yi ànə ye nà' ŋga nà' nòo fana yi lək ca yuye ndzə ŋgɔ mandzè.

³² Nɔwəə Levì mòk à gù sè' vɛ'nə. Yi à kè dzeŋ fo', nə ye ŋgà' nə mvə'nè nà' nòo fana yi ca yuye ndzə ŋgə̀̀.

³³ Nɔwə Sàmàriyà mòk à vè ye fo', nə ye nà', fana nə koksə manziŋ bohònà'.*

³⁴ Yi geŋ fo', nə gesə fa nà' mve' bə rùk ndzənə mvwe' nà' sə, nə kiŋ lok fa nà'.† Yi le' koksə naaŋ nà' mənə nambà'rè ye, nə jəŋ lo nà' mvwe' ndap nəmòk nè ŋwèè nòoŋ mbwa yi lak, nə sə jəŋ ŋkərè bohònà' fo'.

³⁵ Tsok à rɛŋ, yi fis mbàm ncùhù ba, nə fa ŋgà ndap nə. Yi duk fa ŋgà ndap nə duk də, <Sə kək fa mə yi bəboŋ. Mə bwìŋ foho vè fana mù lak fəsə fa wu mbàam sè wù bəpsə yà' bùu yi pwe'.>

³⁶ Bohòbùu sè te' yè'sə, wù tsəm də ŋwè nè yi à nìtsè' də yi moma bə ŋwè nè ŋgàa yè wèŋ à lèp yi nə yè'e nè fò?>>

³⁷ Yi duk də, <<A ŋwè nè yi à tse' koksəmanziŋ bohònà' nà'a.>> Fana Jisòs duk fa nà' duk də, <<Dù a, nə kə gù yòsè' vɛ'nə.>>

Jisòs Kè Kɛ' Yə Mèri Bə Matà

³⁸ Jisòs bə bwe ye wèŋ à sə lòo fana wo kə dzeŋ mvwe' lak mok. Nɔwà mòk à ye fo' nè wo to liŋ ye də Matà. Nɔwà ènə à fa Jisòs mvwe' nòoŋ munda'à yi.

³⁹ Yi ànə tse' moma ye mòk nè wo to yi də Mèri. Mèri nə à kè cu ŋgə̀̀ ní'ì Tà ànə, nə sə yu'rə yusè nà' sə yə'rə fa bwìŋ sə.

* **10:33 10:33** Bùu Sàmariyà bə bùu Jus wèŋ à sə bàrègè wùriŋ.

† **10:34 10:34** Bùu lak yà'sə wèŋ à sə jəgè mve' bə rùk co ncèp.

40 Matà ye dè fàk yam bohòyi wùrin fana yi kè duk fa Jisòs dè, <<Tà, wù yè dè moma àm me'rè mæ mæmù, fàk sè ghak mæ, wù kà mbeŋ kom à? Tsok fa yi dè yi kè tēsè mæ.>>

41 Tà nè duk fa nà' dè, <<Matà, Matà, wù sè jik, nè sè ye ŋgè' bə bum ŋkùuŋntèŋ.

42 Yu nè nà' tse' gha' fàk, a yu nè mò'fis. Mèri cok jè fis ma nè bèboŋ nè laŋ. Kaco mù dzəm dè ŋwèè fep fis yuk nà' bohòyi yeŋ.>>

11

Jisòs Yè'rè Bə Nzak Pìriyà (Mat. 6:9-15; 7:7-11)

1 Nùmbu mòk à ye ŋga yi sè leŋ pìriyà mæmvwe' nèmòk, yi ànè mesè fana mo fàk ye mòk vè bohòyi, nè duk fa yi dè, <<Tà, yè'rè fa ves ŋgòleŋ pìriyà mæmvè'nè Jon ànè yè'rè fa ŋgàa fàak ye yà'a.>>

2 Yi duk fa wo dè, <<Wèeŋ cu ŋgòleŋ, wèŋ cep duk dè:

<Tè', kèkùksèè ye bə liŋ yo.

Gaŋ ŋkum yo sè vè.

3 Fa ves beŋ sè co vès zæ nùmbu pwe'.

4 Swì fa ves bup avès, bùusè vès swì fagè ndaaŋwè pwe' nè yi gùgè ves bup sè'.

Kà ves mvwe' sè co mèmumsè kè tseŋ ves jè lò.>>

5 Jisòs duk fa bwe ye sè wèŋ dè, <<A duk-a dè ŋwè nèmòk mæŋgorè wèŋ nè aco yi lokok nè tsətsə'rèè tsok, nè kè duk fa ŋge' ye mòk dè, <Ŋge' àm, samsè fa mæ ntuk bred tē',

6 b̀̀usè ɲge' àm mòk tesè vè gi fana mà ka yumok co mà fa yi z̀̀ tse'>

7 Yi duk vesè m̀̀nda'à anè dè, <Kà m̀̀ ɲgè' fa nòòɲ, mà lok ncù laɲ, ves bwe am wèɲ nònze, kaco mà lokok ɲgòfa wu yumok ɲga'a yeɲ.>

8 M̀̀ tsok wèɲ dè a ye-a sè dè yi nè kà ɲgòfa nà' yumok b̀̀usè nà'a ɲge' ye lòkok fana b̀̀usè nà' sè laɲ malì g̀̀g̀ɲ, yi nè lokok kə fa nà' yusè nà' dzəm sè pwe'.

9 M̀̀ tsok wèɲ dè, laɲ Nwì ya yi nè fa wu, làap ya wu nè tse', k̀̀um ya wo nè muk fa wu.

10 Busè ɲwè nè yi laɲ-a, ɲgèɲgàaɲ nè tse', ɲwè nè yi làp-a, yi nè ye, ɲwè nè yi kum-a, wo nè muk fa ɲwè ànè.

11 A nsàp t̀̀' nè fònè dè a ye-a ɲga mo ye laɲ fuk bohòyi, yi kà nà' fuk fa, nè fa nà' no ε?

12 Kènè dè yi laɲ-a mb̀̀mvəp nà' fa yi ɲgam ε?

13 A ye-a ɲga wèɲ sè wèɲ b̀̀p yè'e riɲ ɲgòfa bwe awèɲ bum sè b̀̀boɲ, ye dè aco T̀̀' nè m̀̀bu nè, nè fa Yòɲsè nè Rèrèɲ nè bohòb̀̀u sè wo laɲ yi sè wèɲ ẁ̀riɲ!>>

Jisòs Bè Bezebù

(Mat. 12:22-30, 43-45; Mak 3:20-27)

14 Jisòs à sè b̀̀' fis yòɲsè ze' mòk nè yi g̀̀g̀è ɲwè yi kà c̀̀ c̀̀p fana ze' nè ànè tesè lòo fana ɲgà' nè ye ɲgòc̀̀p c̀̀, b̀̀wìɲ m̀̀rè.

15 B̀̀u mok wèɲ duk yàwo dè, <<Yi b̀̀' fisgè ze' sè b̀̀ ɲàaɲ Bezebù nè yi ɲkum ze' wèɲ yi nè.>>

16 B̀̀u mok wèɲ sè lap mandzè ɲgòb̀̀u yi fana wo sè lap dè nà'a niɲ tsok fa wo maɲgèɲgèɲ mòk nè nà' tesè ma m̀̀bu.

17 Yi rin̄ yusè wo sè tsərə sè fana yi duk fa wo duk də, <<A ye-a nga lak mok ga'a-a ba fana ye də yà' kà fàk tse'. Nə ye sè' də ndap nè nà' ga'a-a ba, ye də nà'a nə gbũ.

18 Ye də a ye-a də Satà gapsə ni' ye bòp ba fana aco gan̄ sè ye sè təəŋ yè'sə va? Bəsè wèŋ sè duk də mù sè be'fis ze' bə nàan̄ Bezebù.

19 A ye-a də mù sè be' fis ze' bə nàan̄ Bezebù fana bùũ awèŋ wèəŋ be' fisgè yàwo bə nàan̄ sè ndà? Nsàp fàk bùũ awèŋ sè, sè nitsè' duk də wèəŋ bə jòŋ.

20 Mvè'nè mù sè be'fis yà' bə nàan̄ sè Nwì fana ye də gan̄ nkum sè Nwì sè yà' kəəp vè bohòwèŋ laŋ.

21 <<A ye-a nga ngà nàŋ nè yi tse' bum dzè' n̄ap sè sònto' ye yi fana ye də bum ye pwe' cu bəbòŋ.

22 Fana a ye-a nga n̄wè nəmòk nè nà' gũ ghak yi və-a, nə l̄ bə nà', nə ghak yi fana yi nə fep jəŋ bum dzè'e ye sè yi anə sè naan̄ tu bə zəŋ sə, nə gapsə bum ye sè yi tse' sə bə n̄ge' ye wèŋ.

23 <<N̄wè nè yi ka-a vesi yəŋ, ye də yi sè bèn̄ m̄. N̄wè nè yi sè kà-a vesi te'e benè ye də yi sè sèsə ye sèsə.

24 <<A ye nga yòŋsè ze' tesə ndzə ni' n̄wè fana yi gihi ca mvwe' nze jì ndzəp, ngòl̄ap mvwe' sè yi yòŋsə fo'. Yi kà mvwe' sè co yi yòŋsə yə fana yi duk də, <M̄ nə bwi foho lo fe'lə mvwe' ndap àm nè mù a tesə fo' nə.>

25 Yi bwì foho vè-a, nə ye nga wo kùrə nà' nə gũhũ tsə'rə nà' bəbòŋ,

²⁶ fana yi lo, nə kə to jəŋ və yòŋsəə mok sàmba, sè wo bəp càsə yi wo. Wo nə ni cum məm̀vwe' ndap nə. A ye vɛ'nə fana ncu ŋwè ànə nè məŋkwèŋ nə, nə bəp casə nè ànə ye to mantombi nə.>>

²⁷ Jisòs ànə cep bum yè'sə fana ŋwà nəmòk nè yi ànə ye məŋgorè bwìŋ fo' cep fis də, <<A rɛŋsi bohòvəəm sè yà' à dzə wu, nə ye mbwi sè wù à no!>>

²⁸ Yi duk bwi ye də, <<Rɛŋsi nə lɛ bohòŋwè nè yi yuk ncèp Nwì, nə noŋsə nà'.>>

Bwìŋ Dzəm NgòYə Məŋgəŋgèŋ

(Mat. 5:15, 6:22-23, 12:38-42; Mak 8:11-12)

²⁹ Bwìŋ ànə sə yam ghaha fo' ghaha fana Jisòs ye ŋgòcèp də, <<Bùu sè niè' yè'e wo bùu sè bəp, wo sə dzəm ŋgòyə yumok sè məŋgəŋgèŋ. Mə nə kà wo məŋgəŋgèŋ gù nì tsè' fa, anə megu məŋgəŋgèŋ nè Jonà nà'a.

³⁰ Bəsè mvè'nè Jonà nə ànə ye co məŋgəŋgèŋ mòk ŋgònìŋtsè' fa bùu Nenevì yà'a fana mùu mo ŋwè, mə nə ye sè' vɛ'nə bohòbùu yè'sə.

³¹ Nùmbu nzak nə ye, ŋkum nè yi ŋwàŋwè nè yi à tesə vè mvwe' lak Sibà nà'a nə cep bəp bohòbùu sè ŋga'a yè'sə də wo gbù nzak. Bəsè yi à tesə vè mvwe' sè nzeŋgòn nə lèsə, ŋgòkə yuk nsàp ŋkərè nè Sòlomù à tse' fana yeè, yumok sè yà' ghak Sòlomù nə ŋga'a yè'.

³² Nùmbu sak nzak ye fana bùu Nenevì wèeŋ nə lokok duk fa bùu sè niè' yè'sə wèŋ də wo gbù nzak. Bəsè Jonà ànə tsoho, wo kupsə ntəm; fana yumok sè yà' ghak càsə Jonà nə ŋga'a yè'.

33 <<Wo bwe'-a laàm, kaco wo swihi nà' swihi kè wo jəŋ nà', nə tes gesə sənə kùŋ yeŋ. Wo nə tes nà' mvwe' sè jəja ya bwìŋ sə ni vèə wo sə ye mareŋ nə.

34 Lis yo mareŋ nè ndzə ni'ì wù yi. A ye-a ŋga lis yo bèboŋ fana ye də ni' yònə, nè rwiŋ bə mareŋ. Yà'a sè' də a ye-a ŋga lis yo ka bèboŋ yeŋ fana ye də ni' yòrwiŋ bə mandzəm.

35 Ye də wèeŋ jəŋ ŋkərè, bwèrɛ mareŋ nè ndzə ni'ì wèeŋ nə bəuŋ mandzəm.

36 Fana ye də a ye-a ŋga ni' yòpwe'fo' rwiŋ mègù bə mareŋ, də mandzəm nja mvwe' mok bùè, fana ye də nà'a nə ye pwe' mareŋ anə, co mvè'nè mareŋ laàm rəŋgè yà'a.>>

*Jisòs Dək Fa Bùu Faràsi
Nə Ye Ngàa Yə'rè Lùk Də
Wo Ngàa Tè'èŋkup*

(Mat. 23:1-36; Mak 12:38-40; Luk 20:45-47)

37 Jisòs anə sə cep fana ŋwèə Faràsi mòk dək nà' də bə nà'a kə zə beŋ. Fana yi lo kə cum tsoŋ də ya bə nà'a zə.

38 Nwèə Faràsi nə à mərə ve'ɛ mvəsè yi à yə də Jisòs ànə zə ŋga yi ka mvè'nè wo cùkgè ŋkup nə sə zə yumok sə cuk.

39 Anə geŋ Tà Jisòs dək fa nà' də, <<Wèŋ bùu Faràsi, wèeŋ cùkgè yàwèŋ ŋkwèeŋ ŋgàp bə ŋkwèeŋ tasà, fana rwiŋ cum ma sə tsətsə'rè wèŋ anə ŋgwap bə wa bum bwìŋ.

40 Wèeŋ ləm! Nwèè nè yi ànə gù ŋkwèŋ nə à ka ma sə tsətsə'rè sè' yi gu à?

41 Wèñ fa-a ñgàa jìñ wèñ mbo sənə ñgàp nə fana ye də yusə yà'a ma nə ñjàwèñ pwe' mok rərəñ.

42 <<Wèñ bùu Faràsi, wèñ cu bup. Wèñ jəgè ñkərè ñgògàpsə fa Nwì bwe mvùu bum sè jo yè'e pwe'fo' ma nje, nə me'rə nonşə ñgòfàk bə zìnə, nə ye ñgòdzəm Nwì ve'nə. Anə ye co wèñ sə gu yà'sə, nə kà mok sè' mè'rè màk.

43 Wèñ bùu Faràsi, wèñ cu bup! Wèñ dzèñ māmvwè' ndap piriya fana wèñ sə dzəm dzòok sè bəbon, wèñ sə dzəm sè' də bwìñ sə cepsə wèñ munteñ bə wəwəp wùrìñ.

44 Wèñ cu bup bùusè wèñ co sèe sè bwìñ sə kà yà' yə fana wo sə gi ca mbwa, nə kà rì.>>

45 Anə geñ ñgà yə'rè fa bwìñ lùk mòk duk də, <<Cicà, wu cèp ve'nə, ye də wù sə yà' vès sè'.>>

46 Jisòs duk bwì fa nà' də, <<Wèñ ñgàa yə'rè lùk, wèñ cu sè' bup bùusè wèñ jə bum sè yà' rwì' ve'ε co ñwè kà bək to, nə sə naañ fa bwìñ. Wèñ kà yàwèñ bum sə bə ndubo àwèñ nè mò'fis jwèñ ja'a lok.

47 Wèñ cu bup, bùusè wèñ sə ci tsə'rə sèe ñgàa tsòhòbum Nwì sè ànə zə wo sè' tè' awèñ.

48 Ye də wèñ dzəm də yusə tè' awèñ ànə gu sə bəbon bùusè wo à zə wo fana wèñ ci yàwèñ sèe sə.

49 Ye də nà'a njo nè ñkərè Nwì sə cèp də, <Mu nə tumsə fa wo ñgàa tsòhòbum Nwì bə ñgàa ntum wèñ. Wo nə zə mok, nə yeñsə mok wèñ ñgə'.>

50 Ya nduəm ñgàa tsòhòbum Nwì wèñ sè yà' ànə fe'e mvè'nə nzeñgòn à yè yèe pwe'fo' nə ye

ndzə bohòbùu sè niè' yè'sə.

⁵¹ Ye jəŋ bə nduəm Abè kə dzeŋ mɔ ni'i Sàkàriyà nè wo à zə yi mʉtsətsə'rèə kàm nè wo tɛŋgè satikà' mbwa bə mʉwe' sè rərəŋ sè mɔ ndap Nwi nè ghaŋ sə. A zìnə də wo nè fek nduəm awo sə bohòbùu sè niè' yè'sə.

⁵² <<Ŋgàa yə'rè lùk, wèŋ cu bɔp, njo nè wèŋ a jə lòksə ki sè ŋgòmùk ncùu ŋkərè bə zeŋ sə. Wèŋ bə tu awèŋ, wèŋ a ka ni, fana nè lok bwi fa bùu sè wo à sè ni sè mandzè.>>

⁵³ Jisòs ànə me'rə fa'nə fana ŋgàa yə'rè lùk bə bùu Faràsi sə wèŋ sə sa'rə yi nè ne' tse' yi bə cù cùk, də ya nà'a cèp bum ŋkùuŋ.

⁵⁴ Wo sə bɔe yi ve'ε də ya wo ko yi bə yumok sè bɔp sè yi cèp-a na.

12

Ka Bəbɔŋ ŊgòGù Basə Yumok Basə Yeŋ

(Mat. 10:19-20, 26-33, 12:32)

¹ Ghà ànə à ye ŋga bwìŋ kə benə ve'ε ncùhù ŋkùuŋntɛŋ, nè sə nəŋ ca mok mɔ ni'i bə kù fana Jisòs ye ŋgòtsə' to fa ŋgàa fàak ye wèŋ də, <<Wèŋ jəŋ ŋkərè bə yis bùu Faràsi wèŋ. Mù sè duk yè'sə mʉmʉ'nè wo gù basə ke'gè bum awo yà'a.

² Yumok ka sè də bwìŋ à sè'lə lok yà' də wo nè kà yà' yə yeŋ. Yumok ka sè wo a swìhi yà' də bwìŋ nè kà yà' rìŋ yuk sè' yeŋ.

³ Ye də yusə wu cèp-a yà' ndzə ndzəmè, yà'a nè kə yuhu mʉwe' mareŋ. Yusə ŋwè làrə swìhi yà' mà mbwèndap fana wo nè fu yà' ma mɔ ndùndap.

4 <<Nge' am wèŋ, mɔ tsok weŋ də kà də wèŋ wəp bɔ̀ sè wo zə-a ŋgùpni' fana wo kà yumok ŋgògù fe'lə bohòwù tse' yà'a duk.

5 Mɔ tsok fa weŋ ŋwè nè aco wèŋ wəp yi nə. Wəp Nwi nè yi zə wes fana yi tse' mali ŋàŋ ŋgògèsə wu mwɛ' ŋgə' nè sə misə nà'a. Mɔ sə tsə' weŋ zinə də wəp yi ànə.

6 Wo kà ləŋbu tàŋ dolà ba sèŋgə à? Nwi kà nè mò'fis swìgè.

7 Nwəmtu sè mɔ tuhù wèŋ yè'e, yi a ta yà' ta. Ye də wu kà yumok wəp, bɔ̀sə wù yam ghak ləŋbu kè' ŋkəŋntèŋ laŋ.

8 <<Mɔ tsok fa weŋ də ŋwè nè yi cèp fis-a jəja mwɛ' bwìŋ də yi ŋwè àm fana mɔ mo ŋwè, mɔ nè kə duk fa yi sè' vɛ'nə mantombi masinjàa Nwi wèŋ.

9 Nwè nè yi bèn-a mɔ mantombi bwìŋ fana mɔ nè kə bèn yi sè' mantombi masinjàa Nwi wèŋ.

10 Nwè nè yi bɔ̀psə liŋ am, nè mɔ mo ŋwè fana wo nè swì fa yi yà'; ŋwè nè yi bɔ̀psə-a liŋ Yòŋsè nè Rərəŋ nə fana kaco wo nè swì fa yuk yi yeŋ.

11 A ye-a ŋga wo jə lo wu mɔmwɛ' ndap pìriyà, nə ye bohòbù ŋkəŋkum nə ye bə bɔ̀ sè wo sakgè bum wo fana wù kà də wu sə jik də wu nə cep fəsə yàɛ, kə də wu nə duk yè'sə dale duk.

12 Bɔ̀sə Yòŋsè nè Rərəŋ nə, nə tsok fa wu yusə wu cep sə sè ghà nà'nə.>>

Gbɔ̀' Ngà Ghàk Nè Yi A Ye Ləm

13 Nwè nəmòk à ye mɔtsətsə'rəə bɔ̀ sè wo à benə wùriŋ sə, nə duk vesə fa nà' də, <<Cicà,

dùk fa moma am dè yi gapsè bum mfè tè' am vesì.>>

14 Jisòs dùk fəsə fa nà' dè, <<Ngàta, ηwè nè yi a gù mù dè mù sak fa wèη nzak kè mù gapsè fa wèη bum yè'sə ndà?>>

15 Anə geη yi dùk fa bùu sè fo' sə wèη dè, <<Wèη jèη ηkərə ηgòwa bum bwìη, bùusè yòηsè ηwè ka bùu bum sè dè yi tse' yà' ηkùuηntèη yeη.>>

16 Fana yi mak fa wo gbù' nè'e dè, <<Ngà ghàk mòk ànə tse' nzum sè bum ànə tesə mbwa wùriη.>>

17 Yi ye ηgòtsərə dè, <Mù ka mvwe' sè co mù nonşə wes zuzuu am yè'e tse'. Mù nè gu kok yè'sə valε-ò?>

18 Yi dùk dè, <Mù nè gu lε vε': mù nè kùəmsə mak tàap am, nè ci sè ghan, ya mù gesə zuzuu am bə bum am pwe' mbwa.>

19 Fana mù nè dùk fa ni' àm dùk dè, mù tse' zuzù nduk co mù zù yà' lùumηgòn ηkùuηntèη; cum yonşə yuyo, zù, nò, nè sə ròη.>

20 Anə geη Nwì dùk fa yi dè, <Ləm yu ènə, yòηsè yòd nè me bə ndzəm nè ntinə nè'e. Bum sè wù fùhù yà'sə nè ye mok sè ndà?> >>

21 Jisòs dùk ləsə dè, <<Yà'a mummvè'nè yà' cu vε'nə bohòηwè nè yi kotse' bum ghàk, nè kà ηgà ghàk bohòma nè Nwì ye.>>

*Fa Ntəm BohòNwì, Nə Kà Bùu Yusəmok Sə Jìk
(Mat. 6:25-34)*

22 Jisòs à dùk fa bwe ye wèη dùk dè, <<Kà dè wèη sə jik bə yòηsèə awèη dè mù nè zù kok yàlε, kènə bə ni' yòdè wu nè ni kok yàlε-òdùk.>>

23 Bùsè yòṅsè ghak beṅ fana ṅgùpni' ghak cèk sè'.

24 Wèeṅ kùk ja'a na ṅwèṅwε', wo kà bìgè nè kà sè' kùp loksè. Wo ka tàp tse', nè kà zok sè' tse', fana Nwì sè fa wo zuzɔ. Ghak yè'sè wèṅ kè swiṅ ε?

25 A mṅgorè wèṅ ndà, nè dè aco yi naaṅ gesè nùumbu mok mṅnè nùumbu ye dè bùsè yi jik ε?

26 A ye-a dè kaco wù gɔ to yumok bə nè nà'a jo nà'nə yeṅ, ye dè wù sè jik bə mok bùu yà?

27 Tsərə-a bə nzaamṅgaṅ sè yà'a fomgè yè'e mṅmvè'nè yà'a kùkgè é. Wo kà ndàp caṅsègè, nè kà cèk sè' ba'. Mɔ tsok fa weṅ dè a mègù-a sè Sòlomù, nè yi à tse' bum maṅgəṅgèṅ nà'a, yi à ka cèk co mòk nè mò'fis vε'nə ni yuk.

28 A ye-a ṅga Nwìi ni fagè ṅgaṅ sè yà'a təeṅ fə ṅgəà ntinè, a ye zòṅ ṅga wo tèn səsə yà' laṅ sè vε'nə, ye dè aco yi ni fa wesə weṅ cək yàwèṅ yè'sə nsàp nè fò? Bù am a, dzədzəm àwèeṅ momjo!

29 Kà dè wèeṅ sè tsərə dè mɔ nè zɔ yà, mɔ nè no yà? Kà dè wu sè jik duk.

30 Bùu sè sè nzeṅgònə làpgè yàwo nsàap bum yà'sè; fana Tè' awèṅ rìṅ duk dè wèṅ tse' ṅgòtse' bum yè'sə sè'.

31 Yusè dè wèeṅ lap lε gaṅ ye sè, ya bum yè'sə nè ye sè' sè yàwèṅ.

*Tse' Ghàk Ma Mɔbu
(Mat. 6:19-21)*

32 <<Bwe sè mɛ gùmsəgè wɛŋ, wèŋ kà wəp bɛ̀sɛ̀ Tè' àwèŋ nə sə dzəm bònʂə wùrɪŋ ŋgòfa wɛŋ gaŋ ŋkum sè ye sə.

33 Wèŋ sɛŋ bum awèŋ, nə fa mbàam sə bohòŋgàa jìŋ wèŋ. Wèŋ tse' posàa sè kaco yà' rɛŋ yuk yeŋ, nə loksə ghàak awèŋ mɛbu mwɛ' sè kaco yumok gɛ yà' yeŋ; mwɛ' sè kaco ŋgà yè kə dzeŋ to fo' yeŋ, nzək kà yà' sè' zɛ bɛpsè.

34 Bɛsè mɛmwɛ' nè ghàak yo cu fana ntɛm yòo nə ye sè' fo'.

Ye Mofàk Nè Ngà Kà Lo Dzəm

(Mat. 24:45-51)

35 <<Wèŋ cum fèfɛhù, swi' cəək awèŋ sə gamè bèbɔŋ, nə bwe' tse' laàm awèŋ.

36 Wèŋ ye co bɛ̀ sè masà àwo nə lo mwɛ' ŋkàha gù ŋgòbwìŋ vèə, fana wo sə tək nà' də ya nà'a kùm ncù ntèŋ, wo muk fa yi mvèsè.

37 A rɛŋsi bohòbwe fàak sè masà nə bwìŋ vèə, fana yi tseŋ yà'wèŋ ŋga wo cu nca. Mɛ tsok fa wɛŋ zìnə də masà nə nə kɪŋ tsə'rə cək ye, yà'wèŋ cum nze fana yi fa wo zɛzɛ.

38 A rɛŋsi bohòŋgàa fàak sè yi və-a sè ndzəmè kè tsətsə'rəə tsok àlɛ', nə tseŋ wo ŋga wo cu fèfɛhù.

39 Wèŋ rɪŋtse' yumòk nè' sè' də, a ye-a ŋga tà ŋgà ndàp nə rɪŋ-a ghà nè ŋgà yèə nə və, bwèɛ ye yi kà ndap ye də nà'a ni mbwa mè'rè nònʂə.

40 Wèŋ nə sə kək yàwèŋ sè' kù'ɛ, bɛ̀sɛ̀ mɛ̀ mo ŋwè, mɛ nə və ghà nè wèŋ ka vɛ'nə tsəɾə.>>

41 Pità à fek də, <<Tà, wù sə màk fa gbɛ' nè'e yè'sə bohòvès kè bohòbwìŋ pwe' ɛ?>>

⁴² Fana Tà cep də, <<Mofàk nè yi zìnə nə tse' ŋkərəə yè'sə nè fò? A nè masà ye nə a fa bum sè mɯ nda'à yi pwe' bohònà', nə duk də, nà'a nə sə fa bwe fàak mok wèŋ bum zɯzɯ bə mvək nè kəkurə.

⁴³ A rɛŋsi bohòmofàk nè masà ye bwìŋ vèə, nà' tseŋ yi ŋga yi sə gù mvè'nè nà' anə duk nonşə lo yi sə.

⁴⁴ Mɯ tsok weŋ zìnə də, masà nə nə fa nsàp mofàk ànə ŋàŋ ŋgòkotse' bum ye sè yi tse' pwe'fo' nà'.

⁴⁵ A ye-a ŋga mofàk nə duk-a də, <Masà àm nə nə kà ntèntèn bwìŋ fohòvè,> nə yeto ŋgòlèp bwe fàak sè mbəmbam bə sè bèba sə wèŋ, nə zɯ, nə no juhu rùk,

⁴⁶ fana masà ye nə bwìŋ foho vè nùmbu mòk nè mofàk nə nə sə ka tsərə fuk, nə ye bə mvək nè yi ka sè' riŋ, fana masà nə nə gbɛ' ci'lə nà' ba, nə nonşə be'lə yi bə bùu sè wo ka zìnə tse'.

⁴⁷ Mofàk nè yi riŋ yusə masà ye dzəm də yi gɯ yà', nə kà də yi yeto ŋgògù yà' duk fana wo nə ləp yi cùu ŋkwès ŋkùuŋntèn.

⁴⁸ Nwè nè yi anə ka ye riŋ, nə gɯ yumok sè co wo ləp yi bùu zeŋ nè bɯp fana wo nə ləp ghasə yi ye ŋgwàn. Nwè nè Nwì a fa bohòyi ŋkùuŋ fana Nwii nə dzəm bohòyi sè' ŋkùuŋ. Nwè nè Nwì a nònşə ndzə bohòyi ŋkùuŋntèn fana Nwii nə kək bohòyi sè' ŋkùuŋntèn anə.

Jisòos Nə Gɯ Bwìŋ Wo Ga'a
(Mat. 10:34-36, 16:1-4)

49 <<Mù a vè ngòkè tèn gèsə mis sənə nzenḡònə. Yà' sə bòmü də anə ye co mis nə kəə nga'a laŋ.

50 Mù tse' bàpte nè ngòbàptesə nà', tse'nga mü bàptesə wes nà' ŋkuŋ ntəm fi mü!

51 Wèn tsəm də mù a vè sə nzenḡònə anə ngòjə vè fifi à? Hai' ka vè'nə yen, mü tsok wən də mù a jə vè gəḡəpsə.

52 Busə ye jəŋ nga'a nə lo mantombi, bwìŋ tàŋ sè wo cugè ndap mò'fis nə ga'a. Bwìŋ tɛ' nə tse' cùu sè zok bə bũu sè ba, sè ba tse' bwi yàwo zok bə sè tɛ'.

53 Wo nə ga'a, tɛ' wèn sə dzeen yusə bwe mbəmbaam awo wèn sə tsərə fana bwe mbəmbam sə, sə dzeen sè tɛ' wèn. Ma sə dzeen sè mo ye nè ŋwàŋwè, mo ŋwàŋwè sə dzeen sè ma. Maligù sə dzeen sè ŋgwegù, ŋgwegù sə dzeen maligù nə sè'.>>

54 Jisòs à duk fa bwìŋ duk də, <<Wèn yəḡè nga mbàk yəəŋ ma nconùm fana wèn də, <Mbũuŋ nə li>, nà' li sè'.

55 Wèn yuk nga fəfə bwìŋ nè kəkək fana wèn duk də, <Lùm lòo>, lùm nə lo sè'.

56 Wèn ngàa tɛ'èŋkup! Wèn rìŋ mèḡù ngòkək gèsə mübu, nə ye nzenḡònə, nə sə cep də anə ye nga'a vɛ'ɛ, nə kà bum sè yà'a niè' yè'e rɛɛŋ bũu yà?

*Kà Də Wu Tək Tətè
Wo Sak Nzak YòSa'a Duk
(Mat. 5:25-26)*

57 <<Kaco wèn bə tu awèn sak yusə yà'a kəkərè yen yè'sə bũu yà?

⁵⁸ A ye-a nga ηwè nəmòk somse wu mu kot fana wu lap mandzè guguj də wenə mesə nzak nə nga wèη cu ntòmandzè. Ya nga yi kà wu bohòngà sak nzak jə lò. Bəsè ηgà sak nzak nə fa wu bohòngàa tà m wèη, fana ηgàa tàam sə nise wu ndapndzəm.

⁵⁹ Mu tsok fa weη də kaco wu tesə yeη, tse'nga wu làk wes mbàm nè wo tiη fa wu nə pwe'fo'.>>

13

Me'rə NgòGù Bup Bwèrε Wèη Kpu Sè'

¹ Ghà ànə à ye fana bùu mok wèη à ye fo' sè wo à tsè' fa Jisòs bə nzak bùu Galili mok sè Palè à zə yà', nduəm awo torə bə nduəm nàam sè wo à sùə yà' ηgòfa Nwi satikà' bə zeη.

² Anə geη Jisòs fek wo də, <<Wèη tsəm də bùusè bùu Galilii yà'sə wèη kpu nsàp kpu ηgə' ànə ve'nə ye də wo gù ghakgè bup wo, nə nonse bùu Galilii mok sə wèη pwe' à?

³ Hai' ka ve'nə yeη. Mu tsok weη də tse'nga wèη kupsə, nə bwi fa bup awèη ηkwèη bwèrε wèη nə kpu sè'.

⁴ Bùu sè hum-ncòp-fwame' sè ndap nè nà' à sàp lòmabu wùriη à kəəη zə wo Silòm yà'a, wèη tsəm də wo à sə gù bup wo, nə ghak casə bùu sè wo cu mwwe' lak Jòrosalèm pwe' wo à?

⁵ Mu tsok weη də ka ve'nə yeη. Tse'nga wèη kupsə, nə bwi fa bup awèη ηkwèη bwèrε wèη kpu sè'.>>

Gbu' Tu Nè Nà' A Ka Zəm Nə

⁶ Anə geŋ Jisòs tsok fa wo gbù' nè'e də, <<Ŋwè nəmòk à bì tes tɛ fik mɛ nzuù yi. Yi sə və fo' də yi kə kwɪŋ jəŋ ŋgwii fik nə fana yi kà nè mò'fis kwì yuk.

⁷ Anə geŋ yi duk fa bohòŋwè nè nà'a kùk fagè yi nzum ye sə də, <A ŋga'a lùumŋgòŋ tɛ' mvè'nè mɛ ləpgè fik mɛ tɛhù fɛɛŋ, nə kà mò'fis yə yuk. Gbè' màk nà', nà' sə gù bɛpsə nze nə fo' wà vɛ'nə bùu yà?>

⁸ Ŋgà kùk nzum nə duk fa nà' də, <Ŋkwà'ŋwè, mè'rə tes nà' lùumŋgòŋ nè'e vɛ'nə ntɛŋ. Mɛ nə tuŋ mbwè nə, nə gesə gəp ca.

⁹ Lùumŋgòŋ nè nà' tse' nà'a, a ye-a ŋga nà' zəm fana ye də a bəbɔŋ; nà'a kà-a zəm ŋkuŋ wù gbɛ' mak nà'.> >>

Jisòs Gɛŋsə Ŋwà Nè Yi Kà Gìgè Numbu Dzè

¹⁰ Jisòs à sə yə'rə bwiŋ numbu dzè mòk mɛmvwe' ndap piriya.

¹¹ Ŋwà nəmòk à ye fo' nè yi à tse' yòŋsè nè bɛp, nè nà' à sə gù yi, yi sə yaaŋ mənə lùumŋgòŋ hum-ncòp-fwame'. Ŋwà nə à zòŋ nsàp nè co yi kà mɛtsè rərəŋ təŋ lok fùk.

¹² Jisòs ànə ye gesə ŋwà nə fana yi to nà', nə duk fa nà' də, <<Mamwe, wù ga'a weŋ yiya yònà'a laŋ.>>

¹³ Fana yi naaŋ fa nà' bo, ŋwà nə təŋ kok mok rərəŋ ghà ànə, nə kwasə Nwì.

¹⁴ Ŋkwà' ŋwè nè mɛmvwe' ndap piriya nə à jòk vɛ'ɛ də Jisòs gɛŋsə ŋwè numbu dzè, nə duk fa bùu sè fo' sə wèŋ də, <<A tse' nùumbu ntùŋfu sè aco a gù fàk ca. Wèŋ sə və nùumbu yà'sə ŋga wo sə gɛŋsə weŋ, kà numbu dzè ye.>>

15 Anə geŋ Tà Jisòs cep fəsə fa nà' də, <<Wèŋ ŋgàa tè'èŋkup wèŋ! Yè'e ka sè wèŋ sè a yegè nùmbu dzè, wèŋ sə fiŋ fis mbòŋ kè mvomdè'e awèŋ mvwe' sè wo tsòŋ tes yà', nə sə jə lo wo ŋgòno ndzəp sə yeŋ à?

16 Ye də ŋwà nè'e, nè yi mo Abràham, nè Satà a kiŋ tse' yi lùumŋgòŋ hum-ncòp-fwame' ènə, kaco wo fiŋ fis yi ye nùmbu dzè yeŋ à?>>

17 Yi à cèp ve'nə fana marè'tu ko bùu sè wo à sə bèŋ yi sə wèŋ pwe'fo'. Bùu sè wo à ye fo' sə wèŋ à kwa bə nsàap bum maŋgəŋgèeŋ sə yi à gùu sə pwe'.

*Jisòs Fùhù Ja'a Gaŋ Ŋkum Sè Nwì Bə Bum Mok
(Mat. 13:31-33; Mak 4:30-32)*

18 Jisòs à duk mok sè' də, <<Gaŋ ŋkum sè Nwì sə yè'sə co yàɛ-ò? Aco mù fùhù kok yà' yè'sə bə yà?

19 Yà'a co mɛ ŋgwì tɛ mostà nà'a, nè ŋwə nəmòk à jə, nə bi mɛnzùu yi. Nà' kuk bùuŋ tɛ nè ghaŋ fana swiŋ wèŋ və kə ci ndap awo mbwa.>>

20 Jisòs nə duk sèmok də, <<Aco mù fùhù kok gaŋ sè Nwì sə yè'sə bə yàɛ-ò?

21 Yà' mègù co yis sè ŋwàŋwèe jəgè yà', nə gesə sənə kwèes mfòŋ tɛ', nə top yà' tètè yà' kok pwe' yè'e.>>

*Mandzè Nè Nà'a Fəferè Nə
(Mat. 7:13-14, 21-23)*

22 Jisòs à gi, nə sə ca ke' mvwe' buhu lak sè jo bə sè ghaŋ wèŋ ŋgòlòJòrosalèm, fana yi sə yə'rə lo bwìŋ fo' sè'.

23 Nwè nəmòk fek yi də, <<Tà, bùu sè wo nə tse' lùŋ nè nà'a nè kà mè yuk nə, nə ye megu bwiŋ jo à?>> Jisòs nə duk fa wo də,

24 <<Nikok mvwe' ncùu ŋka' sè fəferè yà'a, bùusè bwiŋ ŋkùuŋ nə lap mandzè ŋgòni lòfo', fana wo kà ni to.

25 Tà ŋgà ndap nə lok ncùu ye fana wèeŋ nə təeŋ sə mbiŋ, nə sə kum ncùu sə. Wèeŋ kum yà', nə sə cep də, <Tà mùk fa ves ncù.> Yi nə duk fa weŋ də, <Mù ka mvwe' sè wèeŋ vèə riŋ.>

26 Wèeŋ ye ŋga'a ŋgòcèp də, <Vesùwèeŋ à sə zügè, nə sə no sè' mvwe' mò'fis; wù à sə yə'rə bwiŋ mvwe' mandzèə sè ntòla'à vès.>

27 Yi nə cep ye də, <Mù tsok fa weŋ də mù ka yàm mvwe' sè wèeŋ vèə riŋ. Wèeŋ coho gesə lo ŋgù ni'ì mù fo', wèeŋ ŋgàa gù bap wèeŋ.>

28 Yà'a mvwe' sè wèeŋ nə waŋ, nə zɛ nzòn, ŋga wèeŋ yə Abràham bə Azik bə Jàkop, nə ye ŋgàa tsòhòbum Nwì wèeŋ pwe' ŋga wo cu mɛla'à Nwì, fana wèeŋ mam yàwèeŋ sə mbiŋ.

29 Bwiŋ nə tesə və mvwe' ŋkùup nzeŋgòn ma kwè fo', nə cum sə zɛ roŋ mɛla'à Nwì anə.

30 A kè dzèŋ mvè' ànə bùu mok sè wo ŋga'a maŋkwèeŋ nə kə ye mantombi; mok sè wo ŋga'a mantombi nə ye mok maŋkwèeŋ.>>

*Mvè'nə Jisòs Dzəm Lak Jòrosalèm
(Mat. 23:37-39)*

31 Mvèk ànə à ye, bùu Faràsi mok wèeŋ və kə duk fa Jisòs də, <<Lògesə fənə fo', bùusè ŋkum Heròsə lap mandzè ŋgòzə wu.>>

32 Yi duk fa yà'wèeŋ də, <<Dù kè tsok fa kəkèrè còp ànə də mù sə be'fis yòŋsèə ze', nə sə luŋsə

bwìŋ ntinè bə zòŋ, nùmbu nè tɛ' dzèen fana mù mesə fàak am sə.

³³ Fana mù nè sə geŋ mali mantombì ntinè bə zòŋ, nə ye bə nùmbu nè nà' bɛ'ɛ nə sè'; bùusè ka bəboŋ ŋgòzə ŋà tsòhòbum Nwì mvwe' mok sè zok nə casə Jòrosalèm yeŋ.

³⁴ Webee, lak Jòrosalèm, lak Jòrosalèm. Wèen zəgè ŋgàa tsòhòbum Nwì wèŋ, nə sə tərə ŋgàa gè ntum Nwì wèŋ bə lis. A yè'sə ghè' sù mvè'nè mù sə làp də mù ko wumsə gesə weŋ ndzə ni'ì mù co məma mvəp sə wumsə bwe ye, wèŋ kà dzəm ɛ?

³⁵ Bo am ka mok bə lak àwèŋ yà'sə yeŋ. Mù tsok weŋ də, ye jəŋ ŋga'a lo mantombì, wèen nə kà mù mok yə fe'lè tètè nùmbu nè wèen yə fe'lə mù, ye mok ŋga wèŋ sə duk də, <Nwì se ŋwè nè yi vè mənə liŋ sè Tà nə> ŋkuŋ.>>

14

Jisòs Gəŋsə Ngà Yiya Mòk

¹ Nùmbu dzè mòk à ye, Jisòs lo ŋgòkə zɹ zɹzɹ mɹmvwe' ndap ŋkwà' ŋwèə Faràsi mòk. Fana bwìŋ sə kək tse' yi vɛ'ɛ pap.

² Nwè nəmòk à ye fo' nè yi à tse' yiya kəkò'rè.

³ Anə geŋ Jisòs fek ŋgàa yərè lùk bə bùu Faràsi wèŋ duk də, <<Lùk dzəm də aco wo gəŋsə ŋwè nùmbu dzè kè njo-ɛ?>>

⁴ Bùu sə wèŋ kà cù mùk. Fana yi gəŋsə ŋgà' nə, nə me'rə nà' lo.

⁵ Yi fek wo də, <<A fɛɛŋ ndà nè a ye-a ŋga mo ye kè mbòye gbù ni-a sənə wu ndzəp nùmbu dzè, yi kà nà' mvèsè fis-ɛ?>>

6 Wo à ka yusè co wo cep fəsə fa yi tse' lok.

7 Jisòs à yə mʉmʉvə'nə bùu sè wo à to wo mvwe' dinà nə sə swè' mègù mvwe' ncum sè bə̀boŋ fana yi tsok fa yà'wèŋ ncèp nè'e.

8 Yi də, <<A ye-a ŋga ŋwè to wu də wu və mvwe' zʉ gùu ye fana kà də wu kʉk mvwe' sè bə̀ghak fo' pwe' zeŋ, nə kə cum fo' duk. Bʉsè kàmòk wo to ŋwè nəmòk nè yi ghak wu ye sè'.

9 Yi vəə fana ŋwè nè yi to weŋ ba fo' yi nə, nə kə duk fa wu də, <Lòkok, nə fa mvwe' yà'sə bohòŋwè nè'e.> Fana marè'tu nə ko wu, wù kə cum mok bə dzòk nè nà' ka bə̀boŋ yeŋ.

10 A bə̀boŋ də wo to-a wu, wù kə cum lɛ bə dzòk nè nà' ka bə̀boŋ wùriŋ yeŋ, ya ŋga ŋwè nè yi to weŋ nə vəə fana yi duk fa wu də, <Ŋge' àm, lòkok cum lo mʉmʉvwe' dzè' nè bə̀boŋ nè'e.> Yà'sə nə gʉ wu, wù ye co ŋwè nè ghaŋ mʉ lisè bùu sè wenə wèŋ cu fo' sə.

11 Bʉsè ŋwè nè yi jə kok lò-a ni' ye mʉbu, wo jəŋ tsoŋ yi sə nze; ŋwè nè yi jə tsoŋ lònì' nje sə nze fana wo jə fis kok yi mʉbu.>>

12 Jisòs duk fa ŋwè nè yi to bwìŋ dinà nə ye də, <<A ye-a ŋga wù də wu to bwìŋ mvwe' dinà kè mvwe' ŋkàk àlɛ', kà də wu to ŋge' yo wèŋ kè bwema yo, kè njàaŋ yo wèŋ kè ŋgàa ghàk sè wenə wèŋ nòkʉəp fo' duk. Bʉsè wo nə to fəsə wu sè' fana ye də wo làk fəsə wu yà'sə laŋ.

13 Yusə də wu to bwìŋ mvwe' dinà fana wù to ŋgàa jìŋ, ŋgàa jì bo bə sè jì kù, nə ye sè jì lis wèŋ.

14 Ya Nwii nə se wu. Bʉsè kaco nsàp bù ènə lak fəsə to wu yeŋ. Nwii nə lak wu ghà nè bùu

sè bèboŋ wèŋ lòkok mvwe' kpu.>>

Gbu' Nè Wo A To Ke'cà Bwiŋ NğòKè Zu Bum Nkàk

(Mat. 22:1-10)

¹⁵ Nwè nəmòk nè bə yà'wèŋ ànə cum, nə sə zu mvwe' mò'fis ànə yuk ncèp ènə fana yi duk də, <<A reŋsi cèbùè bohòŋwè nè yi nə zu nkàk nè mu la'à Nwì.>>

¹⁶ Jisòs nə duk fa fe'lə nà' bə gbu' də, <<Numbu mòk à ye, ŋwè nəmòk to nkàk nè ghaŋ, nə to bwìŋ ve'ε ŋkùŋntèŋ.

¹⁷ Mvèk nkàk nə à kùrə fana yi tumsə lo mofàk nè nà'a fàkgè bohòyi də nà'a kə tsok fa bùu sè yi to yà' sə də wo və bùusè wo fùhu wes bum pwe' laŋ.

¹⁸ Bùu sè wo à to wo sə pwe' sə duhu lo də wo nə kà vè bùu ve' bə ve'. Nwè nè wo à to to ntòyi nə à duk fa nà' də, <Mù ywiŋ nzum am, mù də mu lo kə kuk ja'a zeŋ. Mù leŋ wu, kà jòk.>

¹⁹ Mòk duk ye də, <Mù ywiŋ ndum mbòŋ hum fana mù də mu kə kuk ja'a yà' ŋkuŋ. Kwəkwè' nə kà jòk.>

²⁰ Mòk duk ye də, <Mù a bè' ŋwàŋwè, fana ye də kaco mù geŋ to yà'sə yeŋ.>

²¹ Anə geŋ mofàk ye nə bwi və kə tsok fa masà ye nə. Nğà ndap nə jok, nə duk fa mofàk ye nə də, <Dù mvwe' mandzəə sè sə ntòlak ve'ε wàp, nə to və ŋgàa jìŋ bə sè jì bo bə sè jì lis, nə ye sè jì kù wèŋ.>

²² Mofàk ye nə à vè, nə duk də, <Mù gù məm̀vè'nè wù duk sə laŋ fana mvwe' ncum bwehe cu malii.>

23 Masà nè duk fa yi də, <Yeè, dù lo sə mandzè, nè kək bəbwe mandzè sè ɲgəà pwe', nè to ɲwè nè wu yə pwe' də yi və, ya ndap àm nè rwiɲ.>

24 Mɯ tsok weɲ də bɯ sè mù anə to to wo yà'a, nè mò'fis nè kà zɯzɯ am sə zɯ ja'à.>>

NgòYe ɲwè Am, Wù Beɲ Bum Sè Yà' Sə BòWu

25 Bwiɲ à gí bə Jisòs wùriɲ fana yi tsok fa yà'wèɲ də,

26 <<A ye-a ɲga ɲwè dzəm ɲgòbɛ' vè mɯ, fana ɲgəɲgàɲ sə dzəm tè' ye kè ma ye, kè ɲgwe ye, kè bwe ye, kè bwe tè' ye, kè ɲjè', nè ghak casə mɯmvè'nə yi dzəm mɯ fana ye də kaco ɲwè ànə ye to mo fàk àm yeɲ. ɲwèè dzəm-a mɯ fana yi tse' ɲgòdzəm mɯ nè casə mvè'nə yi dzəm ni' ye.

27 A ye-a ɲga kaco ɲwè bək jəɲ ntəəɲ ye, nè bɛ' və mɯ yeɲ, ye də kaco ɲwè ànə ye to mofàk àm yeɲ.

28 A ye-a ɲga ɲwè dzəm ɲgòci ndap, yi nè cum to ntòsə nze, nè kək ja'a də ndap nè nè jəɲ yi mbàm sù nɛ ɲkuɲ. Yi nè ja'a də yi tse' mbàam sè aco yi ci wes to ndap nè bə zeɲ àɛ.

29 A ye-a ɲga wù ka vɛ'nə gɯ fana kàmòk aco wù yeto fàak sə, nè kà yà' mèsè. A ye-a ɲga wù yeto fàak sə nè kà mèsè fana bɯ sè wo yə wu pwe' nè ywi wu.

30 Wo nè sə cep kɛ' də, <ɲwè nè'e a yeto ndap, nè kà nà' ci wes to.>

31 <<A ye-a ɲga ɲkum mòk dzəm ɲgòkè lù bə mòk fana yi nè cum to ntònze, nè tsərə bèboɲ. A ye-a ɲga ɲkum nè tse' mègù bwiɲ ncùhù hum fana yi nè kək ja'a də aco yi kə ghak to ɲkum

mòk nè nà' tse' sè nà' bwìŋ ncùhù hum ba nè àlɛ?

³² A ye-a nga kaco yi ghak to ŋkum mòk nè yeŋ fana yi nè tumsə bùu ye mok wèŋ nga nà' cu ntòmŋwe' səsap də wo kə tsok fa nà' də yi sə dzəm ye mok fifi.

³³ Yà'a bohòwèŋ pwe'fo' sè' mùmŋvè'ànə də, wèŋ tse' ŋgòtsərə to bəboŋ ŋkuŋ. Wèŋ tse' ŋgòme'rə bum sè wèŋ tse' yà' pwe'fo' ŋkuŋ wèŋ bɛ' və mɛ. A ye-a nga wèŋ ka vɛ'nə gɛ kaco wèŋ ye to ŋgàa fàk am yeŋ.

³⁴ <<Ci' yusə bəboŋ fana, a ye-a nga ci' cwè'lə bɛp, mandzə nè ŋgògù yà' lum fe'lə kà mok ye.

³⁵ Kaco yà' bonşə ncàk, kə yà' gəpsə yumok sè wù a bì yà' sè' yeŋ. Bwìŋ mak megu yà' mà'a. Bùu sè wèŋ sə yu'rə yusə mù sə cɛp yè'e, wèŋ yuk nè rɛɛŋ.>>

15

Kwəkwa Nè Nà' Cu Mɛbu Nga Nwə Nè Bɛp Kupsə (Mat. 18:10-14)

¹ ŋgàa ko mbàam tas bə ŋgàa gù bɛp mok wèŋ à vè ŋgòyu'rə yusə Jisòs à sə cèep sə.

² Fana bùu Farasi bə ŋgàa yə'rə bwìŋ lùk wèŋ sə cɛp ŋwəm kɛ'ca. Wo sə duk də <<Nwə nè'e sə dzəm ŋgàa gù bɛp, nè sə zɛ be'lə bɛŋ bə yà'wèŋ.>>

³ Anə geŋ Jisòs mak fa wo gbɛ' nè'e də,

⁴ <<A mɛŋgorè wèŋ fɛɛŋ ndà nè də yi tse'-a nsùŋgaŋ ŋkù mò'fis, nè mò'fis bisə ca, kaco yi me'rə nonşə sè hum vèke'-ncòp-vèke' sə ŋgəà,

nə lap lo nə mò'fis nə tètè tse'nga yi yə nà' ŋkuŋ yeŋ ndà? ⁵ Yi yə nà' fana yi bək naaŋ nà' mɛ ŋkambəhə yi, nə sə kwa.

⁶ Yi kə dzəŋ lak fana yi to benə ŋge' ye bə bɛɛ sè wo nòkuəp yi wəŋ. Yi duk fa yà' də, <Vesùwèeŋ kwa bɛɛsè mɛ a yə nsùŋgaŋ àm nè nà' a bisə nə.>

⁷ Mɛ tsok fa weŋ də a ye-a ŋga ŋgà gù bɛp nə mò'fis kupsə, nə bwi fa bɛp ŋkwèŋ fana kwəkwaə nə ye mɛbu ŋkɛɛŋntèŋ mɛtuhù yi, nə casə bɛɛ sè hum vəkə'-ncòp-vəkə' sè wo yàwo bɛɛ sè wo kəkurə.

Gbu' Mbàm Nə Nà' A Bisə Nə

⁸ <<Kè a duk-a də ŋwà nəmòk a tse' mbàam ye hum, fana nə mò'fis bisə ca. Yi nə bwe' laàm ŋgòláp bə zeŋ, nə kurə ndap nə, nə lap se tètè yi ye nà' ŋkuŋ, ka ve'nə yeŋ à?>

⁹ Yi yə nà' fana yi to benə ŋge' ye bə bɛɛ sè wo nòkuəp kok fo' wəŋ. Yi duk fa yà'wəŋ də, <Vesùwèeŋ kwa bɛɛsè mbàm àm nè nà' a bisə nə, mɛ a yə fe'lə nà' laŋ.>

¹⁰ Mɛ tsok fa weŋ də yà' mègù sè' ve'nə də kwəkwa cu mɛtsətsə'rəə masinjaa Nwì wəŋ ŋga ŋgà gù bɛp nə mò'fis kupsə a ntum ye na.>>

Gbu' Mo Nə Yi Anə Bisə Nə

¹¹ Jisòs à cèp malì gbu' mòk sè' də, <<Ŋwè nəmòk à tse' bwe ye ba, ŋga wo pwe' mbəmbam.>

¹² Nə mweŋke' nə duk fa tètè awo nə də, <Pàpa, fa fis mɛ bum yàm sè yà'a nə kə ye yàm sə ŋga'a.> Anə geŋ yi gapsə fa yà'wəŋ bum ye sè yi tse' sə.

13 A ka nùumbu ηκùυη sap fana nè mwenke' nè te'e benə bum sè ye sə pwe', nè be' mandzè nè lo mwwe' lak mok sè səsap. A dzèη fo' yi sə zə sesə bum ye sə bə mandzè njesè.

14 Mvè'nè yi à wes bum ye sə fana njè nè bəp ko mwwe' lak yà'sə fana yi ye ηga'a ηgòjamə.

15 Yi lo, nè sə cum mok bə ηwè nəmòk nè mwwe' yà'sə. Ngà' nè à sə tumsə løyi ηgòsə fa ηgùnaan ye wèη zəzə.

16 Njè sə yaη yi vε'ε co yi zə zəzəη ηgùnaan sə fana ηwè nəmòk kà yi yumok fa lok.

17 Nkərè ye ànə foho və fana yi duk də, <Bwe sè wo sə fàk bohòtè' am tse' beη co wo kà zə wes to, mù sə də mұ kpұ yàm njè.

18 Mұ nè lokok lo kə tseη tè' am, ya mұ nè duk fa yi də, <<Pàpa, mù a gù bəp bohòNwi nè ye bohòwù sè' laη.

19 Mù ka mok kəkərè co wo to fe'lə mұ də mo yòyeη; jəη tse' mұ mok co mo ηgà fàk yòmòk.>

20 Anə geη yi lokok lo bohòtè' ye nə.

<<A ye ηga yi sə vè mandzè mweè səsap, ηga yi ka ntòwes fana tè' ye nə ye gesə lo yi, nè koksə manziη bohònà'. Yi caη lo, nè kə ko wumsə gesə lo nà' ndzə ni'ì yi, nè cepsə nà' bəboη.

21 Mo ye nə duk fa yi də, <Pàpa, mù a gù bəp bohòNwi, nè ye bohòwù sè' laη. Mù ka mok kəkərè co wo to fe'lə mұ də mo yòyeη.>

22 Tè' ye nə duk fa ye bohòηgàa fàak ye wèη də, <Wèeη jəη və cək nè nà' bògha' pwe' wàp, nè ni gesə fa yi mұ ni'ì. Wèeη gesə fa yi kwàη ndzə bohòyi sè', nè so fa yi kùuηgùp sè'.

²³ Ya wèenj kə jəŋ və mbònè nà' fùè càsə pwe' nà'a, nə sʉə ya vesùwèenj zɹ nə kwa.

²⁴ Bʉsè mo àm ènə à kɹɯ yè'sə laŋ, nə lùŋ fe'lè nə səmok; yi à bisə laŋ, nə yəèŋ nə səmok.> Wo à yè ŋga'a ŋgòsə kwa.

²⁵ <<Bum yè'sə ànə sə ye vɛ'nə ŋga mo tu ye nə cu ŋgòŋ. Yi ànə və, nə kuəp və nda'à wo fana yi yuk ŋga bwɪŋ sə yəm ŋki, nə sə kaŋ dzeŋ.

²⁶ Yi to mo ŋgà fàk tè' ye nəmòk, nə fek nà' də bʉp yiskok yàlɛ?

²⁷ Nà' tsok fa yi də, <Moma yo bwɪŋ foho vè yi, fana tè' yo sʉə mbònè nà' fùè gha' pwe' nə də bʉsè mo ye nə kə tsèŋ yi bèboŋ ŋga yumok ka bʉp.>

²⁸ Yi à yuk vɛ'nə, yi jok, nə də yi kà mɯ nda'à mok ni. Tè' ye nə tesə və sə mbiŋ, nə sə kə ləŋ mo tu ye nə.

²⁹ Mo nə duk fa tè' ye nə də, <Ja'a na yòo lùumŋgòŋ sè mù a fàk turə bohòwù, mù ka duk yo beŋ yuk; wù nə kà mɯ mo ndzə mòk də ves ŋge' am wèenj kwa bə zeŋ fa yuk.

³⁰ Fana mo yònè'e vèə, yi a bʉpsə wes mbàm bə bàà sàhà pwe', fana wù sʉə fa yi mbònè nà' fùè càsə pwe'!>

³¹ Tè' nə duk fa yi də, <Mo àm, wu cugè yòvesù fɛŋ, fana bum sè mù tse' yà' pwe'fo', a sè yò.

³² A kəkurè co a kaŋ, nə kwa anə, bʉsè moma yònè'e à kɹɯ, nə lù nə səmok, yi à bisə mè laŋ nə yəèŋ nə səmok!> >>

16

Ngà Fàk Nè Ngà Limŋgòŋ Nə Ye Ngà Fàk Nè

Zìnə

¹ Jisòs à mà' fa bwe ye wèŋ gbũ' mòk sòmok də, <<Ngà ghàk mòk à ye, nè yi à tse' ɲwè nəmòk nè yi à fa bum ye sè yi à tse' pwe' ndzə bohònà'. Bwiŋ sə kə tsoho fa yi də mo fàk ye nə sə ɲjesə bum ye sə.

² Ngà ghàk nə to nà', nə fek nà' də, <Mù yuk də wù sə gù yà ε? Tsok rɛŋsə fa mɯ bə fàak sè wù a gù pwe', bùusə wu nə kà ɲgà fàk àm mok ye fe'lə.>

³ Ngà fàk nə tsərə sə ntũ̀ yi də, <Masà àm jə fis-a fàak yè'sə ndzə bohòmũ̀, mù gũ yè'sə va? Mù ka gũgũ co mù tuŋ to nze yeŋ, mɯ duk-a də mɯ lɛŋ, yà' ye sè' marè'tu.

⁴ Mù rì yusə mɯ nə gũ sə laŋ, ya bwiŋ nə ko mɯ ɲge' ghà nè mù mè'rə fàak sə.>

⁵ Fana yi to benə bùũ sè wo tse' masà ye nə kəa pwe'fo'. Yi duk fa nè mantombi nə də, <Wù tse' masà àm kəa mbàm sù?>

⁶ Ngà' nə duk də, <A bùhũ mve' ɲkù mò'fis.> Ngà fàk nə duk fa fe'lə nà' də, <Cum nze, nə kòjəŋ ɲwàk nè'e com də a hum tàŋ.>

⁷ Fana yi duk fa fe'lə mòk də, <Kəa yò-ε sù?> Nà' də, <A tasàa gòm̀bi ɲkù mò'fis.> Ngà fàk nə duk fa nà' də, <Kòŋwàk nè ɲjò, nə com gesə ɲja də a hum fwame'.>

⁸ Masà ye nə à kùk ja'a mo fàk ye nə, nə kwasə nà' bə nsàp ɲkərə nè nà' tse' nə. Busə wèŋ rì də bùũ sè wo be' megu mandzè nzeŋgòn wèŋ rì ɲgòkərə bə bùũ awo nə casə bwe sè wo mwwe' mareŋ Nwì.>>

⁹ Fana Jisòs duk də, <<Wèŋ sə ko fa ni' awèŋ

ηγε' bə ghàha nzenḡòη sè ntèn, ya nga yà'a kà fàk mok kə tse' fana wo ko jəη nisə lo wen mvwe' lak sè wèen nə cum mam fo' mvèsè.

¹⁰ <<Nwè nè yi ye-a zìnə bə yusè yà'a jo fana yi nə ye zìnə bə yusè yà'a sè ghaη sè'. Nwè nè yi ye-a ye ηgà mvwès bə yusè jo fana yi nə ye mali ηgà mvwès bə yusè yà'a sè ghaη.

¹¹ A ye-a də wù ka ηwè nè zìnə bə ghàk nè wà nè sə nzenḡòη nè'e yeη, ye də aco fa ghàk nè zìnə nə ndzə bohòwù yè'sə ndà?

¹² A sè' də, a ye-a ηga wù ka zìnə bə yusè yà'a sè ηwè nəmòk yeη, ηwè nè yi nə fa wu sè yà'a nə ye sè yò-ε ndà?

¹³ Kaco ηwè nè mò'fis fak ηkwèn bohòmasà ba yeη; yi nə dzəm fis mòk, nə beη mòk, kènə aco yi sə fàk bohòmòk nè zìnə, nə kà mòk nə co yumok jə. Kaco wù fak bohòNwì, nə fak bohòmbàm yeη.>>

¹⁴ Bùu Faràsi sè wo à dzəm mbàm wèn à yuk bum yè'sə fana wo ywi'lə yi.

¹⁵ Jisòs nə duk fa ye yà'wèn də, <<Yà'a wèn sè wèen ḡùḡè də wèen yəəη mɯ lisè bwìη co bùu sè bèboη, nga Nwì rì wes yusè yà' cu sə ntùè wèn laη; bum sè bwìη tsərə də yà' tse' fàk wùrìη fana yà'a yusè Nwì bèη yà'.

¹⁶ Lùuk Musì bə bum sè ηgàa tsòhòbum Nwì wèn à còm sə à tse' ηàη kə wes mvək nè Jon ηgà bàptesè bwìη à yèto ye; ye jəη mvək ànə fana wo sə tsòho mok Ntirè nè Bèboη, nè nà'a bə nzak gaη ηkum Nwì fana ndàaηwè pwe' sə kurə ni fo' bə ηàη.

17 A ye-a sè' vɛ'nə fana a jəjo bohòntòbu bə nzenḡòn ḡòcà ḡesə lòfo', nə nonḡsə mvəm lùk nə mò'fis ḡòbùuḡ yusè wà.

Nzak Mè'rə ḡgwe

18 <<ḡwè nè yi mè'rə-a ḡgwe ye, nə jəḡ mòk fana ye də ḡḡèḡḡàḡ ko nto; ḡwè nè yi jə-a ḡwà nè ndum a mè'rə yi fana ye də ḡwè ànə ko sè' nto.>>

ḡḡà ḡhàk Bə Lasorò

19 Jisòs à mà' fe'lə ḡbɹ mòk sè' də, <<ḡḡà ḡhàk nəmòk à ye, yi sə ni meḡ cəək sè yà' ḡɹ nteḡ, nə sə zɹ meḡ zɹzɹ sè bəboḡ nùumbu pwe'.

20 ḡḡà jìḡ mòk à sə kè nòoḡ mvwe' ncùu ḡka' ye. Nì' ḡḡà jìḡ nə à mèḡù mvwe'è mvwe'.

21 Yi à sə dzəm də yi sə te'e zɹ zɹzɹ sè ḡḡà ḡhàk nə sə zɹ fana yà' sə bəhə ḡbɹ tsoḡ sə nze sə. ḡḡbɹ à sə vèə kè bərə mvwe' ye sə.

22 ḡḡà jìḡ nə à kɹɹ fana masinjàa Nwì wèḡ bək lo yi bohòAbràham. ḡḡà ḡhàk nə à kɹɹ sè', wo tuuḡ yi.

23 Yi a cu mvwe' ḡḡə' nè sə misè, nə sə ye ḡḡə' fo' wùriḡ. Fana yi fəsə kok lis, nə ye ḡesə lo Abràham mvwe' səsap, bə Lasoròḡɹ nì' nà'.

24 Yi to fis də, <Tè' am Abràham, koksə-a manziḡ bohòmè, nə tum Lasoròyi so ḡesə ndubo ye sə ndzèpè, nə kə fisə fa mɹ lùm àm bə zeḡ, bùusè lùm mis ènə sə teḡ barə mɹ wùriḡ.>

25 Abràham nə duk fa nà' də, <Mo àm, wù riḡ də wù à sə tse'ḡè bum sè bəboḡ yo ḡhà nè wù à cu ntòḡwəm, fana Lasorèsə tse' ye bum sè bɹp.

Yi cu ye nga'a nè', sə yuk lùm fana wù sə ye bwi yòmok ηgə' nè bɔp.

²⁶ A mè'rə-a yà'sə sè vɛ'nə fana wo gù maŋki mòk nè cəco wùriŋ mʉtsətsə'rəə wù bə vès. Wo à gù nà' də ya ηwèe kà ma ndzè bohòwù to lòto, ηwè nè ma nja kà bohòvès fɛɛŋ sè' to ya' vè to.>

²⁷ Anə geŋ ηgà' nə duk fe'lə də, <Ye də tè' am, mɛ lɛŋ wu də wu tum gesə lo yi nda'à tè' am.

²⁸ Bwema am sè mbəmbam cu mbwa tu awo tàŋ. Yi tipsə yà'wèŋ bwèrɛ aco wo kə ni sè' mvwe' ηgə'ə yè'sə.>

²⁹ Abràham duk fa nà' də, <Ŋwàak Musi bə ηgàa tsòhòbum Nwi wèŋ sè njamòk cu ca, wo yuk bohòyà'.>

³⁰ Yi duk də, <Tè' am Abràham, ka vɛ'nə yeŋ, bùsə ηwè nè yi tesə mvwe' kpɛ kə tsèŋ-a wo yi fana wo nə kupsə li.>

³¹ Abràham duk də, <A ye-a nga wo ka bohòMusì bə ηgàa tsòhòbum Nwi wèŋ yuk fana ye də ηwèe lòkok-a sè mvwe' kpɛ, nə geŋ fana kaco wo kupsə wo yeŋ.> >>

17

Nzak Səswifa

Bə Nzak Dzədzəm

¹ Jisòs à duk fa bwe ye wèŋ də, <<Məmùmsəə nə və tsoŋ li bohòbwìŋ yo; nə ye də a ηgə' nè bɔp bohòŋwè nè yi sə jə və məmùmsə nə.

² Anə boŋ bohònsàp ηwè ànə co wo swi' fa yi ηgòk mòk kə mihi, nə mak gesə lo yi bə zeŋ sə mvwe' ndzəp mòk nè cəco, nə noŋsə nè də yi gɛ bwe yè'e də mòok gɛ bɔp.

³ Wèeη sè jəη ηkərè bè tu awèη; a ye-a nga moma yo gù wu bəp wù sa'rə yi; a ye-a nga yi kupsə ntəm fana wù swifa yi.

⁴ A ye-a nga yi gù bəp bohòwù kè' sàmba nùmbu nè mò'fis, nè bəeη duk sè' kè' sàmba pwe' də <Swifa mə> fana, wu nè swifa tsoη yi.>>

⁵ Ngàa ntum Jisòs sè wèη à duk fa Tà də, <<Kùksə fa ves dzədzəm avès co ves naaη tu bohòwù.>>

⁶ Tà duk fa wo də, <<A ye-a nga wù tse' mègù-a dzədzəm momjo co mə ηgwì tɛ nè wo togè nà' də mostà nà'a, fana aco wù duk fa ntsəη tɛ càη nè'e də, <Cohò mvwe' yè'e, nè kə təəη ndzə tsətsə'rəə ndzəp nà'a> fana, tɛ nè nè yuk duk yònə.

Mandzè Nè Mofàk Tse' NgòFàak

⁷ <<A duk-a də mòk mən̄gorè wèη tse' mofàk ye, nè nà' sè wom fa yi fàk kè də nà' sè gùmsə fa yi nsùngaəη ye àlɛ. A ye-a nga yi bwì fohò wè ηgòη anə, aco wu nè duk fa yi də, <Cà cum nze nènàk, nè zɛ zɛzɛ> à?

⁸ Wu nè kà vɛ'nə duk. Wu nè duk lɛ də, <Lam fa mə zuzɛ am, nè fuhɛ ηgòcàsə fa mə yà' fana wu nè yon̄sə mə zɛ nè no wes yàm ηkuη, wù zɛ nè no yò.>

⁹ Yi nè kwasə mofàk nè də bùusè nà' gù mvəsè yi duk də nà'a gɛ sè à? Hai' ka ye lok!

¹⁰ Yà' mègù bohòwèη yàwèη sè' vɛ'nə, a ye-a nga wèη gù wes yusè wo duk wəη də wèeη gɛ fana wèη duk megu də, <Vèes yè'sə bwe fàk wà, vès gù mègù fàak avès, sè vès tse' ηgògù yà' co bwe fàk.> >>

*Jisòs Gũṣə
Ngàa Kuturu Hum*

¹¹ Mũmvè'nè Jisòs à sè cà ṅgòlòJòrosalèm fana yi ca mʉtsətsə'rəə nzeṅgòṅ Sàmàriyà bə Galìli.

¹² Yi ànə sə ni lo mvwe' mʉbuk lak mòk fana yi kʉrə bə ṅgàa kuturu mok wèṅ bwiṅ hum. Wo ànə sə təəṅ vèsə mvwe' mok mweè səsap,

¹³ nə sə fuṅ torə fis də, <<Masà, Jisòs, koksə-a manziṅ bohòvès-è.>>

¹⁴ Yi ànə ye yà' fana yi duk fa wo də, <<Wèṅ du kə niṅ tsok fa ni' awèṅ sə bohòṅgà fa satikà' ya yi ye wèṅ də ni' awèṅ rēṅ mok laṅ.>> Wo à sə lòo, yiya àwo nə me.

¹⁵ Mòk mʉṅgorè wo anə mò'fis à yə də yiya ye nə mèe fana yi bwi foho və maṅkwèṅ, nə sə fuṅ kwasə və Nwì.

¹⁶ Yi kə gbʉ noon sə kùhu Jisòs sə nze, nə sə kwasə nà'. Nwè ènə ànə ye ṅwèè Sàmàriyà.

¹⁷ Anə geṅ Jisòs nə fek də, <<Mè gũṣə ka bwiṅ hum yeṅ à? Sè vèke' fò?

¹⁸ Ye də ṅwè nəmòk ka nè co yi kə kùksə Nwì yeṅ, mègù ṅkùṅ nè'e à?>>

¹⁹ Fana yi bʉṅ duk fa ṅgà' nə də, <<Lòkok mʉtsə, nə lo yuyo, dzədzəm yògũṣə wu laṅ.>>

*Mũmvè'nè Gaṅ Nkum Nwì
Nè Vèè Sə
(Mat. 24:23-28, 36-41)*

²⁰ Bʉṅ Faràsi mok wèṅ à fek Jisòs də gaṅ ṅkum Nwì sə nè kè vè yè'sə sèṅ-nɛ? Fana yi duk fa yà'wèṅ də, <<Gaṅ sè Nwì sə vèè, ṅwè kà yà' bə lis jəja yə.

21 Kaco bwiiṅ nə duk də, <Wèeṅ ye yà'a yè'> kè də, <Wèeṅ ye yà'a yà'> sè' yeṅ, bùusè gaṅ sè Nwì sè yà'a m̃ṅgorè wèṅ.>>*

22 Anə geṅ Jisòs nə duk fa bwe ye wèṅ duk də, <<Mvèk mòk sè vèə nè wèeṅ nə dzəm vɛ'ɛ co wèṅ ye nùmbu mòk nè Mo Nwèe nə ye fo' fana wèṅ kà nà' yə.

23 Bwiiṅ nə sè duk fa weṅ də, <Kùk gèsə ndzə fa', yi nà'>, kè də, <Kùk gèsə ndzə fən, yi nè'> fana wù kà gè, nə kà wo sè' yù.

24 Mvè'nè mbùuṅ ba'agè m̃bu, nə reṅ jəṅ mamòk kə dzeṅ mamòk yà'a fana, nùmbu njàam ye, m̃u mo ṅwè, m̃u nə ye sè' vɛ'nə.

25 Megu də m̃u nə ye tsoṅ ṅgə' ṅkùuṅntèṅ, bùu sè niè' wèṅ beṅ m̃u sè' ṅkuṅ.

26 Mvè'nè yà' ànə ye m̃nə nùmbu sè Nuà yà'a fana nùmbu sè yàm, mo ṅwèe nè ye sè' vɛ'nə.

27 Wo à sə z̃u, sə no, wo sə caṅ gù, nə sə geṅ gù tètè kə wes nùmbu nè Nuà ànə ni ṅgwes fana ndzəp rwiṅ və kə zə wes wo pwe'.

28 Yà'a sè' m̃m̃vè'nè Lot ànə ye yà'a. Bwiiṅ à sə z̃u, nə sə no, wo sə ywiṅ bum, nə sə seen bum, nə sə bi bum, nə sə ci ndap;

29 fana nùmbu nè Lot ànə tesə gesə lo mvwe' lak Sodòm fana mis tsoṅ m̃bu bə nsàp lis mòk nè nà'a kuəgè mis maṅgəṅgèṅ, nə kə teṅ zə wes wo pwe'.

30 Nùmbu nè m̃u mo ṅwè m̃u nə yəəṅ fana yà'a nè ye sè' vɛ'nə.

* **17:21 17:21** Aco ncèp ènə ye sè' də, <<Gaṅ sè Nwì sè yà'a sənə ntum awèṅ.>>

³¹ <<Nùmbu ànə ye, ɲwè nè yi cu yòɲsə mɯ ndùndap, ɲga yi tse' bum mɯ nda'à, kà ɲgòkè jə yà' suhù tsə. ɲwè nè yi mənə nzum fàak nə kà maɲkwèɲ də yi kə jəɲ bum mɯ nda'à sè fohòlò.

³² Wèeɲ sə tsərə tse' yusè yà' ànə ye bohòɲgwe Lot.

³³ ɲwè nè yi làp-a də yi noɲsə yòɲsè ye fana yi nə bisə nà', fana ɲwè nè yi dzəm-a də yi bisə yòɲsè ye fana yi nə tse' nà'.

³⁴ Mɯ tsok fa wəɲ də nè ndzəmè ànə nè ye ɲga bwìɲ nòbə kè mò'fis ba, wo nə jəɲ fis lo mò'fis, nə me'rə noɲsə mòk fo'.

³⁵ Bèba nə sə gok beɲ mvwe' mò'fis wo ba; wo nə jəɲ fis lo nè mò'fis fana, nə me'rə noɲsə mòk fo'. (

³⁶ Mbəmbam baa nə sə fak nzum, wo jəɲ fis lo mòk, nə me'rə mòk.)>>

³⁷ Anə geɲ ɲgàa fàak ye sə wèɲ fek yi də, <<Anə ye ma fòTà?>> Yi duk fa yà' də, <<Mvwe' sè vè ni' nòoɲ, jìgawà' wèeɲ nə kə benə fo'.>>

18

Gbu' ɲwà ɲgwemfə Bə ɲgà Sak Nzak

¹ Jisòs à tsə' fa bwe ye wèɲ gbu' nè'e də ya yà'a sə leɲ pìriyà, nə kà wò.

² <<ɲgà sak nzak mòk à ye mvwe' lak mok, nè yi à sə kà Nwì wəpgè, nə kà bwìɲ sè' wəp.

³ ɲwà ɲgwemfə mòk ye mvwe' lak yà'sə sè', nè yi à sə vègè bohòɲgà sak nzak nə riɲriɲ. ɲwà nə à sə vè, nə sə duhu fa ɲgà' nə duk də, <Sak gapsə-a mɯ ves ɲwè nè yi bèɲgè mɯ nè'e-nè.>

4 Ngà' nò à sè bèŋ togè ntòbèŋnò fana ànò cum kok ghàr ngà' nò duk sè vèə yi də, <A ye-a sè də mɛ kà Nwì wəpgè, nò kà bwìŋ sè' wəp fana

5 megu bùusè ñwà nè'e sè kè fa mɛ ngə' wùrìŋ, fana mɛ nò sak fa yi nzak ye nò, bwèrɛ yi sè vèhə mali ngòlòksə mɛ ntu'.> >>

6 Fana Tà Jisòs duk fa wo də, <<Wèèŋ yuk-ε yàwèèŋ yusè ngà sak nzak nè yi ka zìnə tse' nò cèep-è.

7 Ye də kaco Nwì tèsə bùu sè yi à co'fis, sè wo sè lèŋ bohòyi nùm bə ndzəm sə yeŋ àlɛ? Aco yi cum casə mvək ngà yi ka yà' ntòyuk fa à?

8 Hai', mɛ tsok fa wèŋ də yi nò təŋ fa yà' gèm nò sak nzak nò nènək nò ye kəkurè. A ye-a sè vɛ'nə fana ghà nè mùu mo ñwèe nè bwìŋ vèə, mɛ nè yə bwìŋ ngà wo tse' dzədzəm ngòlèŋ Nwì, nò kà wòyo àlɛ-ò?>>

Gbu' Nwèə Faràsi *Bə Ngà Ko Mbàam Tas*

9 Jisòs à mà' gbu' nè'e bohòbùu mok sè wo à sè tsərə də wo bùu sè kəkurè mɛ lisè Nwì fana wo sə jəŋ bùu mok wèŋ co yusè wà.

10 <<Bwìŋ ba à lòmumvwe' ndap Nwì nè ghan ngòkè lèŋ pìriyà. Mòk à ye ñwèə Faràsi fana mòk ye sè ye ngà ko mbàam tas.

11 Nwèə Faràsi nò à təŋ, nò lèŋ pìriyà nè nje də, <Mù kwasə wu Nwì, bùusè mù ka yàm co bùu mok wèŋ yà'a yeŋ. Bùu mok yàwo ngàa limzu bum bwìŋ, ngàa cì' mvwès nò ye ngàa kohònto. Mù kwasə wu də mù ka co ngà ko mbàam tas nè yi nè'e sè' yeŋ.

12 Mɔ jəgè sənə nteŋ nè mò'fis nùumbu ba, nè dzə zuzɔ ŋgòleŋ wu. Yusè mù tse' pwe', mɔ cokfisgè mamòk ca ŋgòfa wu.>

13 Nɔgà ko mbàam tas nè ànə təəŋ ye mvwe' səsap. Yi kà lis mɔbu sè kùk ja'à gèsè, yi wa'a tse' bo, nè leŋ də, <Nwì, koksə manziŋ bohòmù nè mɔ ŋgà gù bɔp!>

14 Mɔ tsok weŋ də ŋwè ènə ànə bwìŋ foho lo la'à yi co ŋwè nè kəkurè mùlisè Nwì nè nonse mòk nà'a. Busè ŋwè nè yi jə fis kok lò-a ni' ye mɔbu fana wo nè jəŋ tsoŋ lo yi tsətsoŋ; ŋwè nè yi jə tsoŋ lò-a ni' nje sə nze fana wo nè jəŋ fis kok lo yi mɔbu.>>

Jisòs Sè Bəbweŋke' Wèŋ

(Mat. 19:13-15; Mak 10:13-16)

15 Wo à sə jə vè fa Jisòs bəbweŋke' də ya yi jweŋ yà' bə bo nè se yà' fana ŋgàa fàak ye wèŋ ànə ye ve'nə, wo jwa sa'rə bùu sə də yà'a kà ve'nə gù.

16 Jisòs ànə ye ve'nə, yi to bwe sə, nè duk də, <<Wèŋ me'rə bəbweŋke' wèŋ və bohòmù, nè kà wo mandzè lok; bùusè gaŋ ŋkum sè Nwì sə, tse' yà' nsàap sè co wo yè'sə.

17 Mɔ tsok fa weŋ ŋkəm duk də, ŋwè nè yi ka gaŋ sè Nwì sə co mvè'nə bweŋke' jəgè bum jə ye də kaco ŋgəŋgàŋ kə ni fo' yeŋ.>>

Ngə' Nè Bə Ghàk

(Mat. 19:16-30; Mak 10:17-31)

18 Nkwà' ŋwè bùu Jus mòk à vè kə fek Jisòs də, <<Cicà nè bèboŋ, yusè aco mù guu yè'sə yà, ya mɔ nè kə tse' lùŋ nè nà'a nè kà mè-ε?>>

19 Jisòs duk fa nà' duk də, <<Wù to mɔ də ɲwè nè bèboŋ bùu yà? ɲwè nè bèboŋ bùè, mègù Nwì yìyi.

20 Wù rì lùuk sə laŋ də, <Kà sàhà ko, kà ɲwè zə, kà yəyè, kà gèem mɔwès ko, nə wəp tɛ' yo bə ma yo.> >>

21 ɲgà' nə duk də, <<Mù à gù yè bum sè wù taŋsə yè'sə ɲga mù cu ntòmɔwà'ɲwè.>>

22 Jisòs ànə yuk vɛ'nə fana yi duk fa nà' də, <<Wù sə jamə mok yu nè mò'fis. Lòkè sɛŋ bum sè wù tse', nə gapsə fa ɲgàa jìŋ wɛŋ mbàam sə, ya wu nə tse' ghàk mɔbu; nə bɛ' mandzè yuŋ və mɔ.>>

23 Yi ànə yuk vɛ'nə fana ɲgùpcù gbɔ yi yèk, bùusè yi à ye ɲgà ghàk nè wù kà fùk.

24 Jisòs à kùk ja'a nà', nə duk də, <<Yà' gɔ vɛ'ɛ wùriŋ bohòŋgàa ghàk ɲgòkè ni mɔwɛ' gaŋ Nwì sə!

25 Joho cà bohònàm nè yi yam co nàmbà'rè nà'a ɲgòcà torə tesə ndzənə wɔ patà', nə noŋsə bohòŋgà ghàk ɲgòkè ni mɔwɛ' gaŋ sè Nwì sə.>>

26 Bùu sè wo à yuk ncèp ènə à duk də, <<Ye də aco ɲwè nè yi tse' to lùuŋ yè'sə ndà?>>

27 Jisòs duk fəsə də, <<Yusè yà' gɔ bohòŋwè ɲgògù to fana aco Nwì gɔ ye yà' yo.>>

28 Ànə geŋ Pità duk də, <<Ja'a na, vès a mè'rə wes ndap avès pwe', nə bɛ' vè nə wu.>>

29 Jisòs duk də, <<Mù sə tsè' fa wɛŋ zìnə də, ɲwè nè yi mè'rə-a ndap ye kè ɲgwe ye kè bwema kè tɛ' bə ma, kè bwe ye də a njo gaŋ ɲkum sè Nwì sə fana,

30 ɲgèŋgàaŋ nə tse' sè yà' càsə yà'sə nie', nə

tse' lùŋ nè nà'a nè kà mè nè ntsə'mòk sè'.>>

Jisòs Cèp Mvə'nè Kpɛ Ye

Nə Ye Səmok

(Mat. 20:17-19; Mak 10:32-34)

³¹ Jisòs ànə jəŋ fəsə gəsə ŋgàa fàak ye sè hum-ncòp-ba sə wèŋ, nè tsok fa wo də, <<Wèeŋ yeè, vesùwèŋ sə kok lòyè'e mɛ Jòrosalèm, fana bum sè ŋgàa tsòhòbum Nwì wèŋ ànə com bə liŋ am Mo Nwèe nè buuŋ və zìnə.

³² Wo nè fa mɛ bohòbù lakmvum, fana wo ywi'lə mɛ, nè gu fa mɛ bum marè'tu wùriŋ, nè te mɛ bə nte.

³³ Wo nè ləp mɛ, nè zə mɛ, mɛ kpɛ fana a kə dzèŋ nùmbu nè tɛ', mɛ luŋ lokok səmok.>>

³⁴ Anə geŋ wo kà yusə yi cèp yè'sə rɛeŋ lok. Anə ye ŋga ŋkərè awo nsàp nè co wo kà bə ncèp ènə rɛeŋ, fana yà' ye bohòwo anə sèswihì ŋgòrɛeŋ yà'.

Jisòs Gəŋsə Ngà Jì Lis Nè Yi Ngà Lɛeŋ Bum

(Mat. 20:29-34; Mak 10:46-52)

³⁵ Jisòs nè ànə kɛəp və mvwe' lak Jèrikù fana ŋga ŋgà jì lis mòk cu ŋgɛ mandzè anə, nè sə lɛeŋ bum.

³⁶ Yi ànə yuk ŋga bwìŋ sə cà fo' wùriŋ fana yi fek də sə gù yàɛ.

³⁷ Fana wo tsok yi də, <<Jisòs nè mvwe' lak Nazàre sə cà yi.>>

³⁸ Fana yi waŋ torə fis də, <<Jisòs mo ŋkum Devid, koksə-a manziŋ bohòmù-è.>>

³⁹ Buu sè wo ànə ye fo' sə wèŋ gham yi də yi cum gəe'. Yi ghaha wesə ye ghaha də, <<Mo Devid, koksə manziŋ bohòmù!>>

⁴⁰ Anə geŋ Jisòs foho təəŋ, nə də wo jəŋ və nà'. Nà' ànə kuəp və fana yi fek ŋgà' nə də,

⁴¹ <<Yusè wù dzəm də mɛ ɣə fa wu yè'sə yà? >> Ŋgà' nə duk də, <<Tà, mùk fa mègù mɛ lis ya mɛ ye bum sèmok.>>

⁴² Jisòs nə duk fa nà' də, <<Lis yo sə muhu, ntəm yònè wù fa bohòmù ɣəŋsə wu laŋ.>>

⁴³ Anə geŋ lis ye sə muhu sè ghà nə fo' fana yi gi yuŋ lo Jisòs nə, nə sə kuksə Nwì. Bùu sè wo ànə ye nsàp yu ènə pwe' à kùksə Nwì sè'.

19

Jisòs Bə Sàkiyò

¹ Jisòs ànə kə ni mvwe' lak Jèrikù, fana nə sə gi ŋgòcà lòo.

² Ŋwè nəmòk ànə ye fo' nè liŋ yee də Sàkiyò. Yi ànə ye ŋkum ŋgàa ko mbàam tas mòk nè ghan yi, nə ye sè' ŋgà ghàk.

³ Yi lap co yi ye Jisòs, mandzè kà ye bùusè bwìŋ à ye fo' wùriŋ fana yi ye bwi ye ŋwè nè ləm.

⁴ Anə geŋ yi caŋ lo mantombi, nə kə kok tɛ mòk nè wo to nà' də Sikamòdə ya yi ye nà', bùusè Jisòs nə ànə ye ŋgòcà ma nà'nə.

⁵ Jisòs ànə kə wes mvwe' sə fana yi kùk kok gesə lo mbwa, nə duk fa nà' də, <<Sàkiyò, suhu tsoŋ mbwa nènàk bùusè mɛ nə nooŋ ntinə nè'e mɛ nda'à wù.>>

⁶ Anə geŋ yi suhu tsoŋ nènàk, nə kə jəŋ nà' bə kwəkwa.

⁷ Bwìŋ ànə ye vɛ'nə fana wo ŋwəm wes wo pwe' də, <<Yi lòŋgòkè nòoŋ bə ŋwè nè yi ŋgà gù bup.>>

8 Sàkiyònə lokok duk fa Tà nə də, <<Yeè Tà, mə nə gapsə bum am mʉtsətsə'rè bə tsətsə'rè, nə fa mamòk bohòngàa jìŋ wèŋ. A ye-a ŋga mù a limzə yu ŋwè nəmòk fana mə nə lak fəsə fa yi yà' kè' kwè.>>

9 Jisòs duk fa nà' də, <<Lùŋ vè mʉmvwe' ndap nè'e ntinə, bùusè wu mo Abràham sè'.

10 A yè'sə də mʉu mo ŋwè, mù a vè ŋgòkè ləp nə lunşə bùu sè wo à bisə.>>

Gbu' Bwiŋ Tε' Sə
Wo A Gàp Fa Wo Mbàm
(Mat. 25:14-30)

11 Mʉmvvè'nè bùu sə wèŋ à sə yu'rə bum yè'sə fana yi tsok fa mali wo gbʉ' mòk. Anə ye ŋga yi kʉəp lòJòrosalèm fana bùu sè bə yà'wèŋ à ye sə, à sə tsəm yàwo də gaŋ ŋkum sè Nwì sə nə yəəŋ ghà nà'nə.

12 Fana yi duk də, <<Ŋwè nəmòk à ye nə yi à tesə mə ntòmbii ŋkum. Yi lòmvwe' lak mok sè sèsap* də wo kə koksə yi gaŋ ya yi bwi vè la'à yi.

13 Yi benə bwe fàak ye wèŋ bwiŋ hum, nə fa wo mbàm ncùhù hum. Yi duk fa yà' də yà'a sə ywiŋ seŋ bum bə zeŋ tè yi bwi foho vè.

14 Anə geŋ bùu lak ŋkwà' ŋwè nə wèŋ beŋ yi. Wo tum lo bùu mok wèŋ maŋkwèeŋ yi bə ntirè də, <Vès ka dzəm də ŋwè ànə ye ŋkum àvès dzəm.>

* **19:12 19:12** Mvèk ànə à ye, wo koksə ŋwè də yi ŋkum fana yi lo lak Rumà ya ŋga ŋkum nè ghaŋ nè fo' nə cumsə yi mə dzə'ə.

15 <<Anə geŋ wo koksə yi gaŋ sə, yi bwi foho və. Yi to benə bwe fàak sè yi ànə fa wo mbàm sə, də ya yi ja'a də yà' a tse' swe' mbàm sù nɛ.

16 Nwè nè mantombi à vèə, nə duk də, <Tà, mbàm nè wù a fa mɛ mò'fis nə a bùuŋ mok hum.>

17 Nkwà' ŋwè nə kwasə nà' də, <Wusùkù', mo àm-a', wù gù bəboŋ. Wù nitsə' zinə yòbə mɛyu nè nà'a momjo laŋ, fana mɛ gu wu ŋga'a ŋgòkotse' buhu lak hum.>

18 Nwè nè ba à vèə, nə duk də, <Tà, mbàm nè mò'fis nə, a bùuŋ mok tàŋ.>

19 Yi duk fa nà' də, <Wù tse' yòsə' buhu lak tàŋ.>

20 Mòk à vè sè', nə duk ye də, <Tà, mbàm yònə nè', mù a kì lòksə nà' ndzənə gácək.

21 Busè mù a sə wəp də wu nsàp ŋwè nè wù gu wùriŋ. Wu te'e jəgè yusè wù anə ka nonʂə, nə sə kɔp jəŋ yusè wù à ka wù bi.>

22 Yi duk fəsə fa nà' də, <Mɛmvè'nè wù cèp də mɛ nsàp ŋwè nè vɛ'nə yà'sə, mɛ nə sak wu sè' vɛ'nə. Wu mo nè bɔp! Wù riŋ də mɛ ŋwè nè mù gu wùriŋ, nè mɛ te'e jəgè yusè mù à ka nonʂə; mù sə kɔp mvwe' sè mù à ka bi àlaa?>

23 Nə gu va bwèrɛ wù à kè gèsə fa mɛ mbàm am sə mvwe' ŋgwa' mòk, də ya mɛ vè ŋgòjə yà', ŋga mɛ swe' na mbwa-ɛ?>

24 Yi bùuŋ duk fa bùu sè wo à ye fo' sə wèŋ də, <Wèeŋ fep fis jəŋ ncùhù nè bohòyi nə, nə fa nà' bohòŋwè nè yi nə tse' fa' ncùhù hum nà'a.>

25 Wo duk fa yi də, <Tà, yi tse' ncùhù hum ye laŋ!>

²⁶ Nkwà' ηwè nə də, <Mɔ tsok fa wɛŋ də ηwè nè yi tse'-a yo fana wo nə naaŋ yamsə fa yi mok. Nə ye də bohòŋwè nè yi ka ye yumok tse' nə, a megu-a sè mɔyu nè jo nè yi tse' nà' nə, wo nə jəŋ fis gesə nà' ndzə bohòyi anə fo'.

²⁷ A ŋga'a mok bohòbùu sè wo sə bèŋ mɔ də mɔ nə kà ŋkum awo ye yè'e wèŋ. Wèŋ jəŋ və wo fɛn, nə sɔə wo mɔlisə mù.> >>

Jisòs Ni Lak Jòrosalèm

Co Nkum

(Mat. 21:1-11; Mak 11:1-11; Jon 12:12-19)

²⁸ Jisòs ànə cep wes yè'sə fana yi sə lo mantombi ŋgòkok lòmɔ Jòrosalèm.

²⁹ Yi à kɔəp və mɔwe' lak Befà bə Betani fana wo wəsə və mɔwe' nda Olip. Yi tumsə gesə ŋgàa fàak ye ba.

³⁰ Yi duk fa yà'wèŋ də, <<Wèŋ du mɔwe' lak sè ndzə yà'a, wèŋ sə nikok lòntèn, wèŋ ye mɔmndè' mòk nè ηwè ka nà' kok yuk; wèŋ fiŋ jəŋ və nà' fɛn.

³¹ A ye-a ŋga ηwè mòk fek wɛŋ də wèŋ sə fi nà' bùu yàɛ fana wèŋ duk fa yi də, <Tà tse' fàk bə zɛŋ.> >>

³² Bùu sè yi à tum sə à lòo, nə kə ye megu sè' mɔvè'nè yi duk wo sə.

³³ Mɔvè'nè wo à sə firə mɔmndè' nə fana ηwè nè yi tse' nà' nə fek wo də, <<Wèŋ sə firə mɔmndè' nə bùu yà?>>

³⁴ Wo duk fa yi də, <<Tà tse' fàk bə zɛŋ.>>

³⁵ Anə geŋ wo jəŋ və fa Jisòs nà'. Wo fwɛŋ cèək awo, nə naaŋ fa mɔmndè' nə mɔŋkwèɛŋ, nə cumsə Jisòs mbwa.

36 Mùmchè'nè yi à sè kok lònà' fana wo fwen nonşè lo cèèk awo sè mandzè anè.

37 Wo ànè kuəp vè Jòrosalèm, nga wo sè suhu tsə mok nda Olip nè fana maŋgo bù nè wo à sè yù yi nè wèŋ ye ŋgòkwa, nè sè fuŋ kuksə Nwì bə nsàap bum maŋgəŋgèen sè wo yə sə.

38 Wo sè duk də, <<Nwii se ŋkum nè yi vè mənə liŋ Tà! Fifi ye məbu, kəkəksəə ye bohòNwì nè yi yam cəsə yà lònŋ fo'.>>

39 Anə geŋ bùu Farasi mok sè wo à ye sè' maŋgorè anə duk fa Jisòs də, <<Cicà, jwa bwe yo yè'e də wo cum gəe'.>>

40 Jisòs duk fa wo də, <<Mə tsok fa wen də wo cu-a gəe', liis yè'e cep cù.>>

Jisòs Wa Fa Lak Jòrosalèm

41 Yi ànə kuəp və, nè ye ntəm lak nè fana yi yeto ŋgòwa fa nà' də,

42 <<Anə ye-a nga'a də wù riŋ yusè aco yà' jəŋ vè fifi bwèrà. Megu də kaco lis yo ye yà' nga'a yeŋ.

43 Numbu mòk sè vè bohòwù, nè bùu sè wo sè bèŋ wuu nè vè dzè' bohòwù, nè gəm dzooŋ wu ŋgəŋ ma nè fòpwe'.

44 Wo kuəmsə mak mbàandap yo sè nze, nè le' mak bùu yo bə bwe yo sè wo cu məmvwè' vèəm ndap yo sè pwe'. Wo nè kà lis nè mò'fis mənə mòk mè'rə naaŋ bùusè wù à ka ghà nè Nwì à kə ke' yə wen nè riŋ.>>

Jisòs Bè'fis Ngàa Sèŋ Bum

Mə Ndap Nwì Nè Ghaŋ Nə

(Mat. 21:12-17; Mak 11:15-19; Jon 2:13-22)

⁴⁵ Anə geŋ yi kə ni lo mʉmʉwwe' ndap Nwì nè ghaŋ nə, nə sə be'fis bùu sè wo sə sèeŋ bum mbwa.

⁴⁶ Yi sə cep də, <<Wo à còm nòŋsə ndzənə ŋwàk Nwì, sə kum ndap Nwì nè ghaŋ ènə də, <Ndap nè njàm nə, nə ye ndap nè ŋgòleŋ mbwa pìriyà;> fana wèŋ jə bùsə nà' ndap ŋgàa yè wèŋ.>>

⁴⁷ Yi à sə yə'rə bwìŋ mʉmʉwwe' ndap Nwì nè ghaŋ nə nùumbu pwe'. Ngàa fa satikà' bə ŋgàa yə'rə fa bwìŋ lùk bə bùu sè ghaŋ sə wèŋ sə lap ŋgòzə yi.

⁴⁸ Wo kà yusə co wo gu sə rì bùusə bwìŋ pwe' à dzəm tse' mègù ncèp nè nje nə.

20

Fa Jisòs Nàaŋ Ndà?

(Mat. 21:23-27; Mak 11:27-33)

¹ Nùumbu mòk à ye ŋga Jisòs sə yə'rə bwìŋ, nə sə tsoho fa wo Ntirè nè Bèboŋ nə mʉmʉwwe' ntòmbi ndap Nwì nè ghaŋ nə fana ŋgàa fa satikà' sè ghaŋ bə ŋgàa yə'rə fa bwìŋ lùk nə ye bù ŋkwàha bùu Jus wèŋ kə tseŋ yi.

² Wo à vèə, wo fek yi də, <<Vès dzəm ŋgòrì də wù gù bum yè'sə bə nàaŋ sè fò? Kènə fa wu nàŋ ndà də wu gu yà' ε?>>

³ Yi duk fa fəsə yà'wèŋ də, <<Mu tse' ŋgòfek weŋ yusəmok yàm sè', wèeŋ tsok fa mu-a də,

⁴ mʉwwe' sè Jon ànə jəŋ nàaŋ sè ŋgòbàptesə bwìŋ fo' yà'a ànə və bohòNwì kè yà' ànə tesə bohòbwìŋ-ε?>>

⁵ Wo à yèto ngòcèp bæ zeŋ, nə sə fe'rə ni' awo də, <<A tsok fa yi yè'sə da? Bəsə a duk-a də, ɲaən sə à sə vè bohòNwì fana yi nə fek fe'lə ves də, ànə geŋ vesùwèŋ kà yusè Jon à sə cèep dzəm bùu yà le.

⁶ Nə ye sè' də a ye-a ɲga a duk də, ɲaən sə à tesə bohòbwiŋ fana bwiŋ nə təm ves bæ lis, bùusè wo à dzəm yàwo zìnə də Jon à ye ɲgà tsòhòbum Nwì.>>

⁷ Fana wo duk fa nà' də wo ka mvwe' sè yà' ànə vè sə riŋ.

⁸ Jisòs duk bwi fa wo ye sè' də, <<Ye də mɔ nə kà weŋ nsàp ɲaŋ nè mù tse' ɲgògù bum yè'sə bæ zeŋ nə sè' tsè'.>>

Gbu' Ngàa Kùk Nzum

Sè Wo A Ye Bɔp

(Mat. 21:33-44; Mak 12:1-12)

⁹ Anə geŋ Jisòs ye ɲgòtsə' fa bùu sə wèŋ gbu' nè'e də, <<Nwè nəmòk à bì nzum ye, nə tes yà' bohòbùu səmok də ya yà'wèeŋ nə sə lak yi. Yi ànə fa wo fana yi ye'e lo mvwe' lak mok, nə kə cum mam fo' mvèk səsap.

¹⁰ Mvèk nè ɲgòkɔp bum sè mɔnzùu sə ànə kɔrə fana ɲgà nzum nə tum ɲgà fàk ye mòk də nà'a lo bohòbùu sè mɔnzùu yi sə, də yà'a fa yi ma nje. Bùu sə wèŋ ləp yi, nə tum fəsə lo yi botu.

¹¹ Yi tumsə fe'lə ɲgà fàk ye mòk. Wo ləp nà'nə sè', nə koksə nà' marè'tu vɛ'ɛ, nə tum fəsə lo nà' sè' botu.

¹² Yi tum ɲgà fàk ye mòk sè' nè tɛ'. Wo fa nà'nə mvwe', nə be' fis gesə yi fo'.

13 Fana ngà nzum nè duk dè, <Mù gù kok yè'sə va? Mù tum lɛ mo àm nè mù dzəm yi wùrɪŋ nè'e, kàmòk wo yə-a dè a yi, wo nè wəp li tsoŋ yi!>

14 Bùu sè múnzuù sè wèŋ ànə ye nà' fana wo duk mɛŋgorè àwo anə dè, <Nè'e ngà'a monè ndzə vèə yi nè ñkwà' ñwè nè kà-a ye, yi nè cum mwè' kùu nà' yi nè. Vesùwèeŋ zə yi, ya bum ye sə ye mok sè yàvès.>

15 Anə geŋ wo kə ko fis yi múnzuù anə, nè zə yi. Ye dè ngà nzum nè nè gù bohòbùu yè'sə wèŋ va?

16 Yi nè və kə zə bùu sè wo tse' nzum ye sə wèŋ, nè jəŋ fa nzum sè bohòbùu mok sè zok.>>

Bùu sè wèŋ ànə yuk wes vɛ'nə fana wo duk dè, <<Nwì gù co yumook kà vɛ'nə ye yuk.>>

17 Fana Jisòs kək ja'a wo jwaan, nè fek wo dè, <<Ye dè yusè wo à còm nòŋsə yà' ndzənə ñwàk Nwì yè'e dè yà? Də, <Lìs nè ngàa ci ndap wèŋ à dzèeŋ màk nòŋsə nà' dè nà'a bup nè kè tse' ghak fe'lə fàk mok sè' zeŋ.*>

18 Ñwè nè yi kè gbù-a mənə lìs ànə, ngèŋgàŋ tiŋ sam zəzok, nè ye dè a ye-a ngà nà' gbù ñwè nəmòk muni'i fana nà' gok fam ngèŋgàŋ.>>

19 Ngàa yə'rè lùk bə ngàa fa satikà' sè ghan wèŋ sè lap mandzè dè wo ko yi ghà nà'nə bùusè wo à rì dè nà' màk fa gbù' ànə bohòwo. Fana megu dè wo sə wəp dè bwìŋ nè jok.

Fa Nwì Yu Ye
Nə Fa Kaisà Yu Sè Ye
(Mat. 22:15-22; Mak 12:13-17)

* 20:17 20:17 Ye Màtiyò21:42

20 Anə geŋ wo sə kək yi, nə tum fa yi mfuəp sè wo sə gu borə co wo bùu sè zìnə. Wo sə gu vɛ'nə də ya wo ko yi bə yumok sè yi nə cɛp, ya wo fa yi bohòŋgàa fàak sè wo tse' nàŋ mvwe' nze govənonè fo' nə.

21 Wo fek yi də, <<Cicà, vès rì tse' də wù sè cèp, nə sə yə'rə fa bwìŋ yusè yà'a zìnə; nə ye sè' də wu kà ŋwè gè m ko fagè, nə sə yə'rə fa bwìŋ bum sè yà'a bə mandzè Nwì bə zìnə.

22 Vès dzəm də wu tsok-a ves, lùuk vesùwèŋ sè tsè' də, a bəboŋ co vès sə lak fa ŋkum Kaisà nè mvwe' lak Rumà tas kè ka' ε?>>

23 Yi riŋ də yà' sə bùə yi fana yi duk fa yà' də,

24 <<Wèeŋ jəŋ və fa mɔ-a mbàm mòk è. Wo còm naaŋ mɔnə mbàm nə yè'e liŋ ndà, nə ye mbwa yè'e sè' si ndà?>> Wo də, <<A sè ŋkum Kaisà.>>

25 Fana Jisòs duk də, <<Ŋh̄. Làk fa Kaisà yusè yà'a sè ye, nə fa Nwì yusè yà'a sè Nwì.>>

26 Fana wo kà yumok sè co wo ko yi bə zeŋ mvwe' bwìŋ də yi cèp vɛ'ε tse'. Megu də wo ànə yuk mvè'nə nà' cèp fəsə fa wo sə fana wo mərə, cù loho wo.

Nzak Nè NgòLòkok Mvwe' Kpɔ

(Mat. 22:23-33; Mak 12:18-27)

27 Bùu mok sè wo à sə to wo də bùu Sadusi wèŋ à vè kè tsəŋ yi. Bùu yè'sə wèeŋ bùu sè wo dukgè yàwo də kaco ŋwè lokok fe'lə mvwe' kpɔ yeŋ.

28 Wo à vè, nə fek yi də, <<Cicà, Musi à còm nèm fa ves lùk mòk də, a ye-a ŋga tètàa ŋwè

nəmòk kpɛ me'rə-a ŋwe ye ŋga bə nà' ka mwe tse' fana moma yee nə jə tsoŋ ŋwà nə, ya bə nà'a dzə fa tètà ye nə yi kpɛ nə bwe.

²⁹ Yumook yè' də bwema mok wèŋ à ye tu awo sàmba. Fana nè mwè nə jəŋ ŋwàŋwè, nə kpɛ me'rə nà' ŋga bə nà' ka mwe tse'.

³⁰ Nwè nè ba jəŋ ŋwà nə, nə kpɛ me'rə nà' sè' ve'nə.

³¹ Nwè nè tɛ' jəŋ bwi ŋwà nə sè'. Yà' à mègù ve'nə tètè wo sè sàmba sə pwe' à kpɛ wes ŋga nè mò'fis ka mwe bə ŋwà nə dzə.

³² A cu, ŋwà nə kpɛ ye sə sè'.

³³ Ye də nùmbu nè bwiiŋ nè lòkok mvwe' kpɛ nə ye nùu, ŋwà ènə nè ye ŋwe ndà. Busè wo a jə yi wo sàmba pwe'fo'.>>

³⁴ Jisòs duk fa wo də, <<Mbəmbam bə bəba sè niè' cugè co ŋwe bə ndum.

³⁵ Megu də bùu sè wo kəkərè ŋgòlòkok mvwe' kpɛ ghà ànə sə nè kà gù mok cu fe'lè.

³⁶ Busè wo mok co masinjàa Nwì nə ye fe'lə bwe Nwì sè', njo nè wo a lòkok mvwe' kpɛ.

³⁷ Musi nə à nitsè' bə tu ye jəja də bwiiŋ nè lòkok mvwe' kpɛ. Mvwe' sè yi à còm bə nzak tu nè mis à sə kuə mbwa nà'a fana yi sə to Tà də nà'a Nwì Abràham, nə ye Nwì Azik nə ye Nwì Jàkop. Nwì à cèp ve'nə ŋga wo à kpɛ lòlanj.

³⁸ Yà'a sə nitsè' də bùu yè'sə cu fe'lə ŋwəm, njo nè yi ka Nwì bù kpɛkpɛ yeŋ, yi Nwì bùu sè wo cu ŋwəm. Busè bə tsətsərè nè Nwii də, ndàanwè pwe' cu ŋwəm.>>

³⁹ Anə geŋ ŋgàa yə'rè fa bwiiŋ lùk mok wèŋ duk fa yi də, <<Cicà, yusè wù cèp yà'sə

bòwùrìŋ.>>

⁴⁰ Búsè ñwè à ka nè co nà' fek yi yumok mok ghùsə ja'a lok fàk.

Nzak Nə Bə Liŋ Krest

(*Mat. 22:41-23:36; Mak 12:35-40; Luk. 11:37-54*)

⁴¹ Anə geŋ Jisòs fek wo də, <<Aco wo duk də ñwè nè wo togè yi də <Ŋkum ñgà gè m bwiŋ> nè ye ñgwì b̀ Devìd yè'sə va?

⁴² Búsè Devìd nè bə tu ye à cèp bə liŋ ñwè ènə ndzənə ñwàk Sàam duk də, <Tà Nwì à duk fa Tà à m də, <<Cum fεεŋ bo ma mà'a mù,

⁴³ tètè m̀ nè gu b̀ sè wo bènɣè wu, wù nən tes kù m̀ ni'ì wo ànə.>> >

⁴⁴ A ye-a də Devìd nè sə to nà' də Tà, ye də aco yi ye bwi bohòDevìd anə mwe yè'sə vale?>>

Jisòs Də Bwìŋ Jəŋ Ŋkərə Bə Yusè Ngàa Yə'rè Lùk Sə G̀

⁴⁵ Fana yi à cèp fa ngàa fàak ye wèŋ nga bwiŋ pwe'fo' sə yuk də,

⁴⁶ <<Wèŋ jəŋ ñkərə bə ngàa yə'rè lùk sè wo dzəm ñgòni tse' cèək sè səsap, nè dzəm də bwiŋ cepsə kε'ca wo m̀ntὲŋ, nè dzəm mvwe' ncum sè b̀boŋ m̀mvwe' ndap piriya, nè dzəm də a dzèŋ mvwe' ñkàk, wo cum megu mvwe' sè ya bwìŋ wəp wo co b̀ sè ghaŋ.

⁴⁷ Wo lim zə bum bàa yepmfə wèŋ, nè sə gu b̀psə ndap awo, nè sə gu basə piriya sè səsap ñgwàŋ. Ŋgə' nè njàwo nè kə yam gha' pwe'fo' njo bum yè'sə.>>

21

Fəfa Nwà Ngwemfə Nəmòk (Mak 12:41-44)

¹ Jisòs à cu mùmuvwe' ntòmbi ndap Nwì nè ghan, nè kək kok mvəsè ngàa ghək wèŋ sə gèsè tsoŋ fəfa awo sənə ŋkùp nè wo gèsəgè ca nè.

² Yi ye nga nwà ngwemfə mòk nè yi ngà jìŋ gèsè tsə mánini ba.

³ Fana yi duk də, <<Mu tsok wèŋ yusè yà'a zìnə də nwà ngwemfə nè yi ngà jìŋ nè'e fa càsə ghək wo pwe' yi.

⁴ Busè wo sə fa yàwo nga wo tse' ŋkùuŋ, fana nwà ngà jìŋ nè'e fa wes ye mumbàm zu nje nè yi tse' nè pwe' nè pwe'.>>

Jisòs Tsè' Bum Sè Yà'a Nè Ye Nga Yi Kəp NgòVə

(Mat. 24:1-14; Mak 13:1-13)

⁵ Bùu mok wèŋ à sə cèp fo' mvè'nè də ndap Nwì nè ghan nè bònve'ε bə liis sè wo à ci nà' fo', nè ye bə bum sè wo à fa Nwì ngògù bònse ndap ye nè fo'. Jisòs duk fa wo ye də, ⁶ <<Bum sè wèŋ sə yə yà' yè'e pwe', nùmbu mòk sə vèə nè lis nè mò'fis nè kà mənə mòk fa'nə naaŋ mam. Wo nè kuəmsə wes yà' pwe'.>>

⁷ Fana wo fek yi də, <<Cicà, tsok fa a ves ghà nè bum yè'sə nè ye-è, nè ye sè' də yusè yà'a nè niŋtsok də bum yè'sə kuəp laŋ sə yè'sə yà?>>

⁸ Jisòs duk fa wo də, <<Wèeŋ jəŋ ŋkərə ya nwə nəmòok kà wèŋ bòrè, bùusè bwiiŋ nè və ŋkùuŋ sè wo nè sə ci' m̀vwès də, <Mu yi nè Nwì à duk

də yi nə tum nə, mvək nə kuəp laŋ.> Wèŋ kà wo bɛ' lòswì.

⁹ Nə ye də wèŋ yuk nzak dzè' nə ye bə mvè'nè bwìŋ sə kùəm kɛ' fana wèŋ kà wəp, bùsè bum yè'sə nə ye to tsoŋ ntòvɛ'nə ŋkuŋ. Bum yè'sə ye-a sè' vɛ'nə fana mvè'nè bum nə lə nə, nə kà sè ntòkè dzèŋ.>>

¹⁰ Anə geŋ yi sə tsoho fa mali wo də, <<Bòp lak mook nə lə bə bòp lak mok, ŋkum mok lə bə ŋkum mok sè'.

¹¹ Nze nə nə sə tsoho vɛ'ɛ wùriŋ fana njè bə ŋgə' ye kɛ' lo mvwe' bòp lak mok zok zok nduk. Fana bum sè co yà' koksə ŋwè wuə bə bum mok sè yà' sə nitsə' mvək nè də nzeŋgòoŋ nə me wèŋ nə sə yəəŋ mabu wùriŋ.

¹² Ŋkuŋ bum yè'sə nə sə ye fana wo nə ko to ntòwèŋ ŋkuŋ. Wo nə ko wèŋ, nə yeŋsə wèŋ ŋgə', nə jəŋ lo wèŋ mɔmvwe' ndap piriya ŋgòsak wèŋ, nə jəŋ lo wèŋ mɔmvwe' ndap-ndzəm wèŋ sè'. Wo nə kə jəŋ lo wèŋ bohòŋkum bə govə̀nòwèŋ pwe'fo' bùu liŋ am.

¹³ Nà'nə nə ye yà'sə sè' mandzè bohòwèŋ ŋgòtəəŋ, nə tsoho fa bwìŋ ncèp nè njəm.

¹⁴ Wèŋ riŋtse' yè'e sə ntùu wèŋ də ŋwèe kà də yi sə tsərə də wu nə sə cɛp fəsə fa wo yè'sə də yà duk.

¹⁵ Bùsə mɔ nə fa wèŋ cù bə ŋkərə nsàp nè wù cèp fana cù loho bùu sè wo sə bèŋ wèŋ sə, wo kà yusè ŋgòcèp fe'lə mok rì.

¹⁶ Anə sə seŋ wèŋ bùu awèŋ co bùu sè wo dzə wu wo, bə moma yo, nə ye bwe tè' yo bə ŋge' yo wèŋ. Mook sè wo nə zə wèŋ zəə.

17 Bwìiṅ pwe' nə beṅ wen njo liṅ am sə.

18 Megu də, nùəmtu àwèṅ nè mò'fis nə kà bisè.

19 Wèeṅ təəṅ-a gəgəṅ, yà'a mvə'nè wèeṅ nə təsə yòṅsəə awèṅ sə.

Ngə' Nè Nà'a Nə Ye Nkuṅ Nzeṅgòṅ Me

(Mat. 24:15-31; Mak 13:14-27)

20 <<Ghà nè wèeṅ yə ṅga sojə wèṅ kè gum lak Jòrosalèm fana wèṅ riṅ də wo nə kəəmsə mak yà' mvək momjo.

21 Fana bəu sè wo cu mvwe' lak Jùdiyà wèeṅ caṅ kok lo mündahà, bəu sè wo cu muntòlak wèeṅ tèsə lo, bəu sè wo ka muntòlak anə yeṅ wèeṅ kà də wo mumsə ṅgòni foḥo lòm̄bwa duk.

22 Bəsè a yà'sə nùumbu là' fəsə fò, ya bum sè wo à còm yà' ndzənə ṅwàk Nwì lòoṅ fo' bəuṅ və zìnə.

23 Ho'm̄, megu də anə ye ṅgə' wùriṅ bohòbàa sè bə zum, nə ye sè wo sə fa bwe sè lə mbwi bə nùumbu yà'sə. Ngə' nè co wù kà cèep nə ye sə nzeṅgòṅ anə ṅga Nwì jòk bohòbəu yè'sə wèṅ sè'.

24 Wo nə gbe' zə mok wèṅ bə fèk, nə jəṅ lo mok co ṅkwèṅ mvwe' bòop lak lòoṅ. Fana bə lakmvum wèeṅ nə nəṅrə lak Jòrosalèm bə kù tètè mvək nè Nwì a fa wo kə wəs.

25 <<Bum mok sè yà' sə nìtsə' mvək nə yəəṅ m̄ nùmə bə ṅwə nə ye mənə ṅkəṅkəṅ sè'. Ma nè sə nze fana bòop lak wèeṅ nə jip, nə wəp mvə'nè ndzəp nè ghaṅ cwì, nə sə kə'lə li gbə.

26 Bwìiṅ nə sə kṛə sɛɛṅ bə wəə mvə'nè wo sə tək ṅgòyə yusè yà'a nə ye sə nzeṅgòṅ anə sə, bəusè ṅàaṅ sè ma m̄bu sə pwe'fo' nə tsoḥo.

27 Fana wo nə ye m̄u mo ηwè, mvəsè m̄ sè vè ndzənə mbàk bə ηàη, nə sə fom rɛη boηsə nèbap.

28 Bum yè'sə yè ηgòkè ye vɛ'nə, fana wèη fis kok tu awèη m̄tsè, nə sə kək, b̄usè mvək nè Nwìi nə fɪη me'rə wɛη mvwe' ηgə' nə k̄əp yà'sə laη.>>

Yə'rə Jəη Yumok BohòTɛ

(Mat. 24:32-44; Mak 13:28-37)

29 Anə geη Jisòs tsok fa wo ncèp nè'e bə gb̄u' də, <<Wèeη kək ja'a yàwèeη tɛ nè wo togè nà' də fik nà'a, nə ye tɛ mok wèη lòoη-è.

30 Ghà nè wèeη yə ηga yà' yè ηgòtse' mvù fana wèη riη də mb̄uη k̄əp laη.

31 Yà' mègù sè' vɛ'nə də ghà nè wèeη yə bum yè'sə ηga yà' sə ye vɛ'nə fana wèη riη də gaη ηkum Nwìi sə yà' k̄əp vè laη.

32 <<M̄ sè tsè' wɛη yè'e ηkèm ncèp də ηgwì b̄u nè niè' nè'e nə kà kè lè wes ηga bum yè'sə yà' fà' laη.

33 Ntòbu bə nzeηgòoη nè cà gesə lòfo', ncèp nè n̄àm kà ye cà yuk.

34 <<Wèeη sə jəη ηkərè bə tu awèη. Kà də wèeη me'rə fa ni' awèη bohòdinà bə j̄h̄u rùk nə ye bum sè sə nze sə duk, bwèɛ n̄umbu ànə nə kə tseη wɛη vak ηga wèη ka riη.

35 N̄umbu ànə nə kə tseη ηwè vak co tam ko wu yi. Busè n̄umbu ànə nə və bohònzeηgòη nè lòoη fò'.

36 Wèeη sə so bə ghà nè fòpwe'fo', nə sə ḡu p̄iriyà də wèeη tse' ηàη ηgòca swìrə to bum sè

yà'a nè kè ye yè'sə, nè kə təŋ to mantombi Mo Nwè nè sè'.>>

³⁷ Jisòs à sə yə'rə bwìŋ məmvwè' ndap Nwì nè ghaŋ nè nùumbu pwe' fana ndzəm seŋ, yi kok lo kə noon məmvwè' nda Olìp nè.

³⁸ Tsok à sə rəŋ fana bwìŋ pwe' sə kə tseŋ yi məmvwè' ndap Nwì nè ghaŋ nè ŋgòsə yu'rə yusè yi sə tsòho sə.

22

Wo To Làm Mətuhù Jisòs

(Mat. 26:1-5, 14-16; Mak 14:1-2, 10-11; Jon 11:45-53)

¹ Nkàha Pasobà, sè wo zùgè fo' brəd sè jì yis yà'a ànə kəp və ŋga'a mok laŋ.

² Fana ŋgàa fa satikà' sè ghaŋ bə ŋgàa yə'rə fa bwìŋ lùk wèŋ sə lap mandzè mok ŋgòzə swìhi Jisòs bùusè wo ànə sə wəp bwìŋ də yà'a nè jok.

³ Anə geŋ Satà ni sə ntùù Judàs nè liŋ ye mook də Iskarəyà. Judàs nè à ye sè' mòk mŋgorè ŋgàa fàak Jisòs sè wo à ye hum-ncòp-ba sə.

⁴ Judàs nè à lò, nè kə cep bə ŋgàa fa satikà' sè ghaŋ nè ye bùu sè mantombi bohòŋgàa tək məmvwè' ndap Nwì sə wèŋ mvè'nè yi nè seŋ fa wo nà'.

⁵ Wo à kwa, nè duk də wo fa yi mbàm.

⁶ Judàs nè à dzəm, fana nè sə lap mok mandzè nè co yi seŋ Jisòs ŋga bwìŋ ka fo' yeŋ.

Jisòs Fùhɛ NgòZɛ

Nkàha Pasobà

(Mat. 26:17-25; Mak 14:12-21; Jon 13:21-30)

⁷ Nùmbu nè wo à yèto ñkàk nè wo zügè bred sè jì yis nè à dzèen, à ye sè' nùmbu nè wo sœgè nsungaan ñkàha Pasobà ngòfa Nwì sè.

⁸ Anə geŋ Jisòs tumsə lo Pità bə Jon ŋga yi tipsə wo də, <<Wèen du kə fuhə fa ves ñkàha Pasobà sə ya vesùwèen kə zə yà'.>>

⁹ Wo fek yi də, <<Wù dzəm də vès kə fuhə yè'sə ma fòlɛ?>>

¹⁰ Yi duk fa wo də, <<Wèen yu'rə bəboŋ. Wèen kè ni lòmuntòlak anə fana wèŋ ŋwəmbam mòok nè kərə ŋga yi bək tse' kəŋ ndzəp; wèŋ bɛ' lo yi mvwe' ndap nè yi nè kə ni fo' nè.

¹¹ A kè dzèŋ fo' fana wèŋ tsok fa ŋà ndap nè də, <Cicà nè də vès kə fek wu də rum ndap nè bə bwe ye wèen nè zə ñkàha pasobà mbwa nè fòlɛ?>

¹² Yi nè niŋ fa weŋ rum ndap mòk nè ghan ma mətùhù, nè bum pwe' mbwa, fana wèŋ gəhə tsə'rə bum pwe'fo'.>>

¹³ Anə geŋ wo lo, nè kə ye bum sə pwe' mvè'nè Jisòs ànə duk sə. Wo fuhə zuzə Pasobà sè fo'.

Ñkàha Pasobà Sè

Wo A Zə To Losopà Fo'

(Mat. 26:26-29; Mak 14:22-25; 1 Korè 11:23-26)

¹⁴ Mvèk nè à kərə fana Jisòs cum mvwe' ye mɔ teberè ŋgòzə beŋ bə ŋgàa fàak ye sè wo ŋgàa ntum ye sə wèŋ.

¹⁵ Yi duk fa wo də, <<Mù anə dzəm vɛ'ɛ wùriŋ də vesùwèen zə be'lə tsoŋ zuzə ñkàha pasobà yè'sə bəbɛ' ŋkuŋ ya mɔ ye ŋgə'.

¹⁶ Busè mɔ tsok weŋ də mɔ nè kà yà' mok zə fe'lə tètè tse'ŋga yusè zuzə yè'sə tə bə tu zeŋ

sə kə rɛɛŋ nùmbu nə mvwe' gaŋ ŋkum sè Nwi sə ŋkuŋ.>>

¹⁷ Anə geŋ yi jəŋ ŋgàp, nə kwasə Nwi, fana yi duk fa wo də, <<Wèeŋ ko jəŋ, nə gapsə mʉtsətsə'rəə wèŋ.

¹⁸ Busə mʉ tsok weŋ də, ye jəŋ nè ŋga'a nè'e mʉ nə kà rùuk yè'sə mok no fe'lè tètè gaŋ Nwi sə kə wes.>>

¹⁹ Fana yi jəŋ fe'lə brəd; yi ànə kwasə wes Nwi sèmok fana yi fa yà'wèŋ, nə duk də, <<Nè'e ŋgùpni' àm nè wo a fa nà' bʉu wèŋ. Wèeŋ sə gʉhʉ vɛ'nə ŋgòsə tsərə tse' mʉ.>>

²⁰ Yi ànə gʉ megu sè' mʉmvè' ànə bə ŋgàp nə. Ghà nè wo à zʉ wes zʉzʉ sə fana yi fa wo ŋgàp nə, nə sə cep də, <<Ŋgàp nè'e rùk nè fi nè nà' kì ŋge' ndzənə ndʉəm am, nè nà'a nə fe'e bʉu wèŋ.

²¹ Megu də wèeŋ kək ja'a yàwèeŋ, ŋwè nè yi sèŋ mʉ nə cu be'lə venəwèŋ yè' mʉ teberè anə.

²² Mʉu Mo Nwè, mʉ nə kʉ lo mvè'nè wo ànə duk noŋsə sə, megu də ŋwè nè yi sèŋ mʉ nə cu bə ŋgə'.>>

²³ Fana wo ye ŋgòfe'rə ya' mʉŋgorè wo də ŋwè nè yi nə seŋ nà' nə yè'sə ndàlɛ?

Nwè Nè Yi Yam Ghak Mok

Yi Yè'sə Ndà?

²⁴ Mʉncèp mòk à tesə mʉŋgorè wo anə sè' də ŋwè nè nà' yam càsə mok sə pwe'fo' ndàlɛ?

²⁵ Fana Jisòs duk fa wo də, <<Ŋkum sè sə nzeŋgòn fɛŋ gʉ fagè bʉu awo sə co də wo yàwo bʉu sè ghaŋ. Wo sə dzəm də bwiiŋ sə to wo də ŋgàa fa bwiiŋ mbo.

²⁶ Yà'a kà bohòwèŋ yàwèŋ vè'nə ye. Yusə lɛ də ŋwè nè yi ŋwè nè ghaŋ nə ye co mo nè lɛə, fana ŋwè nè yi mantombi yi nə ye co ŋgà fàk bohòmok sə wèŋ.

²⁷ Yèè, ŋwè nè ghaŋ yè'sə nè fò, ŋwè nè yi cu ye mɛ teberè kè ŋwè nè yi sə fàk ŋgòcàsə vè zuzɛ mɛ teberè anə-ɛ? A lɛ ŋwè nè yi cu mɛ teberè nə. Fana mɛ yàm bohòwèŋ co ŋwè nè yi sə càsə zuzɛ sə càsə nə.

²⁸ <<Nùumbu sè mù a sə tse' ŋgə' sə pwe', wèŋ sə dzəm ŋgòcu malì vesùwèŋ.

²⁹ Fana mù sə koksə wèŋ gaŋ sè' mvè'nè tè' am ànə koksə mɛ.

³⁰ Wèèŋ nə zɛ mɛ teberè mù mvwe' gaŋ am sə. Wèèŋ nə cum mɛmvwe' kapràk, nə sə sak bòop lak Izùre sè yà'a hum-ncòp-ba sə.>>

Jisòs Də Pitàa Nə Dzeŋ Yi

(Mat. 26:31-35; Mak 14:27-31; Jon 13:36-38)

³¹ Fana Jisòs duk fa Pità də <<Saimù, Saimù yu'rè! Satà lɛŋ də yi dzəm ŋgòjə wèŋ, nə swek wèŋ co wo sə swek gòmbi.

³² Megu də mù lɛŋ fa wu pìriyà laŋ də ntəm nè wù tse' ŋgòdzəm tse' bohòmù nà'a kà maŋkwèŋ bwì foho lò. Nə ye sè' də wu bwì vè bohòmù fana wù gu ya bwema yo ye yàwo gugɔŋ sè'.>>

³³ Pità nə duk fa yi də, <<Tà, a dzəm ye mvwe' ndapndzəm bə mvwe' kpɛ pwe', mɛ nə lo yàm vesù.>>

³⁴ Yi duk fa nà' də, <<Pità, mɛ tsok wu ŋkèm duk də, ŋkuŋ mvəp to ntinə ŋga wù duk fis kè' tɛ' laŋ də wù ka mɛ riŋ.>>

Mvək Ngə' Nə Kàrə Laŋ

35 Anə geŋ Jisòs fek wo də, <<Mvè'nè mù ànə tumsə lo weŋ fa', nə duk də wèeŋ nə kà posà mbàm jə, kà bàm jə, nə kà kùuŋgùp sè' jə tse' løyà'a, wèŋ ànə lo, nə kə jamə yumok à?>> Wo à duk də, <<Vès à ka yumok jamə.>>

36 Fana Jisòs nə duk fa wo mok də, <<Ŋwè nè yi tse'-a pùp ye kè bàm àlɛ, yi jəŋ tse' nà' ŋga'a. Ŋwè nè yi ka-a kafà' tse', ŋgəŋgəŋ seŋ cək ye, nə ywiŋ tse' mòk bə zeŋ.

37 Mə tsok fa weŋ də yusè wo à còm yà' ndzənə ŋwàk Nwì bə liŋ am də, <Wo à ta be'lə yi bə ŋgàa gù bup wèŋ> yà'a nə bəuŋ və tsoŋ zìnə. Njo nè bum sè wo à còm yà' bə liŋ am sə, sə bəuŋ vè zìnə pwe'fo'.>>

38 Wo duk fa yi də, <<Tà, vès tse' fèk ba.>> Yi duk fəsə fa yà' də, <<Yà'sə kəkürə.>>

Jisòs Sə Gù Piriya Gèsemani
(Mat. 26:36-46; Mak 14:32-42)

39 Anə geŋ yi lokok ŋgòlòmuvwe' nda Olip sè mvè'nè yi lòhogè səsə sə fana bwe ye sə wèŋ sə bɛ' løyi sè'.

40 A kè dzèŋ fo' fana yi tsok yà' də yà'wèeŋ leŋ Nwì də ya mèmumsèə kà yà' gha'.

41 Fana yi soonŋ gəsə lo ŋgə ni'ì yà'wèŋ anə fo' co wù mak lis kə dzeŋ, nə təəŋ bə tumfərə sə leŋ piriya.

42 Yi leŋ duk də, <<Tè', a ye-a ŋga bə-a wu fana wù jəŋ gəsə lo ŋgàp ŋgə' ènə fo'; mù duk-a sè' vɛ'nə, wù gə lɛ məmuvè'nè wù dzəm wù, kà məmuvè'nè mù dzəm mù gù.>>

43 Anə geŋ masinjà Nwì mòk tesə və mabu, nə kə fa yi nàŋ.

44 Anə ye nga ntəm sə bup yi ve'ε nsàp nè yi à leŋ ve'ε tètè ndùrè sə cərə yi co sə cərə tsə nduəm.

45 Anə geŋ yi lokok, nə kə tseŋ bwe ye sə wèŋ nga wo wòbə manziŋ wùriŋ, fana nə sə dzəm mok lo.

46 Yi fek yà'wèŋ də, <<Wèŋ sə dzəm lo yà? Wèŋ lokok, nə leŋ də ya məmumsəə kà wen gha'.>>

Wo Ko Jisòs

(Mat. 26:47-56; Mak 14:43-50; Jon 18:2-11)

47 Jisòs ànə sə cep mali ntòfo' fana ma ngo bù mok tesə və, nga Judàs nè yi sè' mòk mɔŋgorè bwe ye sè hum-ncòp-ba nə to mantombi yi. Judàs nə lo kə cepsə Jisòs nə co ŋge' ve'.

48 Jisòs fek nà' də, <<Judàs, wù də wu seŋ mùu mo ŋwè bə cècèpsə à?>>

49 Bwe Jisòs sè wo ànə ye fo' sə à yə mvè'nè bum sə à ye fana wo fek Jisòs də, <<Tà, aco vès gbɛ' bə fèk à?>>

50 Mòk mɔŋgorè wo anə à gbɛ' cì' màk ntu'u mo ŋà fàk ŋkum ŋà fa satikà' mòk. Yi à gbɛ' cì' ntu'u nà' sè bo ma zə.

51 Fana Jisòs duk də, <<Yà' kùrə ve'nə,>> nə jweŋ gesə ntu'u sè, fana yà' me.

52 Anə geŋ Jisòs cep bohòŋgàa fa satikà' sè ghaŋ sə bə ŋgàa fàak sè wo kùkgè ndap Nwi nè ghaŋ nə, nə ye bə ŋkwàha bùu sè wo à tesə vè ŋgòko yi sə wèŋ də, <<Wèŋ tesə co wèŋ sə lòmvwe' be' ŋà yè bə fèk nə ye ntòk yè'e bùu mà à?>>

⁵³ Vesùwèen yiskokgè mùmvwè' ndap Nwì nè ghan sèsa, wèŋ kà mɛ ko. Nə ye də nè'e mok ŋga'a mvək nè njàwèŋ, nè ŋaan ndzəm tse' ñàŋ.>>

Pità A Bèŋ Jisòs

(Mat. 26:57-58, 67-75; Mak 14:53-54, 65-72; Jon 18:12-18, 25-27)

⁵⁴ Anə geŋ wo ko yi, nə jəŋ lo yi mvwè' ndap ŋkum ŋgà fa satikà'. Pità sə yuŋ və wo maŋkwèŋ mweè səsap.

⁵⁵ Wo à kè fimsə mis mɛ ntòmbi anə, nə cum sə yuk fana Pità nə və kə cum kok ye fo' sè'.

⁵⁶ Mvè'nè mis à sə kɛə rɛŋ fana mɛŋwà nəmòk ye yi, nə kɛk kok nà' jwaan, nə duk də, <<Ŋwè nè'e yegè sè' bə ŋgà' ànə.>>

⁵⁷ Fana Pità nə beŋ də, <<Njè'gù, mù ka yi riŋ.>>

⁵⁸ A cu kok ghàr ŋgà' nəmòk ye yi sè', nə duk sè' də, <<Wu sè' ŋwè àwo mòk.>> Pità nə beŋ sèmok də, <<Hai' mù ka mòk yeŋ ŋgàta.>>

⁵⁹ A sàp kok mok bèboŋ ntèŋ fana ŋwè nəmòk duk fe'lə sèmok duk də, <<Mù rì ŋwè nè'e bèboŋ, yi ŋwèə Galili, yi yegè bə nà'.>>

⁶⁰ Pità nə duk fe'lə sèmok də, <<Ŋgàta, mù ka yusə wù sə cəp yà'sə riŋ.>> A ye sè' ghà ànə, ŋga yi ka ntòcəp wes ntèŋ, ntomvəp to.

⁶¹ Fana Tà Jisòs bɛaŋ kɛk gesə lo Pità. Pità tsəm kok mvè'nè Tà anə duk fa yi də, <<Ntomvəp nə sə kə to ntinə ŋga wù bèŋ mɛ kè' tɛ' də wù ka mɛ riŋ sə.>>

⁶² Yi tesə lo sə ntòmbiŋ, nə kə waŋ vɛ'ɛ nèbɛp.

⁶³ Anə ye vɛ'nə fana bùu sè wo à sə kotse' Jisòs sə wèŋ à sə ywì'lə yi, nə sə ləp yi sè'.

⁶⁴ Wo lok yi lis, nə sə fek yi də, <<Ləp wu ndà, riŋ-a ŋgəŋgàŋ-è?>>

⁶⁵ Wo à cèp fa yi bum ŋkùuŋntèn, nə sə yak yi.

Wo Sak Jisòs Mɛ Kaŋsurù

(Mat. 26:59-66; Mak 14:55-64; Jon 18:19-24)

⁶⁶ Nè zəzòŋ à dzèeŋ fana bù ŋkwàha bùu Jus wèŋ kə benə ni' mvwe' mò'fis bə ŋgàa fa satikà' sè ghaŋ bə ŋgàa yə'rè bwìŋ lùk wèŋ pwe'. Fana wo jəŋ lo yi mɛ kaŋsurù wo anə, nə sə cəp də,

⁶⁷ <<A ye-a ŋga wu Nkum ŋgà gèm bwìŋ nə wù, wù tsok fa ves.>> Yi duk fa yà'wèŋ duk də, <<A ye-a ŋga mù tsè' fa wəŋ, kaco wèŋ dzəm yeŋ;

⁶⁸ nə ye sè' də a ye-a ŋga mù fek wəŋ yumok, kaco wèŋ cəp fəsə fa mɛ sè yeŋ.

⁶⁹ Megu də ye jəŋ ŋga'a nə lo mantombi fana mùu mo ŋwè, mɛ nə cum bo ma mà'a Nwì nè yi tse' nàŋ.>>

⁷⁰ Fana wo pwe'fo' fek yi də, <<Ye də wu mo Nwì à?>> Yi duk fa yà' də, <<Wèŋ cəp mè laŋ.>>

⁷¹ Fana wo duk ŋga'a də, <<A sə ləp də a yuk fe'lə yè'sə yà? Vesùwèŋ yuk ncèp jòŋ nə kə cùhu yi bə ntu'u avès laŋ.>>

23

Jisòs Tə Mantombii Palè

(Mat. 27:1-2, 11-14; Mak 15:1-5; Jon 18:28-38)

¹ Anə gen ma ngo bù nə pwe'fo' lokok, nə jəŋ lo yi mantombii Palè.

² Wo yeto ngòto fa yi njo də, <<Vès ko ɲwè nè'e ɲga yi sə jipsə bù avès, nə sə duk də bwiiŋ kà tas bohòKaisà làk, nə duk də yi ɲkum nè yi ɲgà gèm bwiiŋ.>>

³ Fana Palè nə fek nà' də, <<Wu ɲkum bùu Jus wèŋ wù à?>> Jisòs nə cep fəsə fa nà' də, <<Wù duk yà'a mvè'nə.>>

⁴ Palè bùu duk fa ɲgàa fa satikà'a sè ghan sə bə bùu sè fo' sə pwe'fo' də, <<Mù ka yàm yusè bup sè ɲwè ènə gùu sə ye.>>

⁵ Bùu sə wèŋ guŋ təəŋ mpaan duk də, <<Yi sə kùəmsə bwiiŋ mvwe' nzenɡòn Jùdiyà nə pwe'fo' bə nsàp mandzè nè yi sə yə'rə wo nə. Yi a yè jə Galili, nə kə wəs Jòrosalèm fəŋ pwe'.>>

Jisòs Tə Mantombii ɲkum Herò

⁶ Palè ànə yuk bum yè'sə fana yi fek də, <<ɲwè ènə yi ɲwèə Galili àlɛ?>>

⁷ Yi ànə rɛɛŋ də Jisòs tesə vè mvwe' nze nè tse' fo' ɲkum Heròfana yi tumsə lo nà' bohòHeròanə. Ghà ànə à ye ɲga Herònə cu sè' mvwe' lak Jòrosalèm anə.

⁸ Heròà yə Jisòs fana yi kwa vɛ'ɛ wùriŋ, bùusè yà' à sàap màm vè'nè yi à yuk liŋ nà', nə sə dzəm də yi ye nà'. Yi ànə sə tsəm də Jisòs nə gu niŋ fa yi maŋgəŋgəŋ mòk.

⁹ Herònə à fek Jisòs bum mok ɲkùuŋntèn, Jisòs nə kà cù mùk lok.

¹⁰ ɲgàa fa satikà'a sè ghan bə ɲgàa yə'rè bwiiŋ làk wèŋ guŋ təəŋ megu fo' ɲgòto fa yi njo.

11 Heròbè sojàa ye wèŋ à bùsə yi co ləm awo, nè sə ywi'lə yi. Fana wo à nisə fa yi cək mòk nè co cək ŋkum vε'ε, nè tum fəsə lo yi bohòPalè.

12 Heròbè Palè à yè ko jə ŋge' nùmbu ànə; ŋga bə nà' à sə kà ŋge' mantombi yegè.

Wo Dük Də Wo Nə Zə Jisòs

(Mat. 27:15-26; Mak 15:6-15; Jon 18:39-19:16)

13 Anə geŋ Palè nè to benə ŋgàa fa satikà' sè ghaŋ bə nji njii sè fo', nè ye bə bùu sè fo' sə wèŋ pwe'fo'.

14 Yi dük fa yà'wèŋ də, <<Wèŋ a jə vè fa mü ŋwè nè'e dük də yi sə jə lòwes bwìŋ ma nè bə jòŋ. Müm vè'nè mü kùk ja'a yi yàm, ŋga wèŋ sə yə sè' fana mü ka yàm də yi a gù bum sè wèŋ sə dük yà'sə riŋ.

15 Heròa ka yumok bup bohònà' sè' ye bùusə yi a tumsə fəsə vèsə nà' bohòvès sèmok. Yà' nòjəja də ŋwè ènə ka yumok sè bup sè co wo zə yi bùu zəŋ gū.

16 Mü nè fa ŋàŋ də wo ləp yi, fana nè me'rə yi.>> (

17 Yi sə dük vε'nə ŋga à ye də nùmbu ŋkàha pasobà sə kè dzèŋgèə fana Palè nè fis me'rə tsoŋ fa wo ŋgà ndapndzəm mò'fis.)

18 Bùu sə wèŋ ke' tosə ŋgùŋ cù mò'fis də, <<Wèŋ zə gesə lo ŋwè ènə fo', nè fis me'rə fa ves lε Bàrabà.>>

19 (Bàrabà nè à ye ŋwè nəmòk nè wo à nisə yi ndapndzəm bùusə yi à lùlù bə bùu gomè nè zə bwìŋ.)

20 Palè à cèp bohòwo sèmok ŋga yi sə ləp mandzè co yi me'rə Jisòs nè.

21 Bùu sè wèŋ sè kɛ'ŋgùŋ də, <<Wèŋ tɛ'lə yi, wèŋ tɛ'lə yi muntəŋ!>>

22 Yi fek fis yà'wèŋ nè kè' tɛ' duk də, <<Bùu yà? Njwè ènə gù bupsə yà? Mù ka yàm yumok sè co wo zə yi bùu zɛŋ ye. Mù nè ləp yi, nè me'rə yi lo.>>

23 Bùu sè wèŋ gɛŋ təŋ vɛ'ɛ mpaan nè mpaan nè sè kɛ'ŋgùŋ də wo tɛ'lə megu nà' muntəŋ. Wo à gù vɛ'nə tètè ma nè njəwo nè zə.

24 Anə gɛŋ Palè nè cɛp, nè fa njan bə yusə bùu sè wèŋ à sə dzəm sə.

25 Yi fis me'rə njwè nè wo à nisə yi ndapndzəm njo ndan, nè ye bùusə yi anə zə njwè nè. Nà'a njwè nè wo anə sə dzəm də nà'a fis me'rə nè, fana nè jəŋ Jisòs, nè fa yà'wèŋ də yà'a gù bohònà' mvè'nè yà'wèŋ dzəm.

Wo Tɛ'lə Jisòs Muntəŋ

(Mat. 27:32-44; Mak 15:21-32; Jon 19:17-27)

26 Mùmvè'nè wo à sə jə lòJisòs fana wo kure bə njwè nəmòk nè wo to yi də Saimù, nè mvwe' lak Sirinì nga yi à sə vè la'à yi. Wo naan fa yi ntəŋ sə də nà'a bək bɛ' Jisòs bə zɛŋ maŋkwèŋ.

27 Bwìŋ à sə bɛ' vè yi maŋkwèŋ anə wùriŋ. Bèba mok à ye fo' sè', sè wo à sə koksə manziŋ, nè sə wan fa Jisòs nè.

28 Anə gɛŋ Jisòs nè bùuŋ kək wo, nè duk də, <<Wèŋ njè'ɛ gùu Jòrosalèm, wèŋ kà mù wa fa, wèŋ wan fa tu awèŋ bə tu bwe awèŋ.

29 Busè mù tsok wɛŋ də mvək mòk sə vè nè wo nè duk də, <Rɛŋsi bohòbàa sè wo nzeŋ, nè ye vèəm sè yà' ka mwe dzə yuk, nè ye fe'lə mbwi sè mwe ka yà' no yuk!>

30 Nà'a ghà nè bwìiη nə duk fa nda də, <Kəəη gbù wè mɔ ni'ì vès,> nə duk fa nzès də <Kè kəəη tsè lok ves.>

31 Bùsə a ye-a nga bwìiη sə gù bum sè wèη sə yə yè'e nga tɔ cu lì ntòcəcòη ye də nà'a yum-a, ye wesə yè'sə nga'a nsàp nè fò?>>

32 Bù ngàa gù bup mok à ye bwìiη ba sè wo à sə jə be'lə lòwo də wo kə zə be'lə wo bə Jisòs nə.

33 Wo à kə dzèη mɔwe' sè wo togè fo' Nzùə Tu Bwìiη àwo fana wo tɛ'lə yi mɔ ntəəη anə fo', bə ngàa gù bup sə wèη. Wo à tɛ'lə ngà gù bup mòk bo ma zɔ, mòk bo ma ηkwìp.

34 Fana Jisòs duk də, <<Tè' am, swì fa wo bùsə wə ka yusə wo sə gù sə riη.>> Wo sə təm bèη də ya wo gapsə cəək ye sə.

35 Bùu səmok à təəη fo', nə sə kək. Bù ηkwàha bùu Jus wèη à sə ywì'lə yi. Wo sə duk də, <<Yi tɛsə riη bon̄sə megu bùu mok wèη, yi tɛsə-a ni' ye, nga a ye-a də yi Nkum ngà gèm bwìiη nè Nwì à cok fis, nə tumsə fa ves na!>>

36 Sojàa sè wo à ye fo' sə à ywì'lə yi sè'. Wo sə kə fa yi nsàp rùk mòk nè cəcəp.

37 Wo sə cəp də, <<A ye-a nga wu ηkum bùu Jus wèη nə, wù tɛsə-a ni' yò!>>

38 Wo à còm naan yumok ma mɔ tu ntəη anə də, NÈ'e ηkum BÙU JUS WÈη NƏ.

39 Ngà gù bup mòk nè yi à kə'ə sè' muntəəη anə, à yàk yi də, <<Nkum ngà gèm bwìiη ka wù nè'e yeη à? Tɛsə ni' yò, nə tɛsə ves sè!>>

40 Mòk nə cəp jwa nà' də, <<Wu kà Nwì wəpgè à? Vesùwèη pwe'fo' cu sə mɔwe' kùuη sè mò'fis.

⁴¹ Vesù sə yə yàvès ɲgə' bə yusè a gù yà' laɲ, ɲgà' ènə ka ye yumok gɹ bɹpsə lok.>>

⁴² Yi duk fa Jisòs nə də, <<Wu kè dzèɲ mvwe' gaɲ ɲkum yo, wù kà mɹ swì.>>

⁴³ Jisòs duk fa nà' də, <<Mɹ tsok fa wu ɲkèm duk də, wu nə ye vesù ntinə mɹ Pàràde.>>

Jisòs Kpɹ

(Mat. 27:45-56; Mak 15:33-41; Jon 19:28-30)

⁴⁴ Anə ye ɲga nùum mok maràɲ fana ndzəm seɲ mvwe' nzeɲgòɲ nə pwe' tètè kə dzeɲ co nùm səm.

⁴⁵ Fana cək nè nà' à sə gəpsə mbwè ndap mòk mɹmvwe' ndap Nwì nè ghaɲ nə à sàha gà'a tsə ba. ⁴⁶ Fana Jisòs waɲ torə fis mɹtsè də, <<Tè', mɹ fa yòɲsə àm ndzə bohòwù!>> Yi ànə cep ve'nə fana yòɲsə ye me.

⁴⁷ ɲkum sojà mòk ànə ye bum sè yà' ye sə fana yi kwasə Nwì, nə cep də, <<A zìnə də ɲwè ènə nə ka yumok riɲ!>>

⁴⁸ Ma ɲgo bù nè wo à ye fo' nə, ànə ye yusè yà' ye sə pwe' fana wo bwi foho lo la'à wo, ɲga wo wa'a tse' lòbo ndzə ɲgùu wo.

⁴⁹ Bùu sè wo à rì Jisòs nə, bə bəba sè wo à bɛ' vè yi mvwe' nzeɲgòGalili sə wèɲ à kè təəɲ mvwe' mok səsap, nə sə ja'a bum ye'sə.

Wo Tuuɲ Jisòs

(Mat. 27:57-61; Mak 15:42-47; Jon 19:38-42)

⁵⁰⁻⁵¹ ɲwè nəmòk à ye nè liɲ ye à ye də Jòsep, yi à tesə vè lak Arimàtayà mvwe' nze Jùdiyà. Yi à ye mòk mɹmvwe' kwe' kaɲsurù nè bùu Jus wèɲ nə, nə ye sè' ɲwè nè kəkərè mɹ lisè Nwì. Yi à

sə tək ye gaŋ ŋkum sè Nwì sə. Yi à ka ye bə bum sè wo a cèptes, nə sə ɣa yà' sə dzəm.

⁵² Nɣwə ènə à lòbohòPalè, nə kə lɛŋ vèŋ ni' Jisòs nə.

⁵³ Fana yi kə ki tsoŋ nà', nə lim gesə ndzənə cək, nə kə tuuŋ nà' ndzənə sèe sè wo à tu yà' ndzənə lis. A ye ŋga wo ka ŋwè nja ntòtuuŋ yuk.

⁵⁴ Anə ye nùmbu nè wo à sə fàhɥ, ya ŋga nùmbu dzəə yeto.

⁵⁵ Bəba sè wo à bɛ' vè yi mvwe' nze Galili sə à yù lòo, nə kə ye sèe sə, nə ye mvəsè wo tuuŋ vèŋ ye nə sè'.

⁵⁶ Wo à bwiŋ lòo, nə kə fàhɥ làmindà bə mve' sè wo nə kə yok vèŋ ni' Jisòs bə zɛŋ. Nùmbu dzə à ye, wo yonɣsə yiskok mùmɣvè'nè làk sə dək vɛ'nə ŋkuŋ nə lo kə yo' yi.

24

Jisòs Lòkok Mvwe' Krɥ

(Mat. 28:1-10; Mak 16:1-8; Jon 20:1-10)

¹ Nù Sondè à ye, bàa sə lo mvwe' sèe sə nè zəzòŋ, ŋga wo kotse' lòmve' sè wo à fàhɥ yà' sə.

² Wo ye ŋga wo dzərə fis lis nè wo ànə lok ncùu sè sə bə zɛŋ nə laŋ.

³ Wo ànə ni lo sənə sèe sə fana wo kà vèŋ ni' Tà Jisòs nə ca yə.

⁴ Mùmɣvè'nè ŋkərè awo à jip fo' fana wo ye bùu mok fo' ba ŋga wo ni tse' cèək sè fəfəp, yà' sə ba'a vɛ'ɛ.

⁵ Wɥə à ko wo, wo gbɥ fə'ə gesə lo si awo sə nze. Fana bùu sə dək fa wo də, <<Wèŋ sə làp

ηwè nè yi cu ye ηwəm mʉtsətə'sərə bù krʉkrʉ
bùu yà?

⁶ Yi ka fəη yeη, yi lòkok laη. Wèη tsərə yusè yi
ànə tsok weη ηga yi cu ntòmʉwe' nzeηgòGalili
yà'a.

⁷ Yi ànə duk də, <Wo nə fa tsooη mʉu mo
ηwè ndzə bohòηgàa gù bʉp wèη, wo tɛ'lə mʉ
mʉntəəη; nùmbu tɛ' ye, mʉ lokok sèmok.> >>

⁸ Anə geη wo tsərə ncèp ye nə.

⁹ Wo à bwìη foho vè mʉwe' sèe sə, wo kə tsok
fa bum yè'sə bohòbwe ye sè hum-ncòp-mò'fis sə,
bè bùu mok wèη pwe'fo' sè'.

¹⁰ Anə kə tsok fa ηgàa ntum sə wèη bum yè'sə
Mèri Màdàlinà bè Jòanà bè Mèri nè ma Jem, nə
ye bàa mok wèη.

¹¹ Wo à tsəm də bàa yè'sə sə cèp yusè yà' ka
fàk tse' fana wo kà yà'wèη dzəm fa.

¹² Pità à lòkok mʉtsè, nə caη lo mʉwe' sèe sə.
A kè dzèη fo', yi bùu tsoη nze, nə ye megu cèək
sè wo à tuuη yi bè zeη sə, nə kà yumok sè zok
yə. Fana yi bwi foho lo lak, nə sə jip bè nsàp yu
nè nà' ye ènə wùriη.

*Yusè Yà' A Ye Mʉwe' Mandzè Nè NgòLòLak
Emawùs
(Mak 16:12-13)*

¹³ Nùmbu ànə à ye, bùu sèmok à sə lòmʉwe'
lak mok sè wo to yà' də Emawùs, ηga wo bwìη
ba. Lak Emawùs sə à ye co kilometà hum-ncòp-
mò'fis ηgòlòJòrosalèm.

¹⁴ Wo à sə taη lòbè bum sè yà' ye yè'sə pwe'.

15 Wo ànə sə taan ncèp ènə mvwe' mò'fis fana Jisòs à sòon vè fo' sè' bə tu ye, bə yà'wèŋ sə lo ca.

16 Wo ye yi, fana yumok gu də wo kà yi rì.

17 Yi fek yà'wèŋ də, <<Wèŋ sə gì, nə sə taan lo yè'sə yu yà?>> Wo foho təəŋ, nə sə kək bə manziŋ.

18 Mòk nè liŋ ye à ye də Klipàs duk fa nà' də, <<Co wu yè'e ŋkùŋ mvwe' lak Jòrosalèm, də mègù wù nè wù ka yusè yà' a ye nùumbu yè'e riŋ à?>>

19 Yi fek fe'lə yà' də, <<A yu yà?>> Wo duk fa yi də, <<Bum sè yà' a ye bə liŋ Jisòs nè mvwe' lak Nazàre. Yi à ye ŋà tsòhòbum Nwì, yi à sə gù, nə sə cep bum sè yà'a guŋuŋ wùriŋ mantombii Nwì nə ye bwìŋ.

20 Ŋgàa fa satikà' bə bù ŋkwàha bù avès wèŋ a cèp wo ŋkuŋ wo tɛ'lə zə yi mu ntəəŋ.

21 Vès à sə naan yàvès tu də nà'a yi nè yi nə lak tiŋ fis bùu Izùre. Yà'sə ye-a sè' vɛ'nə, a ntinə nùumbu tɛ' nè bum yè'sə a ye.

22 Fana bàa səmok sè mŋgorè vès kè vèsə nòon ves zoon, də wo anə yaan lo noon mvwe' sèe ye sə,

23 nə kà vèŋ ni' ye nə yə. Wo bwìŋ vè, nə sə duk də wo ye masinjàa Nwì. Masinjàa Nwì sə tsè' fa wo də nà' cu ŋwəm.

24 Bùu mok sè anə ye vesi wèŋ lòmve' sèe sə, nə ye ŋga yà' mègù mvè'nè bàa sə nə cep sə zìnə, fana wo kà yi ye bə lis yə.>>

25 Jisòs duk busə fa yà'wèŋ də, <<Hò! Ləm bùu yè'e wèŋ; wèŋ tse' ntəm nè nà' fi bup ŋgòdzəm

tse' bum sè ngàa tsòhòbum Nwì à cèep.

²⁶ Yà' ànə ka yeŋ də Ŋkum ngà gèm bwìŋ nə nə ye nsàap ngə' yè'sə ŋkuŋ nə ca ni mvwe' bònŋ ye yeŋ à?>>

²⁷ Fana yi ye jəŋ mu ni'ì Musì bə ngàa tsòhòbum Nwì wèŋ, nə tsoho reŋsə fa wo bum sè ŋwàk Nwì à sə cèp yà' bə liŋ ye sə pwe'fo'.

²⁸ Anə geŋ wo sə kʷəp lo mvwe' lak sè wo à sə lòfo' sə. Yi sə gu ye sə co də yi sə cà lòmali mantombì ve'ε.

²⁹ Fana wo sə ləŋ nà' də, <<Vesùwèeŋ noon fən, bùusè nùm co wes laŋ, ndzəm sə vèə.>> Fana bə yà'wèŋ lo ŋgòkè nònŋ.

³⁰ Ghà nè bə yà'wèŋ ànə sə zʷ zʷzʷ fana yi jəŋ bred sə, nə kwasə Nwì, nə bə'rə fa yà'wèŋ.

³¹ Fana lis awo muhu, wo riŋ yi; yi nom bisə mʷlisè wo mvwe' sè yi anə ye sə wà.

³² Mòk ye ŋga'a ŋgòfek mòk də, <<Ghà nè yi anə sə cep bohòvesù mandzè, nə sə tsoho reŋsə fa ves bum sè ndzənə ŋwàk Nwì yà'a, mà də ntum nə kaŋ ves ve'ε wùriŋ àlaa?>>

³³ Wo à lòkok mègù sè' mvək ànə, nə bwi lo Jòrosalèm. Wo kə tseŋ bwe ye sè hum-ncòp-mò'fis sə wèŋ, ŋga wo cu mvwe' mò'fis bə bùu mok wèŋ.

³⁴ Bə yà'wèŋ sə cep də, <<Tà a lòkok laŋ nə zìnə, Saimù yə yi bə lis!>>

³⁵ Fana wo tsok bwi ŋga'a yusè yà' anə ye mandzè, nə ye mvè'nè wo anə riŋ nà' ghà nè nà' anə bə'rə bred sə.

Jisòs Yəəŋ BohòBwe Ye Wèŋ

(Mat. 28:16-20; Mak 16:14-20; Jon 20:19-23;

Ngàa Ntum Jisòs 1:6-11)

³⁶ Mumvè'nè wo ànə sə cep ve'nə fana Jisòs nə bə tu ye tesə təəj və mʉtsətsə'rèə wo anə nə duk də, <<Fifi ye bohòwèŋ.>>

³⁷ Wo à vèhe, nə wəp ve'ε; wo à tsəm də kàmòk wo yə ze'.

³⁸ Yi duk fa yà' də, <<Wèŋ sə wəp yà? Wèŋ sə mərə ke' sə ntuè wèŋ bùu yà?>>

³⁹ Wèŋ kuk ja'a bo am bə kùu am, ya wèŋ riŋ də a mù nə. Wèŋ jwəŋ ja'a mu bə bo, bùusə ze' kà njàp bə wəp mvəsə wèŋ yə də mù tse' yè'e tse'gè.>>

⁴⁰ Yi ànə cep ve'nə fana yi niŋ fa wo bo ye bə kùu ye wèŋ.

⁴¹ Mvè'nè wo à ka sə ntuè wo pap ntòdzəm wes bùusə wo à kwa ti' lələ, nə sə mərə, fana yi fek yà'wèŋ də, <<Wèŋ tse' yumok fəŋ sə co ŋwè zù à?>>

⁴² Wo fa yi fuk nè lələ,

⁴³ yi jəŋ nà', nə zù mʉlisə wo.

⁴⁴ Anə geŋ yi duk fa wo də, <<Yè'e yusè mù ànə tsok fa wəŋ ŋga mù cu ntòvesùwèŋ sə, də yusè wo à còm yà' bə liŋ am ndzənə ŋwàk lùuk Musi, nə ye sè ŋgà tsòhòbum Nwi bə ŋwàk Sàam wèŋ pwe' nè bùuŋ vè tsoŋ zinə.>>

⁴⁵ Fana yi rəŋsə ŋkərèə awo ŋgòrì yusè yà' cu ndzənə ŋwàk Nwi.

⁴⁶ Yi duk də, <<Yè'e mvè'nè wo à còm də, Nkum ŋgà gèm bwi nə nə ye ŋə', fana nùmbu nè te' kə dzèŋ fana yi lokok mvwe' kpa sèmok.>>

⁴⁷ Nə ye sè' də, wo nə sə tsoho lo sənə nzeŋgòŋ nə pwe'fo' bə liŋ am ŋga wo yèto ntòmve' lak

Jòrosalèm. Wo nə sə tsoho lo ncèp nè ηgòkupsə, nə bwi fa bup ηkwèn, fana Nwì swi fa ηwè bup ye.

⁴⁸ A wèn sè wèn η nə tsok lo bũu mok, bũusè wèn yə bə lis awèn.

⁴⁹ Wèn ye, mɯ nə tumsə fa wən yusè Tè' am a kàk mɯ yà' sə; fana wèn cum tse' muntòlak fa'nə tètè ηàaη sè yà'a nə tsoη ma mɯbu sə və bohòwèn ηkuη.>>

⁵⁰ Anə geη yi jəη fis lo yà'wèn muntòlak anə, bə yà'wèn lo tètè kə dzeη mvwe' lak Betani. A kè dzèn fo', yi fis kok bo ye mɯtsə, nə se wo.

⁵¹ Yi à sə sè wes wo ntèn fana yi me'rə yà'wèn, nə kok lo mɯbu.

⁵² Wo à kuksə yi, nə bwi foho lo Jòrosalèm anə bə kwəkwa vɛ'ε wùriη.

⁵³ Wo cum mamgeη mɯmvwe' ndap Nwì nè ghaη nə, nə sə kuksə Nwì mbwa.

Nwàk Nwì Ma Rùk Nè Fi
New Testament in Yamba

copyright © 2011 Wycliffe Bible Translators, Inc.

Language: (Yamba)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 18 Apr 2025 from source
files dated 29 Jan 2022

c475d5b3-da44-51cf-93ca-f255b72fe481